

**NATIONAL ASSEMBLY OF
SEYCHELLES**

Friday 4th August, 2023

The Assembly met at 9.09am

National Anthem

Moment of Reflection

Mr Speaker in the Chair

MR SPEAKER

Bonzour tou dimoun. Nou Manm Onorab, zofisye Lasanble, piblik ki a lekout. E mon osi dir byenveni en viziter dan Galeri, Mr Dean Morel ki fanmir enn bann viktim dan Rapor *TRNUC*. I ti la depi yer ane. Mon pa'n pran lokazyon pou dir li byenveni, me mon dir li ozordi. Mersi.

Bon nou a rebran nou travay. Me avan nou rebran nou travay mon oule *clear* en pti *matter outstanding*, e sa se adres size responsabilite Lasanble an relasyon avek Drwa Repons.

Bon, apre ki mon'n ganny 3 demann pour Drwa Repons an relasyon avek sa deba, mon santi i neser etabli en pozisyon pour Lasanble lo sa size.

Lartik 102, paragaf (6) Konstitisyon, i donn en dimoun ki'n ganny afekte negativman, par en referans lo

li dan Lasanble, ou ganny sa Drwa Repons. Parey mon'n fer sorti, sa Lartik pa dir ki i bezwen annan en retraksyon oubyen en *apology*. Alor, sa Drwa Repons i ganny regarde koman en remed par li menm.

Me mon krwar i pa rezonnab pour nou zis aret la. Lasanble i devret konsernen ki si i annan en demann Drwa Repons, savedir i annan en remark ki pe ganny konteste. E si i annan plizyer demann, sa i kapab met kredibilite Lasanble an kestyon.

Nou bezwen konsyan ki se limaz Lasanble ki kapab ganny afekte. Nou Kod Kondwit i demande ki Manm i a tou moman azir pou tenir e ranforsi konfyans piblik dan Lasanble.

Avek sa an tet, Manm i devret konsyan pou pa fer okenn alegasyon ki pa byen fonde, e ki Manm i kapab zistifye sa ki in dir. Alor Manm i devret pran kont Drwa Repons.

E si i annan en keksoz ki'n ganny dir ki pa korek, ki sa Manm i pran son responsabilite pou korize. E i kapab fer sa par swa en koreksyon oubyen sa i kapab enkli osi en *retraction* - oubyen en *apology* si i neser.

Sa i pa devret Lord sorti kot Speaker, me i responsabilite sak Manm. Sa i

pozisyon ki mon krwar Lasanble i bezwen pran.

E mon ava azoute ki okenn kestyon i devret ganny fer - okenn koreksyon ki devret ganny fer, i devret ganny pran apre kominikasyon avek Speaker, pou etabli ki sa Manm i anvi dir, e kan i devret fer li. E sa pou evite ki nou annan en deba dan Lasanble lo *Right of Reply*, oubyen lo mon *ruling*.

Onorab Pillay, mon pa pou kapab donn ou larepons la, akoz mon pa anvi antre dan en deba lo sa *ruling*. Si i annan okenn pwen ki ou ti a kontan fer, mon envit ou pou antre an kominikasyon avek mwan pou gete kisisa - kisisa ki nou devret fer.

HON SEBASTIEN PILLAY

(Off-Mic)

MR SPEAKER

I pa lo sa *ruling*, e i pa lo sa bann ka? Mon pa pe antre lo sa bann ka. *Ok.*

HON SEBASTIEN PILLAY

Mersi Mr Speaker. Be *following* sa ki ou'n dir lo sa *ruling* ki ou pe donner. Mon pa'n al lo sa *ruling* mwan. An relasyon...

(Interruption)

MR SPEAKER

Me...Onorab. Onorab Pillay.

HON SEBASTIEN PILLAY

(Off-Mic)

An relasyon...

MR SPEAKER

Onorab Pillay. Onorab Pillay arete silvouple. Sa i lo mon *ruling*. Mon pe envit ou antre an kominikasyon avek mwan pou deside kisisa ki ou pou dir.

HON SEBASTIEN PILLAY

(Off-Mic)

I pa lo la...i konsernan bann drwa fondamantal...konstitisyonnell ...

MR SPEAKER

Me ou pe al lo mon *ruling*. *Ok.* Pa fer referans avek sa *ruling*. Ki drwa konstitisyonnell ou pe dir?

HON SEBASTIEN PILLAY

Ok. Dan nou Konstitisyon i prevwar ki okenn dimoun ki'n ganny war akize pour okenn krim kelkonk, ki i annan en *right to a fair trial*. I *presumed innocent until proven guilty*.

E Konstitisyon i prevwar tou bann mezir ki bezwen ganny fer pou protez *both* sa dimoun e sa dimoun ki'n ganny *aggrieved*. Me ki pe arive dan bann deba aprezan, nou annan en problem ki pe devlope Mr Speaker.

Premyerman, lo en kote nou ti ganny dir par Mr Green - ki i ti konfirman avèk nou isi dan Lasanble, i lo *verbatim* – ki dan lalis *perpetrators* ki in donn ek Prezidan, zot in gard li konfidansyel. Akoz sa lalis pou al kot *Attorney Zeneral* pou anmenn rekour legal lo sa size. Me pa...

(Interruption)

MR SPEAKER

Silvouple, lord. Wi?

HON SEBASTIEN PILLAY

Mersi Mr Speaker. Me par kont, Manm pe fer referans avèk sa ki dan rapor. Prezan kestyon ki'n souleve – akoz yer i annan non endividi ki'n ganny nonmen.

E sa bann endividi, eski zot pou ekrir en Drwa Repons - ki i pa en Drwa Repons ki zot pou kapab ekrir, akoz i pou difisil pou zot ekrir en Drwa Repons.

Akoz *it will be an admission* ki zot non ki'n ganny nonmen. Oubyen eski ou koman Speaker, ou pou regard sa ki Konstitisyon i dir lo la?

Nou a note Mr Speaker, nou fek fer en *Symposium* lo ki mannyer nou protez e nou valoriz Konstitisyon pour nou fer li marse.

E ou ava dakor avèk mwan poudir si en dimoun

pa'n demann *amnesty*, savedir i pe konteste son kilpabilite an relasyon avèk sa ki *TRNUC* in war.

E dayer *TRNUC* i pa koz lo kilpabilite, me i koz lo *truth*. *This is not an admission of guilt, it's the truth. It's about truth*. Nou dan en problem.

So mon ti a kontan ganny ou gidans ki mannyer nou pou prosede lo sa zafer nonm non dimoun ki ganny trouve dan rapor - Ki pa ankor ganny trouve koupab devan en Lakour, ki ankor *still* annan zot drwa?

Akoz *following* sa *process* ki pou al devan *Attorney Zeneral* anba Konstitisyon, *unless* nou pou dir pou dir sa bann dimoun, Konstitisyon pou ganny met akote e zot, zot pou ganny zize lo en lot *premiss*. *All I'm saying* i koumsa. So, vwala mon pwen devan ou.

MR SPEAKER

Ok. Mersi. Mon'n ekout ou pwen. Mon'n ekout ou pwen. Lo sa pwen ki annan relasyon avèk deba ki nou pe fer, mon pe dir bann Manm zot bezwen – si zot nonm en non kot rapor *TRNUC*, pou etabli relevans sa pwen. E pa fer alegasyon an deor ki pa ganny mete dan en determinasyon *TRNUC*.

Sa i pou en pwen difisil, akoz mon pa konn tou non ki dan *TRNUC*. Me selman Manm

i annan responsabilite pou obzerv sa. E si apre sa, en dimoun ki'n ganny nonmen i demann en Drwa Repons, nou pou bezwen pran sa.

Sorry, mon pa kapab pran en deba kontinyel ladan. Nou pou prosede. Nou pa kapab pran en deba kontinyel ladan. Nou pou prosede avek...

Mon annan 2 demann pou soz lo la, mon pa pe rekonnet. Nou pe prosede avek deba, e mon annan lo lalis entervansyon en Manm Lopozisyon. Onorab Aglae ou annan laparol.

HON EGBERT AGLAE

Mersi Mr Speaker. Mon fer sir ki mon pou obzerv ou bann *ruling*. Mon a dir bonzour tou Manm Onorab. Bonzour tou dimoun a lekout.

Mr Speaker, avan mon komanse, mon ti a kontan pas mon sener kondoleans avek lafanmir Germain Port Glaud, ki'n perdi enn zot papa, zot tonton, en frer...

Mr Arnold Germain ki'n travay koman son karyer dan Lafors Lapolis plis ki 40an. E se avek sa ki lo non zabitan Port Glaud nou pas nou sener kondoleans avek lafanmir.

Mr Speaker, size ki la devan nou i pa – pou mwan i pa en size de nouvo ki nou pe koz lo la. I fer mwan rapel an

Novanm 2016, letan ki bann prosedir pou etabli sa Komisyon Laverite Rekonsilyasyon e Linite Nasyonal ti konmanse dan 6enm Lasanble.

E ki mwan mon ti form parti sa Lasanble avek mon bann koleg isi lo sa kote latab. E i annan ki pa ti la. Parey lot kote osi, menm zafer.

I en letap ankor – mon krwar i enportan ki nou sezi li byen, lo konteks e larealite ki travay ki sa Komisyon in antreprann. Byensir pa tou ki'n al sitan byen, parey nou ti a swete.

Me selman la realite se ki nou'n deklans en prosesis. Nou bezwen war li pe bouze. E nou a bezwen war li annan en lafen osi.

Pour mwan Mr Speaker, letan mon ti pe koz lo sa Mosyon, 6enm Lasanble, mon enn ki ti pe war mwan – atraver *Right of Reply*, pou sey – pou demann en serten leskiz pour serten parol ki mon ti dir lo sa size.

E mwan Mr Speaker, avek sa grander lespri ki mon annan dan sa 7enm Lasanble, mon'n osi asize fer serten resers lo konteks sa rapor li menm - e bann levennman ki'n deklanse apre koudeta 77.

E ladan Mr Speaker, mon le dir ki i regretab letan mon'n ekout bann bokou entervenans - sirtou lo lot kote latab...ki'n

sey servi ankor sa prosesis ki nou ladan ozordi, pou fer bann lavansman politik, partizan.

Parey ti ganny dir; zot servi *TRNUC* koman en seval batay politik pour zot ranport sa eleksyon ki zot ti ganny 2020.

E pou mwan i sagrinan ki la ozordi 2023, bokou ki'n entervenir – bann ki ti la, zot vin repet menm *speech* ki zot ti fer Novanm, 2016 lo sa size.

E osi pa bliye, detrwa semenn pase a en mwan pase, ti annan en Mosyon devan sa Lasanble kot zot osi zot in tret menm size, dan sa menm fason.

Sete pou fer politik pou denigre Parti *US/SPUP/SPPF/Lepep*. Me san ki nou realiz osi bann konteks ki ti egziste a sa moman letan.

Mon pa ti ankor ne ‘77 Mr Speaker. 3an apre, 80 ki mon ti ganny mon nesans. E mwan mon pa kapab dir; sa ti pas koumsa, sa ti pas koumsa.

E nou annan en rapor devan nou ki bann diferan lenstans bann endividi in vini, in koz lo sa ki ti arive plis ki 43an pase. E Komisyon li menm li in dir ou i pa posibil pou ganny 100poursan laverite dan sa rapor.

Ki fer ki i annan en *margin of error* ki egziste dan sa rapor - petet aköz serten

ki'n vini in dir, e nou pa'n ganny sa lot versyon. Parey tou zistwar, i annan 2 fas.

E pandan sa 2 zour, mon'n ekout lo kote *LDS* kot zot in anmenn en latak asarnen lo en sel endividi - sa se France Albert Rene. Wi, i ti form par sa levennman.

Me osi, apre sa levennman, i annan bann diferan lenstans osi ki i pa neserman form par ladan, ki zot in esey *pin* lo li. E dan sa bann rapor i annan tousala. *TRNUC* ti pas *live*.

Mr Speaker, mwan mon pou dir ki dan en fason, i regretab ki dan listwar en pei bann lensidans parey i arive. Parey bokou pei pou ariv kot i ete, in pas dan en peryod listwar nou kapab dir ki in difisil.

Plizyer pei. Langleter in pas ladan. Lanmerik in pas ladan. *La France* in pas ladan. Lenn in pas ladan. I bann peryod listwar ki difisil.

E pour mwan, mon pa la pou vin ziz personn mwan. Aköz Bondye i dir dan *Romans* Sapit 12; Pa zonm - pa bezwen vin rod revanz. Pardonnen e se *le maître*, se Bondye ki i annan sa dernyen mo lo nou aksyon ki nou, nou fer konman *être* imen lo sa later.

E mwan mon swiv sa prensip mwan. Mon pa vin rod revanz. Mon pa vin montre ledwa lo personn.

E letan mon'n asize mon'n fer serten analiz, koz ek serten nou bann dimoun aze osi - Mon krwar i enportan ki i fer sa Mr Speaker - i fer mwan vwar poudir, letan levennman in arive, byensir i annan ki pa pou kontan. I normal sa dan natir imen.

I zis parey nou, letan nou'n perdi Eleksyon 2020, pa tou dimoun ki ti *happy*. Byensir, i annan en kote ki *happy*. *LDS* i *happy* in gannyen. *US* dan en fason, nou emosyonnel. Nou vin emosyonnel.

Napa okenn *US* avek sa sanzman ki ti arive 2020, in tyonbo okenn fizi, okenn gran koute, okenn zarm. Nou, nou'n les la demokrasi *take its course*. E se sa ki Prezidan Faure ti fer.

E letan mon ariv lo Prezidan Faure Mr Speaker - ki zot in servi li lot kote latab. Me mwan mon asire poudir si Prezidan Faure ti'n met son lentansyon, ti'n anons son lentansyon pou debout lo kote *US* pour 2025 - zot pa ti pou dir sa bann parol ki zot ti pe dir!

Zot pa ti pou fer li. Zot ti pou denigre sa msye! Zot ti pou pil lo li parey labitid. I montre ou poudir i annan en nivo lipokrizi.

Mon pou retourn ankor en pti gin dan listwar Mr Speaker, akoz mon krwar i

enportan. En kantite non dimoun pe ganny nonmen. Mon pa pou vin nonm non personn la mwan. Akoz i pa mon - mon pa Lakour mon pou vin ziz personn.

E parey *LOTO* in fer resorti - atraver ou Mr Speaker, Konstitisyon i fer kler poudir;

"You are innocent until proven guilty by a court of law." E ou annan en drwa pou ou annan en *due process to a fair trial*. E les lenstitisyon fer son travay ki i annan pou li fer.

En lot keksoz Mr Speaker, nou tann diferan versyon bann zistwar ki'n ganny akonte dan sa listwar ki nou pe koz lo la, la.

Mon pa pou dir pou dir Mr Rene ti en sen. Me osi mon pa kapab ziz li pou dir li, i ti en kriminel. Non, mon pa kapab fer sa. Mon pa konnen. Me selman dan nou sa peryod listwar ki nou pe koze, i annan diferan *attempt* lo lavi Mr Rene pandan sa parkour.

Wi i regretab ki in ganny pouvwar dan sa fason. Me selman dan sa parkour, nou'n tann nonm mersener, nou'n tann nonm rebelyon. E sa ki mwan mon'n aprann osi poudir; dan son prop kan, dan son prop Gouvernman ti annan bann lesey pou *overthrow* li. Wi Mr Speaker.

E mon'n dir boner poudir i annan ki pa ti kontan. I pou rod tou fason pou sey *overthrow* sa lensidans ki'n arive. Mon pa pe blanm personn la mwan. I natir imen sa. Si ou pa'n kontan en keksoz, ou rod fason pou ou sey *fight* kont sa keksoz.

Be dan sa prosesis ki zot ti pe sey anmennen pou fer - ou pa ekspekte li Mr Rene pou asize lebra krwaze, esper ou vini. I pou annan en reaksyon, akoz ou osi ou pe vin fer en aksyon. So, nou bezwen lozik dan sa lapros.

E mwan pour mwan, mon solider dan en fason. E mon partaz mon senpati e regre avek tou sa ki'n ganny afekte. Ki swa lo kote parti ki ti pe opoze. E osi i annan nou bann osi ki ti dan nou kote osi, dan en fason.

So, baze lo sa Mr Speaker, sa ki mon'n tande la sa 2 zour par *LDS* se zis, zot in koz lo sa porsyon ki swadizan zot pe dir i laverite – kan i pa *the absolute truth!* I annan serten mankman. I annan ki pa'n vin devan.

So, i kestyonn mwan lo serten rekomandasyon ki ganny fer dan sa rapor li menm li ki dir i pou depoz rapor. I ava annan en bout ladan ki dir i pou anmenn kot Ledikasyon pou enstri sa listwar.

Be i pa en listwar ki konplet. Ou pa kapab vin akont *half-truth*. I annan en bout ki manke! *This is where* mon problem dan mon analiz mon pe war keksoz.

Prezan Mr Speaker, mon pou tous en ekstre ki Prezidan Ramkalawan ozordi...ki i Prezidan ozordi – avek lentansyon kreasyon sa Komite dan Lasanble - 6enm Lasanble ki ti konpri;

Lo nou kote ti annan Onorab Basil Hoareau. Ti annan lo *LGB*, Onorab De Commarmond, apre ti annan Onorab Simon Gill. E lo kote *LDS* ti annan Mr Ramkalawan li menm, mon krwar ti annan Mr Ferrari, ti annan Onorab Adelaide si mon pa tronpe avek mon krwar Onorab Georges osi ti parmi.

E i ti dir dan son *verbatim*;

“E mon krwar Mr Speaker”...Mon pe *quote* la. “E mon krwar Mr Speaker ki nou bezwen mars dan direksyon laverite.

Nou bezwen kapab konn sa laverite pour ki nou ava kapab pran en desizyon konman en pep lo ki mannyer nou pou bouz devan. Ki mannyer nou pou bouz devan, e ki mannyer si fodre pey konpansasyon konman en pep.”

In dir konman en pep li. I pa'n dir konman *US*.

“Sa bann fanmir ki'n ganny afekte - bann dimoun ki'n ganny afekte si fodre nou demann pardon oubyen si serten dimoun ki pa pare, me ki ti *involved*, me ki pa pare pou vin devan – nou kapab fer sa lepa.

Ki kalite aksyon ki nou bezwen pou ganny pran avek zot, parski la nou bezwen mazine ki poudir nou dan en sityasyon kot ek bann gran prensip lazistis ki nou annan *restorative justice*. *Quote* – “Nou bi se pou anmenn gerizon pour sa pei”. Fen sitasyon, parti sa ekstre.

Bi, se pou konn laverite e pou anmenn rekonsilyasyon nasyonal, e pou anmenn linite nasyonal. I sagrinan poudir dan bann entervenans lo kote lot kote latab, person pa enterese ek rekonsilyasyon. Person pa enterese avek linite sa pep.

Sa ki zot enterese – e ki sa 2 entervenans prominan lo ou kote latab – atraver ou Mr Speaker, Onorab Georges e Onorab Henrie – se met tou blanm lo en parti politik ki dabor sa ki mwan mon konpran, en parti politik i konpri; son bann Manm, son bann aktivis, apre bann siporter dan en sans.

E bokou bann resortisan ki'n sorti dan rapor, ki nou apel bann *perpetrators* – pa ti neserman annan en lyen

direk ek sa parti politik. Ki dayer i annan ankor ki dan Gouvernman ozordi, i ankor pe travay. E taler mon pou tous sa size mwan.

Be ki pe arive? Akoz ki nou pa anvi koz lo rekonsilyasyon e linite nasyonal? Nou'n ekoute laverite nou, depi 2016 nou pe ekout laverite nou. Nou pe tann dir sa bann lensidans ki'n arive. Nou pa enterese ek rekonsilyasyon?

Mon krwar in ariv moman letan la. Koman en Lasanble nou annan en responsabilite edikatif anver sa pep nou osi. Pou geri sa pep. Ler ou dir detri *US*, pran tou sa ki i annan. Sezi tou son byen. Eski ou mazine poudir *US* ozordi ti annan li 28mil siporter, e la mon konnen in monte in ariv apepre en 30mil?

(laughter)

HON EGBERT AGLAE

E i pe kontinyen monte. Eski zot pa krwar sa poudir sa pe anmenn divizyon dan sa pei? Akoz ler zot ti fer zot kanpany “Sesel pour tou son zanfann” zot ti dir; “nou bezwen tir sa bann divizyon, ini sa pep.”

Be pa sa ki nou tande avek sa bann *Leaders* lot kote latab. Zot anvi kontinyen diviz sa pei. Ler ou vini ou dir nou poudir; fer tou sa bann

perpetrators pey
konpansasyon ouswa
reparasyon, bann ki'n ganny
afekte.

Ou pe kree serten
segregasyon la. I annan
perpetrators ki'n fini kit nou.
Petet ou pou al *down the line*,
the hills. I annan *perpetrators*
ki petet a sa moman, *as at now*
la, i napa naryen li. Ki ou pou
gannyen avek li?

Ki i fer ki, si mwan mon
perpetrators i annan larzan, si
demen zot vin avek zot Lalwa
ki zot lentansyon pe vini –
serten ava ganny en gro sonm
larzan, i annan pa pou
gannyen.

Prezan ou bezwen
mazinez osi. Pandan sa
peryod letan, sa ki zot pe *claim*
pou dir bann *perpetrators* pou
peye – zot bann *asset*. I annan
ki fanmir in agrandi. I annan
ki propriyete in agrandi.

I annan fanmir, pti
zanfan, desandans zenerasyon
ki'n batir - ki swa lakaz, ki swa
biznes, ou pou al pran tousala
ek zot ou? Eski ou pa pou al
kree en *chaos* dan sa pei? Kote
ou pou al met zot apre?

Ler ou'n pran tou zot
byen - i annan ki pa ti ankor
ne sa bann letan - ou pa pe
ouver lekor sa Gouvernman
avek en *major loss* ou, pou ou
vin pran sa byen? Akoz li i
kapab dir ou; be sa, mon'n
aste ek mon paran. Mon paran
ti vann mwan.

Konmsi avan nou vini
nou dir nenport kwa isi dan sa
Lasanble, reflesir son
reperkisyon ki atase avek sa
bann keksoz ki zot dir.

E se sa ki nou, nou krwar
pou dir pou evit sa ta *chaos*, se
Gouvernman – *the State*. Mon
pa pe dir Prezidan
Ramkalawan mwan. Mon pe
dir *the State*. Akoz dan rapor i
dir ou; *the State shall make*
provision for reparation.

Ki mannyer nou fer sa?
Sa i ava annan en diskisyon,
akoz zot pe kree en *successor*
body. Mon pa swete kree en
successor body pou al pini
dimoun mwan. Mon ti a swete
kree en *successor body* pou
nou kapab bouze. Annan sa
rekonsilyasyon. Annan sa
reparasyon. Annan sa linite
nasyonal.

Annou pa al servi sa
successor body pou nou kree,
pou li anmenn nou ziska 2025
pou zot ganny en *mileage*
politik pour eleksyon.

E mon pe met sa devan
pep Seselwa pour zot konpran
what is really going on ozordi
dan sa Lasanble. Kwa ki nou
pe diskite lo la. Ki bann
lenstans ki pou arive. Pou
annan Lalwa ki pou vini.

E nou, nou fer sir nou
pou bezwen regard tou sa
bann Lalwa ki pe vini, ki
anatase avek kreasyon sa
successor body. E bann metod
reparasyon ki pou vini.

E mwan ler mon'n get sa rapor Mr Speaker - *sorry* mon'n bezwen dir koumsa – se en rapor ki'n ganny ekrir par LDS. Mon pa war en Manm US lo TRNUC mwan, en. Mon pa konn zot afilyasyon politik.

(Interruption)

HON EGBERT AGLAE

Me selman. Sa prosesis – mon pa pe akiz personn mwan, me selman mon pe dir zot.

(Interruption)

HON EGBERT AGLAE

E letan mon la dan sa Lasanble Mr Speaker, mon'n war poudir – atraver ou - i annan bann diferan lenstans ki Onorab Georges in an kontak ek sa Komisyon. Li in dir nou ki i diskite. Be bann diferan lenstans nou pa la, nou pa konnen nou.

Eski sa pa en form kolizyon ki pe arive? En *Leader of Government Business*. En reprezantan LDS. Be si ti annan diskisyon pou ganny fer, pran tou lede parti, asize lo menm latib, annou koze. *This is what should be done*. Akoz ti konmans koumsa sa.

Ki mannyer dan semen apre, i vin en *one sided show*? Nou ti konmans ansanm nou. Koabitasyon. Be apre – bipartizan. Be apre i vin zis en

kote parti. Be ki ou ekspekte nou krwar? Nou pou asize nou pou dir tou keksoz i *ok*? Be non, pa mars koumsa sa.

Lot pwen ki mon anvi touse Mr Speaker, letan nou koz regard bann rekomandasyon, kot i konsern *justice*;

Komisyon i rekomande ki okenn *senior member* ki dan Gouvernman, ouswa dan Lafors Defans ki'n ganny vwar, ganny *deemed* koman en *perpetrator* - ki pa'n ganny *amnesty*, ouswa iminite pou prosekisyon; i dir ou sa dimoun napa drwa pe form par dan Gouvernman.

E i annan *mixed feelings* lo kote latib, lot kote LDS. I annan i dir wi i dakor ek sa. I annan i dir non i pa dakor ek sa. E nou nou'n ganny dir pou dir nou pa kapab amann okenn naryen dan sa rapor. Nou napa drwa fer naryen. E Speaker ou menm ou ou'n dir, ou pa kapab fer naryen. Ni tir en bout, ni azout en bout.

Be i kler ki lentansyon lot kote se, zot pou pran sa ki bon dan zot faver dan sa rapor, pran al enplimante. E sa ki pa dan zot faver dan sa rapor, pran zet dan *bin*. Zot pa le sa.

Nou'n *spend so many millions* lo sa Komisyon nou, pou kapab *come up* avek en rapor a lafen defen apre bann ekstansyon, ekstansyon ki nou'n donner.

So, si ozordi bann *perpetrators* ki plizyer ladan ti nou bann *ex supporter SPPF/SPUP/Lepep* ki'n al dan *LDS* - zot, zot a ganny bann proteksyon neserer aköz zot Gouvernman ki o pouvwar. Eski sa i apel *justice? Is it the real justice?* Pep Seselwa zize pour zot menm.

Lot pwen ankor dan rekomandasyon ki mon anvi touse, Mr Speaker...Wi Mr Speaker.

MR SPEAKER

29 minit. Ou ler pe terminen. Silvouple, prosed lo en konklizyon.

HON EGBERT AGLAE

Avan mon konklir mon pou koz lo *the guarantees of non-recurrence* ki dan rapor.

MR SPEAKER

Me, silvouple fer li dan en minit Onorab.

HON EGBERT AGLAE

Mr Speaker, mon pa'n konmans 9er mwan. Ou'n fer en bann...

MR SPEAKER

Onorab. Ou'n ganny – ou pe al ganny 30 minit. Sa ki mon dir ou. Konklir silvouple.

HON EGBERT AGLAE

Ok Mr Speaker. Mon ava *abide*...Pou konklir lo la Mr

Speaker, mon krwar nou'n ariv dan en sapit enportan. E bokou Seselwa pe ekout nou ozordi lo sa size.

Sa *attempt* pou detri nou parti – *United Seychelles*, pou pran tou nou bann byen. Pou pran tou...Akoz zot in seye depi 2020. Zot in sey blok partou kot nou ti ganny nou bann sours finansman. Zot in fer tou kalite. Zot pa'n reisi.

Wi nou ti afeblir. Be nou'n reganny nou souf. Nou bann siporter i realiz zot bann fot ki zot ti fer par swiv en parti ki'n zis bat zot latet!

E mwan ler mon ti lo laplenn Dimans, mon ti soke pou war serten bann dimoun ki'n vini in may mwan.

(laughter)

HON EGBERT AGLAE

I annan ki'n demann leskiz. I enportan pou nou note sa.

MR SPEAKER

Onorab, konklir silvouple.

HON EGBERT AGLAE

E nou Mr Speaker, nou le met lo rikord; *Sorry*, zot pa pou kapab detri *United Seychelles*.

(APPLAUSE)

HON EGBERT AGLAE

Sa 30mil dimoun ki deryer nou pou reste solider, e nou laport i ouver pou envit zot

ankor. Bann ki pe realize poudir zot in met zot lekore dan en pirog nanm - vini, nou pare. Nou pa pou rezet zot.

Avek sa mon pou dir ou mersi Mr Speaker, menm si letan pa permet pour mwan kontinyen koze. Me se laverite ki mon pe koze. Mon pa pe koz lalang mon. Mersi.

(APPLAUSE)

MR SPEAKER

Mersi. Mersi Onorab. Mon bezwen fer en remark lo – en remark ki Onorab Aglae in fer. Ler i dir sa rapor in ganny ekrir par LDS, i pe met an kestyon lendepandans TRNUC – ki i en keksoz ki mon pa anvi Lasanble i fer.

TRNUC in en Komisyon endepandan. Mon'n fer menm koreksyon lo serten kote. Mon ti a sizere – silvouple...Mon ti a sizere ki zot pa met an kestyon lendepandans TRNUC. Onorab Hoareau, ki ou pwen?

HON JOHN HOAREAU

Mr Speaker bonzour. Mon annan en *point of order* anba Order 8.

MR SPEAKER

Wi.

HON JOHN HOAREAU

Lo kote ou lotorite e mannyer *proceeding* i ganny fer. Mr Speaker bomaten en provizyon Konstitisyon in ganny lir par

LOTO, lo ki mannyer *proceeds* i ganny fer dan en *court of law*, me ki pa aplikab pour *proceeds* ki ganny fer isi dan Lasanble.

Mon le atir ou latansyon avek Lartik 102(1) dan nou Konstitisyon ki dir,

“There shall be freedom of speech and the debate - and debate in the National Assembly and the member shall not be subject to the jurisdiction of any court or any proceedings of whatsoever, other than in proceedings in the Assembly, when exercising their freedoms or performing the functions of a member in the Assembly”.

E

MR SPEAKER

Mersi.

HON JOHN HOAREAU

... mon pa le konnen, Mr Speaker, mon le konnen ki fason en dimoun pour zistifye en rekomandasyon si i pa fer referans avek serten ka? Par egzanp yer mon'n fer referans avek lenkonsistans ki i annan dan serten *case*, dan serten *findings* e pour sa mon'n dir, mon'n etabli ki fason en *successor body* i enportan pour kapab *take up* bann *issues*, ki annan bann lenkonsistans.

Aprè osi *proceedings* ki ganny fer par *Attorney*

Zeneral, si bann dimoun pa'n demann *amnesty*.

So mon krwar i en *matter of privilege* pour nou, si nou pa pe ganny - si nou drwa 102(1) pa pe ganny respekte, kot nou bezwen fer nou travay dapre rapor. E *substantiate* nou rapor - nou bann - sa ki nou dir par levidans ki annan dan rapor li menm. Mersi.

MR SPEAKER

Mersi. Evidaman, se sa le keston. Se ki referans ki Manm i fer, i fer li an referans avek sa ki dan rapor e i pa anmenn lezot alegasyon an deor. Sa i kler. Mersi. Nou a kontinyen avek –

HON SEBASTIEN PILLAY

(Off-Mic)

MR SPEAKER

Nou a kontinyen - *sorry!* Onorab Pillay mon'n donn ou laparol bomaten ou'n fer enn, nou pa pour kapab kontinyen annan *point of order*. Onorab Terence Mondon ou diskour.

(Interruption)

MR SPEAKER

Order! Onorab Terence. Onorab Terence Mondon i annan laparol.

HON TERENCE MONDON

Bonzour Mr Speaker. Bonzour tou koleg *MNAs*, e tou dimoun ki pe ekout nou. Mr Speaker...

HON SEBASTIEN PILLAY

(Off-Mic)

MR SPEAKER

Onorab Pillay ou a obzerv lord silvouple.

HON SEBASTIEN PILLAY

(Off-Mic)

MR SPEAKER

Onorab! Onorab Pillay, mon pe dir ou en dernyen fwa mon le ki ou obzerv lord. Onorab Mondon kontinyen.

HON TERENCE MONDON

Mersi Mr Speaker. Mr Speaker le 11 Oktob 2016, dan 6enm Lasanble koman en Manm proporsyonnel *LDS*, mon ti demann en leskiz avek pep Seselwa e vwala ki mon ti dir,

“Mon oule profite la, pou dir pardon pou bann desizyon ki mon konnen i pa ti zis. I annan konsekans ler nou fer desizyon baze lo sa pratik, “ek nou, pa ek nou.”

A lafen mon lentervansyon, mon ti osi dir,

“Ozordi mon fyer mon pe debout lo sa platform *LDS*, akoz mon'n realize ki mwan osi mon ti form parti en sistenm ki'n fer bokou ditor e nou osi nou bezwen onnet avek sa. Nou bezwen pare

pour nou korize kot keksoz i mal”.

Mr Speaker, ler mon ti zwenn *SPPF*, mon pa ti konn vre listwar sa parti. E ler mon ti realize ki zot ti pe abiz resours pep Seselwa, mon ti larg zot byen trankil.

(APPLAUSE)

HON TERENCE MONDON

Mr Speaker, lekel ki ti pou kapab mazine, ki en zour nou ti pou ariv kot nou ete ozordi. En zour kot laverite ti pou sorti e bann atosite lepase ti pou ganny devwale an piblik?

Si ozordi nou'n arive la, nou bezwen premyerman remersye pep Seselwa ki'n donn *LDS* en mazorite dan Lasanble Nasyonal apre Eleksyon 2016.

Se lafors *LDS* dan Lasanble Nasyonal ki ti permet nou annan en koabitasyon dan gouvrenans pei.

Dezyenmman, nou bezwen remersye le 2 *Leaders* politik sa letan ki konpri Prezidan Ramkalawan e ansyen Prezidan Danny Faure, pour zot kolaborasyon dan kreasyon Komisyon *TRNUC*.

Sa ki remarkab Mr Speaker, se grander lespri sa 2 *Leaders* lo bann size nasyonal. I kler ki tou lede ti konpran ki Sesel i pli gran ki nou tou. Sa lespri kolaborasyon ki nou ti

komans avek, ki'n fer nou ariv kot nou ete ozordi.

Malerezman, nou pa pe vwar sa grander lespri dan nouvo *leadership* *US*. Largiman ki *US* pe met devan, i fer mwan realize ki sa parti i krwar ki zot, zot pli gran ki Sesel. Nou pe vwar menm latitud, konportman e langaz lepase dan tou sa ki zot fer.

Avek tou respe ki mon annan pou mon bann koleg lo lot kote latab, mon bezwen dir ki se zot *Leader* ki pe fer zot - pe fer disparet zot parti. Mon enplor zot pou sorti dan *self-destruction mode* e redonn valer zot legzistans koman en - sa dezyenm parti dan pei omwen pour le moman.

Wi Mr Speaker, Sesel i bezwen tou son zanfand dan sa dezyenm letap pou realiz sa proses rekonsilyasyon. I enportan pour nou fer sa traze ansanm, afen ki nou koriz lenzistis lepase pou byennet nou sosyete.

Mr Speaker, rapor ki devan nou Lasanble i rezilta en travay entans ki *TRNUC* in fer pou etabli laverite dan tou bann ka ki'n ganny prezante devan Konmisyen. Mon salye kouraz bann viktim ki'n kapab asiz fas-a-fas avek zot *perpetuators*, pour esey konpran ki'n arive avek enn zot pros.

Atraver bann sesyon, nou'n osi vwar bann moman

eksepsyonnel, kot viktim in aksepte pardon zot *perpetuators*. Sa i montre nou ki rekonsilyasyon i en keksoz ki posib dan nou pti pei.

Mr Speaker, an mezir ki nou met an valer laverite nou pe osi redefinir nou sosyete. Sa ki nou pep i bezwen rekonsilye i bokou. Sa ki nou'n aprann atraver sesyon *TRNUC*, i fer mwan konpran ki mannyer listwar nou nasyon in ganny manipile, kot laverite in ganny kasyet an konsekans, lavi bokou fanmir in ganny boulderse atraver menas, persekisyon, labi, viktimizasyon e disparisyon.

Mr Speaker, i enportan pou nou konpran ki rekonsilyasyon pa vedir ki nou bezwen oubliy sa ki'n pase. I pa vedir elimin tou sa soufrans ki nou frer e ser in pas atraver pou plizyer deseni. Rekonsilyasyon i senpleman vedir pardonnen e bouz an avan. I vedir konstrir lo lepase pou kree en meyer demen.

Nou tou nou annan sa responsabilite pou fer sa proses rekonsilyasyon vin en realite. Mon konsyan ki sa, pou osi depan lo nivo langazman ki bann antite konsernen i mete dan lenplimantasyon bann rekomandasyon ki dan rapor *TRNUC*.

Fodre ki sakenn de nou, koman fanmir, paran, edikater

e kominote, i fer plis pou develop bon konprezon parmi nou popilasyon.

Rekonsilyasyon i bezwen komans avek nou menm, nou latitid e konportman anver lezot, menm si nou bezwen fer sa pa par pa. Mon konsyan ki sa traze i pa enn ki fasil, me mon reste konvenki ki lanmour imen i bokou pli for ki tou.

Alor, mon demann tou parti prenan pou les zot ganny gide par sa lanmour ki fer nou imen apre tou.

Mr Speaker, moman in arive pou nou vir sa paz nou listwar e komans ekrir en nouvo sapit pou rekonsilyasyon. Travay *TRNUC* i donn nou plizyer rekomandasyon e la, mon oule abord sa bann pwen swivan:-

Rekomandasyon pou en pardon Leta;

Mr Speaker, i enportan pou Prezidan Larepublik fer sa pardon lo non-Leta Sesel a en moman apropiye. Mon vwar sa – mon vwar sa koman en siny senbolik ki avar demar sa proses rekonsilyasyon.

Mr Speaker, i pa akseptab ki *Leaders Parti US* i ankor pe refize demann en pardon. *US* i sa menm parti ki ti o-pouvwar ler tou sa bann atosite ti ganny komet e Seselwa pe note.

Lo sa note, mon pou dir mersi ansyen Prezidan Faure

pour rekonnèt ki bokou Seselwa in soufer anba ansyen rezim. Wi Mr Speaker, en *Leader* i bezwen kapab dir pardon e nou pep i apresye sa.

Rekomandasyon pou annan en antite pou konplet travay sa Komisyon;

Mr Speaker, i kler ki nou pou bezwen en striktir oubyen en antite, pou sirvey e siport lenplimantasyon bann rekomandasyon *TRNUC*. Mon swete ki sa i ganny fer o pli vit posib e provizyon nesese i ganny fer dan Bidze 2024.

Konpansasyon;

Mr Speaker, koman *Leaders* nou bezwen diriz nou pep avek lentegrite e met moralite avan popilarite. Seselwa i apresye laverite. Laverite se ki sa menm parti ki responsab pou bann atosite, i osi abiz lo resours nou pep. Tou bann morso later Leta ki zot in pran ki ozordi zot pe vann trankilman pou plizyer milyon. Ozordi, *US* i sot anler nou dir zot, zot devret pran responsabilite pour zot aksyon.

Me sa bann byen Leta ki zot pe rezouir i devret retourn dan kof Leta. Zot devret vin sa sours finansman pour bann viktim.

Anliny avek rekomandasyon *TRNUC*, ki demande ki *ACCS* i fer lenvestigasyon lo serten ka alegasyon koripsyon, mon

toutafe dakor avek sa rekomandasyon e okenn larzan ki ganny rekipere i kapab ganny servi pou siport bann viktim.

Mr Speaker, mon realize ki pou pran letan pou sonny blesir lepase, alor mon siport propozisyon pou dedye en zour memoryal pou selebre nou progre koman en nasyon rekonsilye.

I enportan pou nou kapab mezir progre ki nou fer ansanm koman en nasyon, en levennman parey, i ava fer nou rapel listwar nou pase, i pour osi en lokasyon spesyal pou renouvle nou langazman e asir nou pep ki bann atosite lepase pa zanmen ganny repete dan nou pei.

Mr Speaker, fodre ki lazenes Seselwa i sezir sa moman istorik, pou konn vre listwar nou pei. I enportan pou zot konn konteni sa rapor. I pour osi enportan ki nou fitir zenerasyon i kapab zwe en rol aktiv dan sa prosesis rekonsilyasyon.

Mr Speaker, Komisyon *TRNUC* in rekomande ki sa rapor i form par *curriculum* lekol e ki Minister Ledikasyon i osi adapte konponan drwa imen, pour zanfan konpran byen sa size. I enportan pou ranforsi laprantisaz a tou nivo skoler lo sa size.

Mr Speaker, fodre ki vyolasyon drwa imen i reste en

keksoz le pase. Pour asire ki labi drwa imen pa ganny repete, i pour enportan ki bann konportman e aksyon kont drwa imen, pa ganny soutire, peze oubyen rasyonnalite. Bann tel aksyon i devret kontinyen ganny ekspoze atraver platform medya sosyal, pou tou dimoun trouve. Mon ankouraze vwar ki nou pe vin en sosyete ki debout for pou drwa imen ek lazistis.

Rol Ombudsman:

Mr Speaker, i annan en nesosite pou ranforsi nou bann lenstitisyon demokratik pour mentenir bon gouvrenans dan nou pei. Alor, mon siport rekomandasyon *TRNUC* pour ranforsi rol *Ombudsman* e sa enkli lenplimantasyon rekomandasyon sorti kot sa lofis.

Dan menm konteks, i annan en nesosite pou ranforsi nou sistenm gouvrenans kot Lezislativ e Zidisyer i ganny menm lenportans ki Egzekitiv, koman pilye nou demokrasi modern. En size ki nou Lasanble an kolaborasyon avek Zidisyer ti diskite Zedi pase, dan en senpozyonm pou komemor trantyenm laniverser nou lenstitisyon.

Mr Speaker, linite i en eleman enportan dan en sosyete e parey nou kontan dir

lafors i mars avek linite. Si nou oule en sosyete ki for nou bezwen linite. I annan en kantite legzanp kot linite in fer en diferans pozitiv pou nou pep.

Isi menm dan sa Lasanble, mon mazin tre byen ler *SNP* sa letan, ti donn tou sipor Plan Reform Ekonomik 2010 anba *IMF* e sa ti ede tir nou pei dan en kriz ekonomik e finansyel.

Ozordi malerezman, tro souvan nou vwar nou Lasanble pe lager lo bann pti keksoz ki pa sitan enportan. Mr Speaker, i enportan ki nou regard sa size rekonsilyasyon dan en splander nasyonal e apresye benefis ki pou anmennen pou fitir zenerasyon.

Mr Speaker, i vremen tris ki serten latitid pa sanze dan nou sosyete. Me, mon ankouraze kantmenm, ki sa pti group dimoun pa pe ganny senpati nou sosyete an zeneral.

Parey *US* i kontan dir, zot in fer bokou pour Sesel dan sa 43 an. Wi me zot ti'n kapab fer bokou plis si zot pa ti'n abiz lo resours Leta. Nou bezwen osi rapel *US* ki zot in fer otan ditor pandan sa letan e laprev i dan sa Rapor *TRNUC*.

Mr Speaker, ler en dimoun i fer sa ki byen nou dir felisitasyon. E ler sa dimoun i fer keksoz mal, nou dir li ou'n

fer mal, e nou pa kapab kontinyen felisit li konmsi naryen pann arive. I pa normal sa! I enportan ki nou fer sa distenksyon ant sa ki byen ek sa ki mal. Avek sa kalite panse, i pa drol ki bokou dimoun in deza dezasosye avek sa parti.

Mr Speaker, pour konklir, pa bezwen nou met nou dan soulye bann fanmir ki viktim anba ansyen rezim, pour nou kapab konpran zot soufrans. Napa personn ki ti pour anvi ki enn zot manm fanmir i pas dan menm sityasyon.

Seselwa in swazir lape, Seselwa pa anvi ki nou reste divize koman en nasyon. Moman in arive pou ranvers soufrans sa bann dimoun e redonn zot lespwar pou en meyer sosyete. Wi, nou sorti lwen koman en nasyon, me nou konpasyon imen in gard nou ansanm.

Malgre tou sa ki'n pase, Seselwa i reste en nasyon for e rezilyan. Travay *TRNUC* in prezant nou avek en nouvo loportinite pou konstrir nou pei lo keksoz ki ini nou ansanm. Nou fitir zenerasyon pe depan lo nou sazes e grander lespri pou fer sa ki meyer pou Sesel.

Alor, annou travay ansanm koman en nasyon, annou travay dir avek dedikasyon pour kree sa Sesel

kot i ava annan lape, lanmour e prosperite.

Finalman Mr Speaker, mon oule remersye *TRNUC* son *Chairperson*, *Vice-Chair*, tou manm Konmisyon e zot lekip sipor pou sa travay enorm ki zot antreprann pour Sesel. Mon konnen ki zot travay pou reste en memwar vivan lo listwar nou pei pou fitir zenerasyon. Mon remersi ou Mr Speaker.

MR SPEAKER

Mersi Onorab. Mon a donn laparol Onorab Francois Adelaide.

HON FRANCOIS ADELAIDE

Mersi Mr Speaker. Bonzour Mr Speaker. Bonzour tou Manm Onorab e tou Seselwa a lekout. Mr Speaker ozordi mon pe ganny demande pour fer en deliberasyon lo en rapor, ki anmezir ti pe ganny dokimante in sirman sok laplipar Seselwa isi Sesel, menm aletranze. In osi sok bokou etranze ki anliny-en avek nou zoli pei Sesel.

Sa pti Sesel kot son sirfas later i vremen pti kot tou dimoun i preski konn kanmarad mannyer nou pti, mannyer nou konekte, mannyer nou viv ti devret en legzanp pour bokou pei *au monde*.

Kot lakseptans e lapartenans, respe e

latolerans ti'n devret bann zouti ki ti pour ed nou koman en nasyon bouz devan ver vre sikse, lepanouisman e prosperite.

Mr Speaker, nou'n aprann ki ver lannen 1960 an montan, sityasyon politik Sesel ti komans sofe, byensir ant de parti an partikilye *SDP* e sa *SIUP* sa letan, apre ki ti vin *SPUP*.

An 1976 presizeman le 29 Zen Sesel ti ganny son lendepandans kot *Leader* Parti Demokratik ti vin Prezidan e Mr Rene ti vin koman son segon. Avek bi pour sey inifye sa pep, sa de parti ti deside sey montre ki zot kapab travay ansanm. Me paret mwan ki lanbisyon enn parmi sa de *Leaders* ti pli for ki lot.

Bann biznes ti kontinyen --kontinyelman progrese, touris ti pe kontinyelman rantre Sesel, bann aktivite ekonomik ti kontinyen e byensir Sesel ti lo en bon semen progre. E dapre konpran, Gouvernman sa letan ti pe kontinyen anmenn bann servis e fasilite pour amelyor sityasyon lavi dan Sesel.

Dapre tande mannyer Sesel ti a pe fer progre sa konbinasyon ant Mancham ek Rene ti pe mars byen. E byensir Seselwa ti pe benefisyé. Seselwa ti pe ganny anploye partou kote. Bann

zelev ti pe ganny plis loportinite pour al lekol, Seselwa ti a pe devlope dan domenn spor e fer fraka dan larezyon.

Landrwa divertisman lo Mahé tro bokou. I kler ki Sesel ti a per devlope e Seselwa ti annan sa lazwa de viv, aköz dousman, dousman kapital ti pe antre e Sesel ti pe devlope. Malgre sikse, tou dimoun ki annan lanbisyon pour fer keksoz i rod diferan fason, ouswa diferan rezon pour li akonplir son bi. E Mr Rene petet ti panse i ti kapab fer pli byen, e anmenn plis devlopman alor plan koudeta ti entansifye.

Lentelizans ti pe rantre ki ti annan en demars par enn pti group ki anvi *overthrow* sa rezim e sanz lafason ki Sesel i ganny dirize. Me a sak repriz sa bann lentelizans ti tonm dan bann zorey sourd. E vwala dan lannwit le 4 Zen 1977 en group arme anba komann Mr Rene, ti mont en loperasyon militer e ranvers ladministrasyon Mr Mancham apre ki Prezidan sa letan ti lo en vizit aletranze.

Akoz ki tou latansyon pe ganny mete lo koudeta? Rezon i tre senp. Aköz se sa levennman ki'n provok tou sa bann lezot keksoz arive.

Si ti napa koudeta, ti pour napa mannev pour anmenn mersener e byensir

petet David Antat – defen David Antat ti a kapab ankor vivan ozordi.

Si ti napa koudeta ti pour napa lanmor ki ti pour relye ek le 4 e le 5 Zen 1977.

Si ti napa koudeta, nou pa ti pour la ozordi pe diskite sa rapor, si ti napa koudeta ti pour napa tou sa bann rekomandasyon ki nou pe diskite.

Si ti napa koudeta ozordi dan Sesel, nou ti pour ankor annan sa lazwa de viv, ki tou kou nou tann zis koz lo la.

Mr Speaker, i enportan, mon senserman krwar nou ti pour pli dan bon, akoz nou ti pour annan tou nou bann lenstitisyon for avek nou lafors imen byen kalib. Sa koudeta in sirman fer nou perdi bokou bann dimoun kalib ki ti pour sirman elev stati nou pei. Mon zis anvi met keksoz lo son vre -dan son vre konteks.

Si i ti napa koudeta ti pour napa tou sa bann konsekans.

Mr Speaker, sa byensir ti ganny konsidere koman en akt traizon e byensir Mr Rene si ti ganny arete i ti pour bezwen sibir konsekans, me sa boug ti'n fini annan son plan tre byen kalkile. E i ti pour bezwen egzekit son bann plan avek bokou swen si i ti anvi gard pouvwar dan son lanmen.

Byensir avek en lemonn ki tre ouver e Sesel ki ganny antoure par en gran lespas maritim, kot ti napa ase resours pour sipervize, sa ti vin en lot defi pour Mr Rene.

Son latas imedya se kree en Lafors Larme ki ava kapab donn li tou proteksyon lo later, an mezir ki i rod sipor avek son bann alye enternasyonal pour anpes okenn lagresyon eksteryer.

Sa ti zis en problem! Me nou tou nou konnen ki Sesel ti annan bokou dimoun ki pa ti – ki ti siport Parti Demokratik e avek en tel lespri pour fer koudeta byensir pa tou dimoun ki ti aprouve.

Ti annan bann ki ti oule ranvers sa desizyon. Bokou bann sitwayen ki ti azour avek Lalwa pa ti pe aksepte sa tranzisyon fasilman. Bokou Seselwa ki pa ti apiy Parti SPUP sirtou bann biznessmenn, ti vin en target direk akoz petet Mr Rene ti panse ki zot kapab met resours ansanm e ranvers sa koudeta.

Bokou Seselwa osi ki ti vokal e pa siport sistenm ti pour bezwen ganny teorize pour siprim zot panse, akoz sa osi ti kapab kree en lanvironnman ostil ki ti pour provok sityasyon protestasyon.

Desperate times come desperate measures e nou tou

nou konnen, ki ler ou per ou fer tou bann keksoz abnormal ki en dimoun normal pa decide fer. E sa ki'n pase Sesel apre sa koudeta, i zisteman souliny degre lafreyer ki ti annan dan sa groupman e se pour sa rezon ki ozordi nou pe diskite sa rapor; avek lespwar ki sa bann keksoz ki'n arive dan sa pti pei depi sa lepok zanmen, e zanmen i ariv ankor avek okenn sitwayen e okenn *être* imen lo sa later.

Dan sa rapor ki nou'n ganny sans lir, i rasker pour aprann ki kantite kriyote ki'n pase dan nou pti pei. I fermal pour asimile ki mannyer nou bann frer ser Seselwa, in ganny masakre, torture zis akoz zot konviksyon politik.

I rasker pour nou aprann lo ki mannyer nou bann Seselwa zanmi etranze menm ganny pwannarde, trangle, brile, fiziye, menm ganny martirize, zis parey en zannimo dan labatwar, akoz zot pwennvi politik.

I sagrinan pour aprann ki mannyer bann sitwayen ki ti ganny targete ti pas sitan martir, ganny deprive zot drwa fondamantal, zot bann drwa sivik, bann drwa ekonomik ek sosyal.

I osi degoutan pour aprann ki mannyer ou prop pepe ti bezwen sibir bann tel aksyon, ki abiz zot dinyite koman imen e sitwayen sa pei!

Mr Speaker, ler mon lo sa size, byensir i pa bann keksoz ki fer mwan plezir pour koz lo la. I plito sagrin mwan e bles bokou leker. Anmezir mon pe koze ankor mon santiman i dir mwan ki mon pe kapab ouver bann boubou ki petet ti'n komans ganny geri.

Mon pe bles bann leker ki apre bokou lannen ki'n kapab retrouv son ritm lazwa. Mon osi konnen ki mon pe kapab andirsi serten leker ki ti'n petet bliy bokou bann move memwar, akoz zot pa'n zanmen ganny demann en leskiz, kan tou ti kler pour zot lo tou sa bann kalite kalamite ki'n arive avek zot pros.

Set avek bokou kouraz, bokou persyasyon avek mon lekor, ki mon pour bezwen fer zistis mon bann zanmi fidel ki'n pas atraver sa tel leksperyans. Sa bann Seselwa ki'n kontinyen swazir plito lanmor dan plas viv dan en lavi lesklavaz; sa bann Seselwa ki'n zanmen in les later sirmont zot lanvi pour redonn Sesel e Seselwa zot vre lespwar e lazwa de viv; sa bann sitwayen ki ti azir toultan brav ki ti krwar dan laliberte e respe lavwa sa pep, menm dan sa bann letan kritik, difisil e enkyetan.

Mr Speaker, mon pa pour kapab azir koman en kapon! Menm avek bokou santiman profon ler mon ti ekout bann

sesyon, pas lo bann rapor, mon konvenki ki sa latas i enn ki vo lapenn. E mon devret apiye pour ki zot konn tou laverite posibil; aksepte ki keksoz in pas koumsa, siport zot dan zot bann demars pour ganny sa vre rekonsilyasyon, ki ava anmenn sa vre linite nasyonal pour tou nou sitwayen.

Mon konnen i pli fasil koze ki pour sa arive, me toudmenm mon annan lespwar e konviksyon aköz mon konnen ki sa Gouvernman dizour i serye. E nou lanvi se anmenn sa pep lo en nivo kot respe e latolerans, lapartenans e bann prensip lavi i kontinyen ganny manifeste parmi nou pep.

Mr Speaker, koman en Manm Lasanble, i enportan ki nou donn legzanp si nou anvi ki sa pep i viv dan linite. Atraver sa legzersis, i egzize ki nou mesaz ki nou anvoy-e i kler, senser e serye.

Menm ki se pa nou ki responsab, i tre enportan ki nou rekonnèt tou sa bann keksoz mal ki'n arive dan nou pei, avek nou bann frer e ser Seselwa.

E nou koman en striktir Leta, nou devret san okenn dele demann en pardon senser avek tou dimoun ki'n ganny afekte, e liber sa bann nanm ki ankor sagren pour al ver zot lot demer.

Mr Speaker, mon anvi osi fer remarke ki napa okenn moman ler mon ti pe ekri mon ladres ki mon ti ziz person. Napa person ki parfe dan sa lemond, me nou tou nou annan nou prop lentelizans. Nou tou lo sa later nou ganny mete pour en bi. Parfwa nou fer gran semen, parfwa nou fer pti semen pour ariv kot nou sipoze arive.

E i annan ki pa swazir ni gran semen, ni pti semen, me i ariv menm avan nou. Tousala i montre nou ki i *être* imen, i bann keksoz ki doue. Etan ki imen i reste imen tou i posibil e fodre zanmen nou zalou sans nou prosen.

I pa pour normal pour mwan dir ki Mr Rene pa'n fer nanryen pour Sesel. I pa realis pour mwan fer krwar ki depi 1977 napa bokou keksoz ki'n arive Sesel. Me lafason ki serten keksoz in ganny fer i pa akseptab!

Ki mannyer serten nou bann dimoun in ganny trete i pa akseptab! I pa normal pour egzekt en ou frer ou en ser aköz son lapartenans politik! I pa akseptab pour ou fer sa bann atosite avek ou pep zis aköz i pa siport ou ideoloji! I pa normal pour asasin en Seselwa aköz i pli devan ki ou dan lavi! I pa akseptab pour ferm okenn letablisman, aköz zis en serten groupman ki pli eze ki ou ki frekante.

I pa akseptab pour ou viktim ou prosen akoz ou anvi, ou anvi fer ou lennmi soufer. I pa normal pour mertri ou pep akoz zot pa krwar dan ou bann prensip diktater. Mon pa pour aksepte sa bann tel tretman e mon denons sa bann fason fer ki Mr Rene avek son bann akonplis ti fer, e mon dir i mal!

I pa akseptab ki nou tann nonm non-Mr Michel koman en akonplis dan lanmor Mr Monnaie. Larzan *taxpayers* ankor pe pey li e koman en ansyen Prezidan mon krwar i devret kapab demann pardon par sa fanmir, e ede pour re-anmenn rekonsilyasyon nasyonal pour nou pep.

A lokazyon trantyenm laniverser nou Konstitisyon, vi ki sa parkour pour rod laverite rekonsilyasyon e linite nasyonal ti komans kot sa Lasanble eski i pa ti ava en bon komansman avek en sel lavwa, avek en sel mesaz, vi ki nou se nou ki bann reprezantan Lepep pour demann en leskiz senser tou dimoun ki'n ganny afekte, e donn zot lasirans ki zanmen en keksoz koumsa sipoze arive i ganny repete dan nou pei.

Fodre napa okenn leskiz ki pour donner ler nou anvi sa ki byen. Fodre napa okenn laprid ler nou vreman anvi geri sa pep. Fodre napa okenn mannigans si vreman nou koman bann serviter Lepep ki

anvi vwar linite nasyonal nou - pour nou pep ki pa ti merit ganny sa bann tel tretman.

Dan bann deliberasyon depi Merkredi, mon pe atann detrwa largiman, ki bann Manm Parti Lepep pe dir, Parti US pe dir, ki zot napa nanryen pou fer avek sa bann atosite ki dan sa rapor.

Avek sa bann tel rezon mon konvenki, ki sa i zis bann leskiz akoz mon konnen ki zot pa ni fou, zot pa ni fol. Zot tou zot konnen ki zot afilyasyon i direkteman avek levennman koudeta.

Mr Speaker, Sesel i en pei beni, nou'n ganny mete pour viv dan en paradi teres. Akoz ki nou bezwen kontinyen andoktrin nou pep pour anpes zot vwar vre delivrans?

Mon bann koleg ki lot kote latap, ozordi mon panse ki nou kapab fer sa diferans, annou retrouv nou liminite, napa nanryen mal pour aksepte e debout akote bann frer ek ser ki feb.

Siport zot e ed zot demann en senser leskiz, nou pa pour reste dan Lasanble Nasyonal pour larestan nou lavi, apre nou manda nou pour bezwen retourn dan lakominote, nou pour kontinyelman zwenn sa bann dimoun ki'n pas dan tou sa bann soufrans, ki mannyer ou pour kapab annan lape lespri, ler ou pour mazine ki ti ou

annan sa sans remet souriy lo figir sa bann dimoun me ou pa'n oze fer li akoz ou parti pa pour toler ou.

Mazinen ler ou pa en Onorab lavi pa pour parey silvouple profite fer sa diferans, fer sa diferans letan ki ou ankor kapab. Mon konsey pour zot se tir sa fardo lo zot silvouple. Mr Rene in kit sa later, nou pour bezwen deboury nou prop zafer nou menm.

Praise Mr Rene depi bomaten ziska aswar pa pour ed nou, e la si mon ti kapab modifiye sa rapor mon ti pour demande ki bann zanfan e fanmir Mr Rene, pour donn en lord pour les nanm Mr Rene repoz an pe. Se pa Mr Rene ki anvi vin Prezidan *US 2025*, se Dokter Herminie ki'n propoz son lekor.

Si zot kanmi, onte pour komans glorifiye li koman zot *Leaders*, akoz ki zot bezwen kanmi? Nou, nou pa onte pour nou glorifiye nou Prezidan Ramkalawan koman nou *Leader*.

(APPLAUSE)

HON FRANCOIS ADELAIDE

Kan nou pour tann zot en kou pe glorifiye Mr Herminie? Mr Speaker mwan mon poz sa la. Ler mon pe get zot lo lot kote latab, mon trouv bann zanfan tre zenn, ki pe vre man konn

zot listwar, me pe defann keksoz ki zot pa konnen. Zot ankor zenn, zot annan ankor bokou letan pour zot frekante e viv zot lavi.

Mon pa krwar ki i pour korek pour zot andet zot fitir, par bann keksoz ki zot ti napa kontrol lo la, e menm zot pa konn nanryen lo la. Me akoz zot afilyasyon avek sa parti ki responsab e ki fer zot vin bann azan koudeta. Zot ankor zenn parey mon dir silvouple liber zot, les sa ki'n fer son soz, soz li menm!

Mr Speaker, rapor in fini ganny table, fizi in pete bal in ale, e la nou pour bezwen *deal* avek bann konsekans, la ki mazorite laverite in ganny met o kler serten parmi bann viktim in apresye, ki zot in konnen ki vremen arive avek zot pros e zot in aksepte, me zot pe demann en reparasyon koman domaz. Akoz Leta pa'n asir sekirite son pep ki i enn son manda prensipal.

Nou napa problemm avek sa demann, me problemm i kote ki Leta pour ganny tou sa kantite larzan pour anmenn sa vre reparasyon?

Tou dernyerman Gouvernman di zour i bezwen pran bann desizyon brav, menm tre difisil akoz nou en Gouvernman serye. Zis parey ler Gouvernman i bezwen ogmant *tax* pour ganny larzan

pour fer diferan program, ozordi i pa en leksepsyon.

Gouvernman pour bezwen rod larzan pour pey reparasyon. Eski i pour normal pour nou demann sa pep Seselwa pour kontribye? Kan ofet avek biznes koudeta, serten dimoun in vin ris, menm tre ris.

Si en biznes i fer ou akimil bokou larises e pli tar sa biznes i ganny konsidere koman ilegal, eski pa i pour normal ki sa bann byen i ganny rebran e pey bann domaz ki'n kapab kree?

Eski atraver sa aksyon koudeta Lepep Seselwa ti ganny mete koman garanti pour pey okenn domaz? Non Mr Speaker. Apre tou sa letan kot sa minorite malen in anrisir zot lekor lo lasyer Seselwa, atraver biznes koudeta, lemoman in arive pour zot kontribye dan sa fon pour pey sa bann viktim.

Nou konnen ki i annan en ta milyon la deor ki ganny akimile par aksyon koudeta. Mon siport sa nide, pour rode e sezi tou bann *assets* ki annan lyen avek koudeta, vann e met sa larzan dan fon pour pey bann viktim.

Mon pa pour kapab - mon pa kapab dakor ki Seselwa ki napa nanryen pour fer avek sa levennman, i vwar zot pe kontribye an premye dan sa fon. Ler serten dimoun

pe kontinyen zwir lo larzan e lezot byen koudeta.

Seselwa i fyer pour kontribye pozitivman pour son pei. Nou bezwen kontinyen investir dan nou nasyon. Nou bezwen trouv plis finansman pour lepanouisman nou bann zenn.

Eski nou pour bezwen priv nou laznes, koup Bidze pour ledikasyon, koup Bidze pour lasante, koup Bidze pour lakaz e lenfrastruktir, pour nou pey konpansasyon bann viktim koudeta?

Eski mwan koman *MNA* Baie Lazare, mon sitan napa santiman pour sa pep, kontinyen abiz lo zot laser, fors zot pey det - pa nenport ki det Mr Speaker - det koudeta? Eski Seselwa ordiner ki devret pey le konsekans aköz Parti *SPPF* ti deside asasin son bann adverser politik?

Eski Seselwa pour bezwen sakrifye bokou loportinite pour nou laznes, zis pour ganny larzan pour nou pey bann det koudeta?

Eski nou pour bezwen pini nou bann sitwayen aze par ogmant ankor laz pansyon, pour nou ganny larzan pour nou pey det koudeta?

Si Leta pour bezwen rod resours pour pey konpansasyon, Seselwa nou bezwen tonm dakor pour nou fer ankor plis sakrifis. Sa

aksyon koudeta in met bokou fardo lo nou pei. Pa en zwe ki nou pe zwe avek, mon bann frer e ser.

Sa legzersis i parmi bann ki pli enportan ki sa 7enm Lasanble i fer e mon ti a swete ki safwasi nou ganny tou korek dan inifikasyon sa nasyon.

Mon pe osi lans en lapel avek Lepep Seselwa pour tret sa size avek bokou lenportans. Nou tou nou annan en rol pour permet sa prosis arive, annou pran nou responsabilite, kontinyen kontribye pozitivman dan sa demars.

Sa i mon pei, i ou pei, i nou pei, nou tro pti pour ankor divizyon. Gran met i travay dan en fason manifik, Mr Rene ki ti asiste koudeta i nepli la, bokou *perpetrator* i osi nepli la.

Akoz ki nou bezwen kontinyen anmar nou fason fer, anmar nou fason panse avek tou sa bann malfer ki'n arive dan plas rod solisyon e bouz devan?

Ozordi mon panse, ki sa letan ki nou kapab montre sa diferans pour nou mont par lao politik partizan e donn Lepep Seselwa sa pli bon *deal* ki zot merite, byen materyel pa eternal me liminite ek lanmour pour ou e ou prosen pour sirman anmenn ou ver lavi eternal.

En lot rekomandasyon ki mon pour osi tonm dakor, se ki tou lenstitisyon ki ganny mandate pour etabli lord e lape dan Sesel, i travay dapre zot manda e respekte drwa tou endividi.

E de lot kote mon pe demann avek Lepep Seselwa pour silvouple konn zot drwa e osi zot devwar. Si nou tou nou pran nou responsabilite e nou azir parey bann sitwayen responsab, byensir nou ava dan en fason pe ede amelyor bann move rikord, ki dan lepase ki'n kit nou an aryer e ki'n anpes nou progrese.

Nou en pep avek bokou lentelizans, e bokou matirite ki devret sirman kapab sirmont tou bann mannev entimidasyon e endoktrinasyon.

In plis ki ler pour nou tou angaze dan en fason ou en lot pour nou lev nou pei. Annou pran nou responsabilite e azir koman bann vre patriot, si i annan bann move keksoz lo Sesel nou tou nou ganny afekte. E ler nou annan bann bon keksoz lo Sesel, nou tou pour benefisye.

Kree divizyon, senm laterer, senm divizyon, pa pour anmenn nou lwen. Mon swe osi se vwar linite dan Sesel, menm si mon konnen pour pran en pe letan pour arive, me mon reste optimis ki en zour nou pour arive.

Nou bezwen komanse e fodre nou komans li la konmela menm. I tre enportan pour tou dimoun konnen akoz ki nou bezwen fer sa traze.

Se pour sa rezon ki mon dakor avek lot rekomandasyon ki nou zanfan i devret konn vre listwar pei e akoz ki egalman enportan pour rod tou loportinite, pour ki linite Nasyonal i ganny reetablir dan sa pei e ki zot rol, zot bezwen zwe pour permet sa arive.

I enportan pour zot konnen ki sa ki nou pe anvizaz-e fer ozordi, se pa en telenovela, ni en seval batay, me se en vre fondasyon solid ki nou pour bezwen konstrir pour byennet nou fitir zenerasyon.

Finalman, mon pou bezwen remerci sa lekip ki'n travay lo sa rapor. Mersi pour zot pasyans liminite, zot letan, zot sakrifis, komitman dan en ede met laverite, e fer bann tel rekomandasyon pour ki sa nasyon i kapab ganny geri. Kot nou ava anfen vwar sa vre linite Nasyonal e retrouv sa lazwa de viv. Ki nou bann pli aze i kontinyen koz lo la.

Mr Speaker wi, nou kapab fer li e nou bezwen fer li, pour lanmour Sesel. Mersi Mr Speaker.

(APPLAUSE)

MR SPEAKER

Mersi. Mersi Onorab. Nou a pran poz la, me nou a sey rebran nou program a ler. Donk nou a komanse 11er. Mersi.

(BREAK)

MR SPEAKER

Mon annan en entervenans dan kote Lopoziyon. Onorab Cosgrow ou annan laparol.

HON WALLACE COSGROW

Mersi Mr Speaker. Bonzour Mr Speaker. Bonzour tou Manm Onorab e bonzour tou manm piblik ki pe ekout nou ozordi bomaten.

Mr Speaker, depi sa detrwa zour ki nou pe fer deliberasyon, anefe sa de premye zour mon'n tann bokou bann Manm lot kote latab, sirtou bann ki ti siport Parti *SPPF*, Parti *Lepep*, zot in koz lo en kantite keksoz, zot in kraz sa parti ki zot ti ladan.

Bokou zot sa bann dimoun, bann dimoun ki'n byen pase, bann dimoun ki'n benefisyé atraver sa parti, benefisyé atraver sa sistenm; bann ki'n asize ki'n manz ek per fondater, bann ki'n travay dan parti, ki'n fer bokou travay politik lo teren, e ozordi zot pe koz koumsa, be mon demann mon lekor si zot ti ankor la ki zot ti pour dir?

E bokou zot in - i annan en *pattern* dan Lasanble sa de

zour. Bokou zot, zot in - pe dir zot pe demann pardon, pe demann pardon. Mr Speaker, mon pa vreman ganny en konpran ki zot pe fer, me toudmenm zot in fer zot desizyon, zot swa, nou respekte e nou swet zot tou de bon dan sa semen kot zot pe ale.

Mr Speaker, apre ki mon'n ekout ankor bann entervenman avan mwan pandan sa de zour deliberasyon sirtou Mr Speaker, Sekreter Zeneral Parti *LDS* - Onorab Gervais Henrie, e osi *Leader* Biznes Gouvernman Onorab Georges, pour mwan Mr Speaker, i kler ki sa legzersis ki nou pe fer dan Lasanble, i enn ki napa nanryen pour fer avek okenn linite nasyonal!

Napa nanryen pour fer avek okenn rekonsilyasyon me i annan tou pou fer avek vanzans, plis divizyon, atraver en sel dezir Mr Speaker.

E sa se destriksyon Parti *United Seychelles*. Me kwa ki zot per? Zot in get nou *rally*, nou bann *rally* zot per? Nou'n sipoze en parti ki swadizan nou'n sipoze fini mor, be kwa ki zot pe fer? Akfer zot bezwen fer sa bann kalite mannigans pour sey detri Parti *United Seychelles*?

E la mon pour dir Mr Speaker, mon santi ki i annan en konplo, en konplo byen

kalkile, byen kordinen pour elimin sa parti politik ki ozordi i parti politik pli for Sesel!

(APPLAUSE)

HON WALLACE COSGROW

E nou Mr Speaker, dan *United Seychelles* nou'n vwar zot byen lwen. En konplo ant Legzekitiv, Komisyon Eleksyon, an servan *TRNUC* ek Lasanble Nasyonal. Bann propozisyon sanzman dan Lalwa Eleksyon, i kler ki zot pe manniganse Mr Speaker. I kler ki zot pe manniganse. Se pour sa rezon Mr Speaker ki rapor *TRNUC*, ti ganny delivre avek Prezidan 9er bomaten, e i ti *hand over* avek ou 9er10.

Napa okenn lentere pour enplimant sibstansyelman bann rekomandasyon. Travay politik e zistifikasyon pour bann aksyon ki pe vini, in fini ganny deside pour ganny fer dan sa Lasanble Nasyonal, pandan sa 3 zour deliberasyon lo sa Mosyon, kot zot tou pour repete, repete e met blanm lo *United Seychelles*!

E pep Seselwa pandan sa 2 zour e ozordi in tann zot.

Premyerman koz lo bann levennman zour e apre koudeta,

Dezyenmman poz tou blanm lo *United Seychelles* parti politik, e

Trwazyenmman demann Gouvernman pour fer *United Seychelles* pey konpansasyon.

I kler Mr Speaker, dan tou sa bann deliberasyon, i annan en *pattern* depi Mardi ki nou pe vwar.

Mr Speaker, travay *TRNUC* pour mwan in enn ki, anven malerezman pour bann viktim e mon pour eksplike aköz. Ozordi parey mon'n dir napa okenn lentere de lapar Leta pour enplimant sa seri rekomandasyon pour fer anmenn en *closure* e linite nasyonal ki nou bezwen.

Viktim in ganny servi an 2020 pour kanpanny politik, pa mwan ki'n dir sa Mr Speaker, se Onorab Georges Mr Speaker atraver ou ki'n dir ki poudir *TRNUC* ti zot seval batay! E la viktim Mr Speaker pe ganny servi osi, ankor enn fwa pour detrir Parti *United Seychelles* e napa okenn dezir dan tousala pour pey reparasyon!

In ganny dir Mardi par sa de ansyen Komisyoner, e nou'n note ki depi 2021, dan en rapor enterim prezante avek Prezidan in annan rekomandasyon en antite pour *deal* avek reparasyon. Me ki zot in fer avek?

Ou pa vwar sa Gouvernman napa en sou respe pour viktim e zot fanmir. Mr Speaker, si zot kontinyen koumsa, zot pour o pouvwar

pour selman 1825 zour Onorab Sekreter Zeneral! Sa i si zot ariv 2025. Annefe *LDS* ozordi, in fini ariv o bor presipis e zot pe glise. Zot fay! E zot pe blanm zis *US* pour tou keksoz!

(APPLAUSE)

HON WALLACE COSGROW

Lamazorite Seselwa Mr Speaker, i anvi bouze, lazenes ozordi i anvi bouze. Annefe mazorite nou popilasyon ozordi i en popilasyon lazenes ki'n ne apre 1977. E mazorite nou bann zenn ozordi pe rod loportinite, pe rode ki mannyer zot kapab entegre dan lasosyete, bouze fer zot fanmir, rod zot transpor ganny en bon travay, me i annan en group ozordi ki ankor pri dan lepase.

So annou travay pour lazenes, pour bann dimoun ki pa pri dan lepase zot, zot in ne dan en letan loportinite e zot anvi kontinyen ganny sa bann loportinite. Annou pa met retar lazenes silvouple!

E parey nou'n vwar Mr Speaker, diran sa manda, zot ankor Mr Speaker, pri dan lepase. Si zot le en legzanp zis al lo *website* Departman Lazenes ek *Sport*.

Sa Minis ki bokou fwa in vin dan Lasanble, in koz lo bokou bann plan son Minister i ankor pe fonksyonn lo bann plan stratezik Gouvernman

avan. Si zot krwar mon manti kontrer avan *website* i ganny met ater, al gete zot pour vwar, al gete bann plan 2018 i ankor la, solman plan ti pe ganny fer, plan pe ganny met devan.

Mr Speaker, letan zot fel sa pep, zot kontinyen blanm 43an. E la mon le dir zot ki 2025 zot pour konnen ki sa pep e lazenes Seselwa i panse lo nou. E zot pour osi konnen ki sa pep i panse lo zot! Zot en parti politik ozordi ki'n dekile avek tou zanfan Sesel. Zot rapel byen ki mannyer zabitan Port Glaud ti *remind* zot sa, ler zot ti al fer vizit!

(APPLAUSE)

HON WALLACE COSGROW

La mon dir Mr Speaker kategorikman. Nou pa pour dormi plat ater e les zot mars lo nou! Nou pa pour les zot anpes nou fonksyonnen koman en parti politik, nou pa pour les zot diriz dan la diktatir. E ler mon dir nou, mon pe koz pour sa plis ki 35mil siporter *United Seychelles*. Onorab Aglae taler in dir 30, me mwan mon pe dir zot krwar mwan i annan plis ki 35mil siporter *United Seychelles*!

(APPLAUSE)

HON WALLACE COSGROW

Zot le konn nou lafors, seye zot! Pa krwar Mr Speaker e la mon le dir pa krwar i difisil si zot kontinyen ek sa bann zafer, pa krwar i difisil pour fer Seselwa desann dan semen!

Mr Speaker, mon pran laparol ozordi koman ase zenn Manm nou Lasanble Nasyonal, ki'n ne dan nou zoli pei Sesel, preski zis 1an edmi apre le 5 Zen 1977. Mon pran laparol koman ase zenn az Manm nou Lasanble Nasyonal ki'n grandi e aprann listwar mon pei atraver bann granmoun e osi atraver lekritir listwar ki akont lepase e devlopman nou pei e lavi nou bann sitwayen atraver letan.

Mr Speaker, sa bout ki mon'n lir la, e sa ki mon pour swiv dan mon lentervansyon annefe ti komansman mon lentervansyon.

Mon ti komans koumsa aköz mon en dimoun ki optimis mwan, mon ti senserman krwar ki nou pe al antre dan en deba serye lo rekomandasyon. Mon ti alors santi li neser pour fer dimoun briyevman konpran konteks sa travay lo en levennman en lepok ki'n ganny met anba mikroskop ozordi.

Mon pour retir sa paragraf, mon ti pour retir sa bann paragraf, me apre Mr Speaker, tar yer swar mon dir non! Non! Ekout en kou, mon

osi annan en devwar pour nou edik nou pep.

Akoz malerezman Mr Speaker, bann *MNA* lot kote pe *operate* lo en *template* zis trwa gran laliny, e ziska dernyen entervenans ozordi napa nanryen ki'n sanze.

Alor Mr Speaker, le 5 Zen 1977 i en dat ki grave dan lespri e dan memwar bokou nou bann sitwayen. *Yes* Onorab Porice militan *Youth League*, ou'n byen sante yer. I montre nou ki mannyer menm dan son lespri, sanson le 5 Zen i ankor la, disan *SPPF* i ankor pase dan son lavenn.

Pour serten Mr Speaker, sa dat in ganny dir isi dan sa Lasanble i mark en moman difisil, me ti osi reprezant pour en lot group nouvo lespwar pour lavenir pour zot, pour zot zanfan e fitir zenerasyon.

Bann parey mwan e tou ki'n ne apre sa dat, i enportan ki nou aksepte rekonsilye avek lefe, ki pour napa en sel lopinyon e nou pa devret monopoliz lopinyon lamas lo sa dat levennman.

Dimoun i bezwen lib pour enterpret e tir zot prop konklizyon. Sa ki nou pa osi devret fer se reekrir listwar; pa kasyet listwar e rakont listwar dan konteks ki i sipoze! Franse pa kanmi ler i selebre le 14 Zilyet tou le lannen, Ameriken pa kanmi ler zot selebre le 4 Zilyet, pourtan i bann

levennman ki'n anmenn bokou plis atosite ki le 5 Zen 1977!

Dan sa de ka in annan group ki'n vwar benefis, e lezot ki'n perdi benefis me zot get pli gro portre, parey Angle i dir, "*the bigger picture*".

E sa se benefis e lavansman pour zot pei. Pouwar rekonsilyasyon e inifikasyon i kapab anmenn sa pei ek sa pep pli lwen ankor Mr Speaker. Me mon *sorry* Mr Speaker, sa bann lentervansyon ki mon'n tande depi Merkrede, pour *set* nou *back* en kantite letan.

Ler nou koz lo le 5 Zen, e bann levennman ki'n swiv, nou bezwen met tou keksoz dan konteks, bokou nou ozordi ki pe viv byen enkli Onorab Bernard Georges dan son prop parol, se gras a determinasyon e sakrifis nou bann granmoun.

Listwar i dir nou ki avan 1977 lamazorite nou pep ti pe viv dan bann sityasyon vremen difisil. Bokou nou pep ti pe viv dan lamizer nwanr, bokou nou bann sitwayen pa ti bann privilezye. Sa i en fe Mr Speaker. E sa Mr Speaker, bokou nou, nou bann dimoun pli aze i kapab ateste sa mon pe dir.

Zis en zenerasyon pli tar, sa zenerasyon ozordi, i enn ki annan tou loportinite, ledikasyon lasante, lozman,

biznes, me pa tro lontan pase zenerasyon avan pa ti kapab zwir sa bann loportinite.

Enn bann legzersis ki nou bezwen fer pour kapab inifye, sel legzersis personnel annou asiz avek nou paran, e annou ekout, annou ekoute e apresye difikilte zot legzistans avan 1977.

Sa mon konvenki Mr Speaker, i pour tir bokou dout dan bokou lespri, lo nesosite annan le 5 Zen 1977!

Mon kapab konpran aköz i annan ozordi bokou ki pa kapab sitye li dan en Sesel avan 1977. Loportinite avek devlopman in ariv sitan vit anba direksyon *SPPF/Parti Lepep e US*, ki portre ou menm lanprent en sosyete avan 1977, i preski dir pa egziste Sesel.

Lafason viv e pratik sa letan, in osi ganny efase. Si mon kapab met li koumsa Mr Speaker, en ler ou a krwar nou pinisyon *United Seychelles* se fer bokou sitan vit, e nou'n vin en viktim nou sikse!

(APPLAUSE)

HON WALLACE COSGROW

En lot size ki mon le koz lo la ler nou pe etabli konteks Mr Speaker, e la mon asire ki bokou pour dakor avek mwan. Nou'n etabli – e *LOTO* dan son ladres, nou'n etabli ki Konstitisyon 1976, par lafason

ki i ti ganny *design* i enn ki ti kree en sityasyon pour annan en sistenm parti inik, annou apel li en sistenm parti inik.

Bokou in dir ki parti inik ti komans 1977, be dan en Konstitisyon kot napa loportinite en Lopozisyon alors efektifman ti napa loportinite pour parti *SPUP* pous son azanda prensipal lazistis sosyal.

E wi Mr Speaker, ti annan en koudeta an 1977. Me Mr Speaker, dan bann lannen 1977, in annan plizyer koudeta atraver Lafrik, Sid Lanmerik e serten pei Lazi. Bokou lenstans kot i annan sa bann koudeta, sete bann pei kot bokou zot, zot pep ti annan anba opresyon e sityasyon lavi dezavantaze pour en mazorite group dimoun dan sa bann sosyete.

Mon dir sa Mr Speaker aköz parey in ganny dir, nou pa kapab ozordi get-get keksoz, gete e koz keksoz lo lepase avek en lizye e konprenezon ozordi.

'77 ti en lepok, lemonn ti dan en lepok Lager *Froide* e bokou bann kou, bann koudeta ti ganny enstige e siporte par bann gran pwisans. Me lemonn ozordi in bouze, e sa pratik nepli egziste dan bokou ka.

Sa i anmenn nou lo en lot size Mr Speaker. Enn ki bokou pa le koz lo la, e menm dan

TRNUC in napa gran deba, gran koze lo la pourtan i levennman ki'n ariv kareman pandan sa letan ki sa Komisyon in mandate pour *investigate*.

Kot ti annan koudeta dan bokou ka, ti annan sa ki nou apel bann *counter-coup*. Latak mersener le 25 Novanm 1981 i osi en levennman ki douloure pour serten Seselwa. Lafanmir David Antat, solda zis i refize *surrender*, i ti ganny mertriye pe defann son patri.

Nou konnen lekel ki ti anmenn son bann agreser Sesel, "Konplo 412" bokou ti tande lo Radyo Sesel. Kwa nou bliye prezan? Onorab Hoareau atraver ou Mr Speaker. I zistifye en koudeta planifye par Gerard Hoareau e en pti group dan *MPR* e enplimante par mersener.

Eski nou pour fer en *memorial*? Eski nou pour met levidans sa levennman dan lanmen *National Archives* pour imortaliz li, dan lekritir, dan listwar?

Eski nou pour met en *memorial* an loner David Antat? Latolerans i osi en *prerequisite* pour linite nasyonal. Ou anvi dekrir le 5 Zen koman en moman tris, Mr Rene koman en *villain* e dekrir Gerard Hoareau koman en ero?

Tan ki zot kontinyen *bias* dan zot lenterpretasyon

levennman e listwar Sesel, zot pe pik boubou rekonsilyasyon e i pour kontinyen sennyen.!

Aprè en prose pros 4an en seri rekomandasyon in ganny prezante par Komisyon. Avan ki nou kapab don kredibilite sa rapor avek bann rekomandasyon, i enportan ki nou osi egzamin travay sa Komisyon.

Premyerman diran sa prose in annan bokou konplent dan lafason ki Komisyon in antreprann son travay. Bokou *staff* in konplent lafason ki sa Komisyon in ganny administre, depans sa Komisyon in size *scrutiny* Lasanble Nasyonal. *Tender* pour Kontra odyo vizyel in osi en size kontrovers ki bezwen ganny *investigate*.

Lafason ki bann *interview* ti ganny fer, nou tou nou'n swiv kot Manm Komisyoner pe *lead* en temwen ver en larepons; kot Komisyoner pe eksprim zot lopinyon personnel, swa pe agree ou dezagree avek temwen. Eski sa pa'n afekte rezilta final Komisyon? Mon pour al ziska dir, ki sa travay Komisyon in enn ki'n ganny enfliyanse tou dilon par *LDS*.

Mon konnen ki zot pa pour agree avek mwan, me mwan e osi bokou dimoun ki'n form par sa prose i partaz

menm lopinyon. E nou'n deza annan levidans.

Onorab Georges li menm in an kontak direk avek en Komisyoner an partikilye. Sa de fwa ki'n ganny mansyonnen dan Lasanble, me mwan mon annan rezervasyon lo la.

E la mon pe demande ki i annan en lodit finansyel e osi en lodit dan zeran sa Komisyon. E dan lafason ki Komisyon, in antreprann son lenvestigasyon anver sirtou bann dimoun ki zot *deem* koman akize.

Enn bann kategori rekomandasyon Mr Speaker, ki mon anvi tous lo la premye se sa klasifikasyon koman *memory*, memwar. Menm si mon zeneralman dakor ki memwar sa ki'n ganny rikorde i bezwen ganny prezerve e ganny met a laporte Lepep, lafason ki i pe ganny propoze pour mwan pa bon! En kantite levidans sirtou bann, bann ka labi imen e menm mert i baze lo *hearsay*.

Sa zafer Mark ti dir, Bastienne ti dir, *it's not on* Mr Speaker! I bezwen annan en travay akademik, par en profesyonnel e se la kot mon siport travay en istoryen ki ava kapab met tou sa bann lenformasyon dan en lankadremman akademik, ki a kapab ganny servi dan lekol, e par bann *scholars*.

Deza i annan konplent Mr Speaker ki mwan – ki mwan mon'n gannyen en pe letan pase kot en *teacher* Lekol Belau in donn son pwennvi lo ki li i krwar Mr Rene ti ete dan en legzersis ki i ti donn bann zanfan pour fer. Sa i danzere Mr Speaker, akoz nou bezwen kapab *operate* lo laverite, lo fe.

Lazistis Mr Speaker, i en konponan enportan dan sa rapor, e enn bann rekomandasyon se prosekisyon bann *perpetrators* ki pa'n demann *amnesty*. I annan ki dan lafors sekirite, dan lapolis, dan servis piblik eksetera, eksetera. La ankorey dir mwan ki mannyer nou koman en Lasanble Nasyonal, nou kapab egzamin lenplimantasyon sa rekomandasyon si nou napa en lalis *perpetrators*?

Sa ki nou konnen selman i annan serten non-dan bann rapor endividyel, ki met serten koupabilite lo serten lanmor. Bann Manm Onorab lo lot kote latab, in nonm serten non ki bezwen ganny demann pardon.

Si nou pe vin avek largiman ki Prezidan Parti *US*, i bezwen demann pardon lo lapar Parti *US*, mon a dir annou osi demann Minis Rose-Marie Hoareau demann pardon lafanmir Chang-Him, e osi pey konpansasyon, akoz son papa in ganny idantifye

koman sa dimoun ki ti touy Mr Chang-Him!

Akoz mwan Wallace Cosgrow Manm Parti *US* mon pa ti la mwan! Mon pa okouran mwan! Mon pa kapab demann pardon, mon pa kapab peye Mr Speaker! Zot konpran mannyer sa zafer i vin diviziv, i pour kontinyen Mr Speaker – (pardon) i pour kontinyen Mr Speaker, desir nou sosyete. I responsabilite Leta pour met en lafen avek tousala.

Les mwan prezan dir zot, Prezidan Faure ti fer serten deklarasyon, i ti fer sa dan son kapasite komans Sefdeta, ozordi mon envit Sefdeta Sesel pour aprezan fer son par, *rise above* politik partizan adres bann viktim e zot size konpansasyon san plis dele letan.

Nou ava note ki i annan plis ki 4mwan rekomandasyon i avek Prezidan. Lenplimantasyon bann rekomandasyon pa depann lo diskisyon Lasanble Nasyonal. Manda pour sa prose ti ganny donner par Lasanble Nasyonal atraver Lalwa pour en Komisyon fer sa travay. Lasanble Nasyonal pour mwan napa manda reekrir rekomandasyon.

Lo sa zafer pardon mon tann bokou Manm lot kote dir ki *United Seychelles* i devret demann pardon. Premyerman

mon konnen ki zot pe sey forse par repet sa enn, sa enn apre lot, koupabilite person pa pour met lo *US* Mr Speaker.

Dezyenmman Prezidan Parti *US* in dir, ki i pa pe demann pardon aköz li, nou tou Manm e siporter *United Seychelles* nou pa'n komet okenn akt ilegal. Sa ki'n a paret devan Komisyon e ki'n vwar koupab, in ganny vwar koupab zot a demann zot pardon.

Mon kontan ki Onorab Labrosse in koz lo formasyon lapolis ek larme. Dan rekomandasyon Komisyon sa in sorti, mon krwar ki ozordi Sesel i annan en lafors Lapolis ek Larme profesyonnel. Me Mr Speaker, le 31 Mars sa lannen Prezidan ti ganny sa bann rekomandasyon.

E menm sa in deside apwent en kaptenn dan Lafors Defans, ki pa'n pas atraver formasyon. *Let alone* pour vin kaptenn me formasyon lo baz militer. Zot konpran alors le mon dir ki sa legzersis ki nou pe fer, napa nanryen pour fer avek travay *TRNUC*.

Rekomandasyon in koz osi lo relasyon avek militer lo sa lamannman konstitisyonnèl ki ozordi i size Ankour. Komisyon i rekomannde ki sa dizenm lamannman i ganny retire, pa bezwen ki nou esper ka fini Ankour, si nou anvi enplimant

de bonn fwa bann rekomandasyon e bouz de lavan avek linite Nasyonal, Prezidan ek Gouvernman i kapab akte lo la deswit. Ankor enn fwa napa lenterere.

Prezan Mr Speaker, mon koz lo rekomandasyon ki ozordi pe ganny plis prominans e sa se reparasyon. Dan sa Seksyon reparasyon in annan detrwa rekomandasyon, annou koz lo nimerò enn e sa i al an relasyon avek bokou largiman ki mon'n fer pli boner.

Sa i konsern pardon. Komisyon ki'n ganny mandate par Lalwa, fer par Lasanble Nasyonal in dir kler an nwanr e blan ki Leta i bezwen dir pardon tou bann viktim koudeta 1977, e fer en komitman ki Leta pa zanmen les sa ariv ankor. Nou a note ki i refer lo Leta, *all along* se Leta ki bezwen fer sa - sa pa Mr Speaker!

Zot in ariv lo sa rekomandasyon baze lo travay ki zot in fer. Prezan zot dan Lasanble zot a vin ek zot prop lenterpretasyon. Be aköz zot pa ti fer zot menm Mr Speaker? E mwan note ki Prezidan Faure sa letan ti demann pardon lafanmir Berard Jeannie, i ti fer li koman Sefdeta, in *rise above* tou politik konsiderasyon tou konsiderasyon politik e akte koman en fran zonn Deta.

Alors mon pa konpran sa seri lenterpansyon lot kote latab kot pe demann *US* pour demann pardon.

Mon dezyenm pwen lo sa size reparasyon i konsern sa *successor body*, apard ki zot in asiz lo sa rekomandasyon, pour kree sa *body* e ozordi i annan dezord dan sa zafer reparasyon, sitan dezord i annan en group in bezwen al kree en lorganizasyon pour met zot bann pledwari devan Gouvernman.

Nou'n tann toudsort kalite largiman ki *US* i bezwen peye, sezi propriyete *US*, bann nou koman en parti pour partisip - *ban* nou parson dan en parti pour partisip dan eleksyon, me ki si sa tousala!

Now ler dan 6enm Lasanble ti pe ekrir Lalwa *TRNUC* e la bann *framers* sa Lalwa - pardon ki ti fer sa legzersis en legzersis bipartisan i konnen ki sa zafer *US*, ouswa *perpetrators*, pey konpansasyon pa ti zanmen lo latab.

Si ti la Mr Speaker, ti pour antre dan *text* Lalwa. Mon konklizyon i se ki swa semen ti enn ki kler, e ki sete responsabilite Leta ouswa deliberaman zot pe fer ekspre pour retard prose.

Legzanp Mr Speaker, dan ka le 3 Oktob kot Libreri Nasyonal lekel ki ti pey zot konpansasyon? Sete Leta.

Legzanp Mr Speaker, bann lezot konpansasyon par egzantp *fungus* se Leta ki peye, ankor en legzanp Mr Speaker konpansasyon pour bann Sagosyen se Leta *Grande Bretagne* ki pe *sort out*.

So ou konpran Mr Speaker, i annan en *pattern*, e mon le konklir me Speaker pour mwan dir ki Leta i bezwen pran son responsabilite. E ler mon'n asize Mr Speaker, pandan sa de zour mon'n asize mon'n ekout atantivman bann deliberasyon, mon krentif Mr Speaker, sa ki sa travay ki'n ariv devan Lasanble Nasyonal ozordi, i en travay ki i pa'n vin isi de bonnfwa.

E i en travay ki nou pe fer li avek tro bokou konsiderasyon politik, kan i sipoze en travay ki nou pe fer li pour nou fitir zenerasyon pour met sa bann keksoz deryer nou, e pou nou kontiny lavi Sesel, devlopman Sesel pour nou fitir zenerasyon.

I en travay ki nou pe fer ozordi, ki mon santi i annan serten malis ladan, i annan serten movez fwa pour detrir e efas en parti politik. Dayer parey nou'n dir boner, i pa pour en louvraz fasil sa! Akoz sa plis ki 35mil dimoun pa pour les zot fer sa!

So Mr Speaker, zot bezwen - dan en pei demokratik i bezwen annan

latolerans, i bezwen annan respe pour lopinyon dimoun, nou bezwen kapab bouz ansanm, travay ansanm, parey nou ti komanse bipartisan nou bezwen kapab fer li ansanm san met blanm, me travay ansanm pour pep Seselwa. Avek sa Mr Speaker mon a dir ou mersi.

(APPLAUSE)

MR SPEAKER

Mersi Onorab. Laparol i aprezan pour Onorab Philip Monthy.

HON PHILIP MONTHY

Mersi Mr Speaker. Bonzour Mr Speaker. Bonzour tou dimoun ki pe swiv e bonzour tou bann viktim ki'n ganny afekte par sa levennman koudeta 1977.

Letan ki mon lo la Mr Speaker Onorab Cosgrow in koz lo Konstitisyon 1976, ki ti fer provizyon pour en sistenm parti inik. Mon pa'n zanmen lir sa Konstitisyon mwan Mr Speaker, me selman mon vwar lo drol akoz Parti *SPUP* ti egziste sa letan.

Se Mr Mancham ki ti ouver son lebra avek zot e ti fer zot *join* li pour form en koalision. So mwan mon en pe konfize, si i ti fer provizyon pour en sistenm parti inik ki mannyer ti annan en lot parti ki ti egziste sa letan? So

anyway - mon a poz sa later Mr Speaker.

Mr Speaker, ler mon ti ganny aprobe pou vin dan politik, en pti pe plis ki 2an edmi pase, mon pli gro lenkyetid sete, si mon ti ganny elekte, ki mannyer mon ti pou kapab asize dan Lasanble e ekout serten bann Manm *United Seychelles* koze?

E plizyer dimoun ki pros avek mwan ti osi demann mwan sa. Akoz ler mon ti pe swiv deba Lasanble Nasyonal lo televizyon, dan mon salon, kot mwan e ler mon ti santi ki mon ti nepli kapab toler sa kalite nivo ridikil ki ti pe sorti lo sa lot kote latab, mon ti zis pran mon *remote* e pez "*mute*," oubyen mon ti tou senpleman sanz *channel*.

Me ler ou retrouv ou dan Lasanble, ou napa swa me ou bezwen ekout zot. E Mr Speaker, mon'n kapab develop sa kouraz pou fer li pandan sa 2an edmi ki mon pe reprezant mon distrik Cascade, la dan sa Lasanble.

Me Mr Speaker mon pou bezwen admet ki sa kouraz e pasyans in ganny teste pandan sa 3 zour deba lo rapor *TRNUC*, sa semenn dan sa Lasanble!

Ler mon'n ekout sa bann reprezantan sa Parti *US* sey vin zistifye en akt kapon, ki en pti group ki ti annan en azanda personnel, e en laswaf

pouvwar ti komet le 5 Zen 1977.

Sa akt ki nou konn li konman koudeta ki'n kit en mark nwanr dan nou listwar e ki osi kapab ganny kategorize konman "traizon" oubyen "*Treason*".

En mo ki ler mon get son sinifikasyon, i dir mwan,

"Treason, is the crime of betraying your country, for example, by helping its enemies or by trying to remove its government using violence."

(APPLAUSE)

HON PHILIP MONTHY

Se egzaktaman sa ki ti arive le 5 Zen 1977 Mr Speaker. E napa okenn aksyon, oubyen largiman ki kapab ganny avanse pou zistifye e lezitimiz en tel akt.

Mr Speaker, mon'n vwar li nesaser pou konsantre en parti mon entervansyon lo sa levennman, pa pour al reouver okenn blesir, me tou senpleman akoz si nou vwar nou la ozordi, pe dedye 3 zour travay Lasanble pour debat lo rapor en Komisyon, ki'n ganny kree pour fer lenvestigasyon dan bann ka labi drwa imen ki'n arive pandan sa peryod apre koudeta 1977 ziska '73, mon santi ki i tou normal pour koz lo sa levennman li menm. Menm si parey nou konnen ki sa ti pou ofans bann

reprezantan sa parti ki ti responsab pour sa bann kriyote.

Aprè osi Mr Speaker, sa mo, “nou pa fye zot”, in ganny prononse a plizyer repriz la dan sa Lasanble depi Merkredi par bann Manm US. E i alors enportan pour mwan fer pep Seselwa la deor konnen lekel ki zot pa devret zanmen met zot konfyans ankor ladan Mr Speaker e sa se pa nou.

Zot in dir zot pa fye nou, konmsi se LDS ki ti fer koudeta e konmsi se LDS ki'n komet tou sa bann atosite, ki'n sok mazorite Seselwa e ki'n ganny fer resorti dan sa rapor!

Ler nou pe analiz bann rekomandasyon sa Komisyon, i enportan pour ki sa zenerasyon ki pe monte, Onorab Cosgrow zis avan mwan in koz longman lo bann zenn, lo lazenes ki pe monte - fer sir ki sa bann dimoun ki pe zistifye sa akt kapon ki apel koudeta e pe glorifye sa bann *perpetrators* pa zanmen konnen ki si sa pouvwar ankor.

E la mon pou siport sa rekomandasyon dan rapor ki pe demande ki Minister Ledikasyon i entegre morso sa rapor final dan *curriculum* lekol, ki a fer ki nou zenerasyon fitir, a konnen kwa ki'n vreman pase dan sa pei kot i konsern drwa imen; e non

pa ganny ekspoze avek bann mansonz parey mwan e plizyer lezot etidyan nou lepok ti bezwen pas ladan, atraver sa leson politik ki ti dan *curriculum* sa letan.

Mr Speaker, Onorab Romain in byen eksplike, ki en kanmeleon i kapab sanz an plizyer kouler, me sa pa fer li sanz e vin en lot zannimo, i fer li touzour reste en kanmeleon, e nou'n temwanny sa.

Dimans dan zot *rally*, kot nou'n ganny maltrete, ganny apele lezar mangouya, ek dragon e sa i pa premye fwa. Mon'n ganny tante pour mwan dir Onorab Loze atraver Mr Speaker, kote i pour vwar dragon si i ouver byen son lizye. Me mon pa pou fer li, aköz mwan mon pa parey li mwan Mr Speaker.

(APPLAUSE)

HON PHILIP MONTHY

Mon a fer politik koman en politisyen me pour tret mon frer ser parey zannimo, sa mon pa pour fer. Sa i fer mwan mazin sa sanson Ton Joe ki ti dir, “zot in sanz lakok, me pa leker”. Zis get kalite mo ki ganny servi lo rezo sosyal pou ensilte Prezidan Larepublik Mr Speaker.

Ou kapab pa kontan sa zonm, me omwen annan respe pou sa lofis pli o dan pei.

(APPLAUSE)

HON PHILIP MONTHY

Me ki nou vwar, sa bann menm dimoun i ganny glorifye dan zot *rally*. Sanmenm sa bann dirizan ki nou anvi remet lo pouvwar sa Mr Speaker?

E la mon pou fer referans avek enn bann rekomandasyon ki pe rekomann ledikasyon piblik Seselwa dan lafason ki medya sosyal i kapab afekte en dimoun e plis ledikasyon *enforcement* Lalwa lo *hate speech*. Fer pase ou pwen, me aprann fer li avek respe.

Mr Speaker, zot in dir zot pa fye nou, Parti *US* i pa lot ki sa Parti *SPUP*, ki enn bann fondater se pa lot ki pa zonm ki zot apel ‘per fondater Mr France Albert Rene’, ki zot in sey vin zistifye son bann akt kriminel la anndan, pour dir ki in fer bokou e si nou la dan sa Lasanble ozordi se gras a li.

Mr Speaker, parey Onorab Georges in admet, wi in annan bokou ki'n ganny fer. Me eski de byen i zistifye en mal? Eski trwa byen i zistifye en mal? Eski san dibyen i zistifye lavi en imen? Konman en kretyen mwan mon poudir, non-Mr Speaker!

Ou kapab fer de milye lakaz si oule, ofer ledikasyon ek lasante pour nanryen, kree

de milye lanplwa, me lavi imen napa okenn pri lo la!

Sa semenn dan sa Lasanble, nou vwar bann *MNA* sey vin met en pri lo lavi imen Mr Speaker! Mr Speaker, apre koudeta son lannmen, Mr Rene, ti adres Nasyon Seselwa lo Radyo Sesel. *US* in repet plizyer fwa ki zot pa fye nou, dan zot entervansyon e Onorab Loze in tret Gouvernman *LDS* e menm Prezidan koman lalang a plizyer repriz, la dan sa Lasanble.

Mon pou alors lir serten morso ladres ki Mr Rene ti fer sa zour, koumsa Seselwa ava war pou zot menm lekel bann pli gran manter, ki zis oule vin bat zot latet pou ganny pouvwar, me apre zis pou avans zot bann azanda personnel, san okenn pitye e remors pou lavi imen. *Comme* dir Onorab Henrie, “dir mwan ki ou frekante, mon a dir ou ki ou ete”.

Mr Rene ti dir e mon pou sit li mo pou mo. Mon komanse Mr Speaker,

“Ozordi alor, mon oule, profit lokazyon pou koz pli lontan, avek tou Seselwa, e pour mon fer pli kler ki'n arive Sesel, e pour dimoun konpran ki mannyer Sesel pou ganny dirize a lavenir.

Premyerman, mon oule eksplike ki nou'n aksepte pou ansarz Gouvernman Sesel,

Selman apre ki mon'n ganny Lagreman tou dimoun ki dan sa nouvo Sesel ki nou pou kree, pour napa okenn diskriminasyon kont personn!". Pa i anvi fer ou riye sa Mr Speaker?

"Setadir, ki sa nouvo Gouvernman, pour en Gouvernman, Lepep Seselwa an antye. Non pa zis en pti group dimoun."

Seryezman? Mon kontinyen. "Mon oule ki tou Seselwa, i santi ki li ki pe gouvènen, e non pa enn, ou detrwa endividi. Mon oule ki tou Seselwa i santi dan son leker, ki i annan drwa dir sa ki i panse".

Ler mon lir sa i le fer mwan riye Mr Speaker. Kontinyen,

"Si zot santi ki nou ki responsab pou fer marse Gouvernman pe fer mal, mon oule ki zot dir nou, e non pa per pou eksprim zot lekor." *(laughter)*

"Si nou ki sipoze pe servi Lepep pa kapab ganny kritike, zanmen nou pou konnen ler nou fer mal. Napa personn lo sa later ki parfe. Tou dimoun i devret ekout konsey lezot. Se Selman an permetan tou dimoun eksprim zot lekor, ki nou pou kapab ganny linite e korperasyon". Parol Mr France Albert Rene sa Mr Speaker.

E dapre rapor nou'n war ki'n arive avek sa bann ki ti

sey dir li sa ki zot panse. Kontinyen,

"Si dan en fanmir, zis en dimoun ki domin leres, sa fanmir antye zanmen pou ini. Me si tou manm sa fanmir i koze ansanm e diskite, korperasyon i egziste, sa fanmir i prospere e i ere. Tro souvan dan lepase zot in antann mwan dir zot, ki dan en pei fodre en dimoun i ganny garanti travay".

Mr Speaker, kantite nou frer ek ser in martirize pour ganny en travay, anba sa sistenm? Kontinyen.

"Tou Lalwa ki egziste pou kontinyen, pour nepli annan lenterferans par Gouvernman avek okenn Ziz"! *(laughter)*

"Tro souvan dan lepase Gouvernman ki dir kan fodre kondann dimoun e kan pa fodre kondannen."

Mr Speaker, ou ti ganny kondannen ou, san nanryen ditou,

"A lavenir Ziz i a desid li menm ki fodre fer, e personn pa pou enterfer avek li. De lot kote pa pou kapab annan en Lalwa pou en bann, e en lot Lalwa pou lezot. Lalwa i Lalwa, i ava aplik pour tou dimoun, ki ou blan, ki ou zonn, ki ou ris ou pov. Nou sistenm pou bezwen vin en sistenm lazistis pou tou dimoun". Fen sitasyon, parol Mr Rene.

Eski nou kapab fer konfyans sa bann zans ankor Mr Speaker?

(APPLAUSE)

HON PHILIP MONTHY

Mr Speaker, sa i zis en ekstre sa *speech* ki ti ganny prononse par sa gran arsitek, parey Onorab Gabriel in dekrir li. E ler zournalis ti demann li si i ti konnen pou dir pour annan en koudeta? Son larepons sete, mon site ankor.

“Pou dir laverite, mon ti konnen ki zot pe *plan* en keksoz, me mon pa ti konnen egzaktman ki zot ti pe *plan*.” E dapre li, i ti ganny demande par sa bann dimoun, si i ti anvi form en Gouvernman. I pa ti okouran ditou pou annan koudeta, i pa ti ladan li Mr Speaker!

Onorab Loze ankor atraver ou Mr Speaker, lot fwa ti sant en sanson, “♪ lalang, lalang, lalang” la dan sa Lasanble. Mon ti a konsey li atraver ou ankor Mr Speaker, ki ler i pe mont Corgat pou al fer kanpanya dan geto, pou sot kot Simityer Mont Fleuri pou al sant sa menm sanson.

Mon’n swazir pou al dan sa laliny Mr Speaker, akoz si nou la ozordi dan sa Lasanble, pe angaz nou dan en tel deba, se akoz bann aksyon ki’n swiv sa levennman sa zour, e pou montre Seselwa ki kantite

mansonz ki ti ganny prononse zis en zour apre sa levennman.

E pou fer sir ki zot pa les zot ganny anbete ankor, par bann desandans sa parti, ki sa menm kalite disan ankor pe koule dan zot lavenn.

E Onorab Cosgrow fek dir taler, “pa krwar i difisil pour fer Seselwa desann dan semen”, Mr Speaker. Mr Speaker parey nou konnen Komisyon lo Laverite Rekonsilyasyon ti kree par en Lalwa bi-partizan 2018, e mon repete, “bi-partizan”, savedir ti ganny laprouvasyon tou lede parti politik, ki ti ganny reprezante la dan sa Lasanble.

E sa de parti politik i ankor pe ganny reprezante la dan sa Lasanble menm si par lavolonte pep Seselwa, sanzman in fer ki la an 2023, Lopozisyon i en minoriter kontrerman avek an 2018.

Me sa Mr speaker, pa an okenn ka, vedit ki zot rol e responsabilite la anndan i sanze. Zot touzour reste en Lopozisyon e zot touzour annan en rol enportan pour zwe dan politik pei.

E sa semenn, atraver sa deba ki pe ganny antreprann par nou Lasanble lo Rapor *TRNUC*, pep Seselwa pe demande ki zot ranpli zot langazman, si zot anvi ganny konsidere konman en Lopozisyon ki serye.

E en fason pour fer sa ki malerezman zot, e zot bann *Leaders* pe kategorikman refize pour fer, se aksepte ki zot parti in responsab pour tou sa bann atosite ki'n ganny fer resorti dan sa rapor. E demann pardon e pran responsabilite pour donn konpansasyon sa bann viktim.

Me ler nou'n ekout zot, i kler ki zot pare pour zwir tou bann aki sa parti ki ti apel *SPUP/SPPF/Lepep* sa lepok kot plis sa bann labi in pran plas.

Building; larzan pour organiz zot bann kanpany politik ki bann biznes sa parti in anmennen, bann plizyer kare later kot zot bann biro in ganny konstrir, tousala zot pare pour zwir Mr Speaker. Me selman pa nonm zot konpansasyon! Sa zot pa oule tann nonmen, Mr Speaker!

Zot fatigue vin dir nou, Seselwa pe mor lafen, 10poursan logmantasyon pa ase, Sekirite Sosyal pa ase fodre ogmante,

Onorab Vidot atraver ou Mr Speaker, fatigue dir nou nou'n ganny elekte pour fer pli byen e ki nou ti dir nou pour met larzan dan pos Seselwa.

Selman ki zot pe dir nou? Zot Parti *US* pa pour partisip dan okenn konpansasyon, pour okenn domaz ki sa parti in fer avek bann viktim. O kontrer ki zot dir nou Mr

Speaker? Zot dir nou se Leta ki responsab e alors pran larzan *tax* Seselwa pour pey domaz sa bann viktim. An dot mo zot pe dir nou, tir larzan dan pos Seselwa e dan pos viktim tou.

Si nou fer sa Mr Speaker, ki mannyer sa pansyoner pour vwar en logmantasyon dan son Sekirite Sosyal? Ki mannyer sa *teacher*, sa Ners, sa *carer*, pour vwar en logmantasyon dan son saler pour ki son kondisyon sosyal i amelyore?

Seselwa pe ekout zot la deor, i pa drol ki zot lafoul i de pli an pli atresi dan zot bann rali. E la sa pozisyon ki zot in pran, mon krwar zot pour bezwen al rod *GOP* pour fer vini etranze pour ranpli zot pti laplenn.

(laughter)

HON PHILIP MONTHY

Mr Speaker, si 2an edmi pase okenn dimoun ti dir mwan ki le 4 Zen 2023, mon pour en Manm Elekte dan sa Lasanble Nasyonal Sesel, e pe ganny sans entervenir lo en rapor, ki pe prezant devan sa pep bann levennman ki'n mark en peryod sonm nou listwar, mon ti pour dir sa dimoun zanmen.

Akoz mon'n sitan asize devan mon televizyon konman en senp sitwayen e swiv avek bokou lentere e menm tristes, sa bann levennman, kot

serten nou sitwayen in vin eksprim zot soufrans e lenzistis ki zot in sibir. Mon pa ti pou zanmen mazine si desten ti pou fer ki ozordi mon ti pou la pe entervenir lo en tel Mosyon.

Akoz mon pe dir sa Mr Speaker? Se akoz sa moman i pou mwan, en moman istorik. Istorik dan le sans ki konman en zanf an ki ti annan zis 2an ler koudeta ti arive, mon kapab dir ki mon'n viv preski mazorite mon lavi anba en menm sistenm, kot ou ti santi ou koman en sitwayen dezyenm klas dan ou prop pei e kot ou ti zis priye ki sa zour i ava arive pour ki anfen ou ava vwar en sanzman dan sa pei.

Istorik Mr Speaker, akoz mon mazin mon zanmi pros Brian Victor, ki souvan ler nou ti zwenn kot i ti pe viv an egzil e kot mon osi mon ti pe viv sa letan, i ti komans akont mwan son kosmar.

Me zanmen in ganny sans, in ganny sa kouraz pour akont mwan an antye ki ti arive sa zour. E mon pa ti zanmen mazine si en zour mon ti pour konnen ki vreman arive ek li sa zour, ziska ler i ti aparet devan sa Komisyon, pour akonte e montre ki kosmar li avek son de koleg ti pas ladan sa zour.

Son entervansyon in mark mwan e plizyer Seselwa

Mr Speaker, e ler mon pe dir ki sa moman i istorik, akoz sa letan ki nou ti pe bwat de labyer ansanm an *Boston* Lanmerik, mon pa ti mazine si ozordi mon pou dan Lasanble Nasyonal Sesel, pour fer kontribisyon lo sa rapor; ki a ede asire ki sa prosesis ki'n komanse par sa Komisyon i ganny konplete dan son totalite.

E alors ede donn mon frer Brian *closure* e konpansasyon ki i merite, pour son soufrans ki'n sibir anba sa rezim kriminel.

Sa Komisyon atraver sa 1129 sesyon, in fer mwan e bokou lezot Seselwa konn laverite lo kwa ki ti vreman arive dan sa pei, anba direksyon sa parti ki ozordi i pe sey sanz lakok, me pa leker.

Mr Speaker, tou Seselwa i annan menm drwa lo sa later Sesel anba nou Konstitisyon. E non pa serten i annan plis drwa ki lezot zis akoz zot lopinyon politik. Drwa pou ganny en travay, plis ki en lot; drwa, pour aste en morso later plis ki en lot; drwa pour koze e eksprim zot libreman plis ki en lot. E osi drwa a lavi, kot serten nou frer Seselwa, sa drwa ti ganny siprimen avek zot.

Mr Speaker, mon santi koman en Lasanble serye, i nou devwar pour fer nou kontribisyon lo sa travay ki ti

komanse lanmenm la dan sa 6enm Lasanble atraver en Mosyon anmennen par Onorab Ramkalawan sa letan.

E ler mon'n pas lo sa lalis 47 rekomandasyon ki sa Komisyon in prezante i fer mwan pli apresye sa travay ki zot in fer ankor, akoz sakenn sa bann rekomandasyon Mr Speaker, ler i pour ganny enplimante i pour fer ki zanmen ankor bann aksyon barbar i arive ankor dan sa pei ki apel Sesel.

E ki okenn politisyen pa abiz son lopinyon - son pozisyon pour swa fer ditor son prosen, oubyen pour anrisir son prop lekor e son fanmir, oubyen son galan.

E mon zis pa kapab konpran Mr Speaker, ler Onorab Uranie i dir ki *TRNUC* in anmenn bokou plis ditor ki dibyen. Sa menm Onorab ki ti ridikiliz soufrans sa bann viktim, par konpar zot lentervansyon avek en telenovela.

Sa menm Onorab ki yer dan son lentervansyon in komans par dir bonn apre midi bann viktim e osi apre i dir bonn apre midi bann *perpetrators*. Sa pour mwan i montre ou ki kalite dimoun nou pe *deal* avek Mr Speaker!

Mr Speaker, sa Gouvernman *LDS* par lafason ki i pe travay i deza pe enplimant plizyer sa bann

rekomandasyon. Nou Lafors Lapolis i deza enn ki pli profesyonnel dan lafason ki i desarz son responsabilite, tel parey lafason ki en lafoul i ganny kontrole, e arestasyon i ganny fer dapre Lalwa i egzize.

Lafors Militer i enn ki la pour protez pep Seselwa e nou pei e non pa fer okenn endividi disparet.

Asire ki tou zournalis i kapab fer zot travay dan laliberte san entimidasyon, viktimizasyon oubyen detansyon, i en lot rekomandasyon ki *LDS* in lager pour anmennen dan sa pei e ki deza pe ganny pratike.

Mr Speaker, sa travay ki nou'n vwar nou pe fer ozordi la dan sa Lasanble, se pou asire ki travay ki sa Komisyon ki ganny kree la dan sa Lasanble e ki son manda in terminen, i ganny konplete dan son totalite atraver bann rekomandasyon ki nou konman en Lasanble, nou a osi donn nou lopinyon lo la e demann Gouvernman pour fer sir ki zot ganny enplimante.

Alors Mr speaker, mon pa konpran akoz *Leader* minoriter dan son entervansyon, i pa pe vwar akoz Lasanble Nasyonal in bezwen fer en tel travay sa semenn. En deba ki mazorite Seselwa la deor e menm aletranze ti pe espere avek pasyans, e konman

reprezantan Lepep la anndan, sa i enn nou devwar.

Sirtou ler mazorite Seselwa la deor ti pe dir nou fer sir ki pa zot larzan *tax*, ki ganny servi. E nou lo nou kote latab nou'n lans en lapel kler avek Prezidan Larepiblik, ki nou pa anvi ki larzan nou bann Seselwa inosan, i ganny servi pour pey krim ki bann ansyen dirizan en parti politik, ki ozordi i ankor pe zwir plizyer benefis ki zot in gannyen atraver koudeta, in komet.

Me be zot bann reprezantan *US* zot in dir tou le kontrer. Les zot kontinyen benefisyavek sa kantite milyon, ki zot parti pe anmase atraver lavant propriyete ki zot in akimile, me al trangle sa pov Seselwa pour pey pour zot bann atosite.

Mr Speaker, Mr Green in fer nou rapele ki manda sa Komisyon sete pou rod laverite, lo bann atosite ki'n arive dan sa pti Sesel, "e laverite nou bezwen rod li ansanm konman en nasyon" i ti dir. E si napa laverite parey nou'n ganny dir, pou difisil pou annan pardon, e si napa pardon Mr Speaker, pou napa rekonsilyasyon.

Rekonsilyasyon i alors sa destinasyon final ki Onorab Georges in koz lo la, e ki a fer ki konman en pep, nou ava bouz devan dan linite, e ferm sa sapit nwanr nou listwar.

E ansanm asire ki zanmen, e zanmen ankor disan nou frer ek ser Seselwa i ganny verse, zis akoz son lopinyon i diferan avek sa ki pour ou. Mersi Mr Speaker.

(APPLAUSE)

MR SPEAKER

Mersi Onorab. Laparol pour Onorab Wavel Woodcock.

HON WAVEL WOODCOCK

Mersi Mr Speaker. Mr Speaker, ozordi nou pe debat lo rapor Komisyon Laverite, Rekonsilyasyon e Linite Nasyonal. Sa Komisyon ti ganny kree apre en Mosyon an 2018, par *Leader* Lopoziyon sa letan – Onorab Wavel Ramkalawan - ozordi Prezidan.

Anvi ki *LDS* ti an mazorite – ti annan mazorite dan Lasanble, e presyon ki Manm piblik ti pe met lo Gouvernman - Prezidan Faure ti napa swa, me pou siport kreasyon *TRNUC* atraver en Lalwa bipartizan ki ti vin devan sa Lasanble.

I malere Mr Speaker, ki olye vwar remors e sa volonte pou anmenn linite nasyonal - Parti *US* in pran en pozisyon kot zot in zistifye tou sa bann atosite ki'n arive dan lepase.

Zot ankor pe sant zot bann sanson revolisyoner dan zot *rally*. Doyace ti sant enn sa

sanson yer. Zot pe *quote* bann vye *speech* leparse. E menm dan Lasanble, e dan zot Kongre zot pe dir bann tel parol parey ki;

“*TRNUC* i en *Telenovela*” – ki Onorab Uranie dayer in deza repet sa dan sa Lasanble.

Bann parol tel parey; tou sa bann mal ki Mr France Albert Rene, zot bann *Leaders* e zot parti in fer ti zistifye pou anmenn nou pei kot in arive ozordi. Onorab Aglae osi in dir sa dan leparse.

E zot ankor pe glorifye Mr Rene dan zot bann *rally* atraver bann *statement* ki Mr Rene in fer dan leparse. “Si zot mor dousman, pa nou lafot. Si zot mor vit osi, pa nou lafot.”

I annan en bann ki pou *end up* anba pon - ki *Leader* Parti *US*, Mr Patrick Herminie i fek dir pa tro bokou letan pase dan zot Kongre.

Onorab Aglae, atraver ou Mr Speaker, pli boner dan son lentervansyon in menm dir ki sa rapor *TRNUC* in ganny ekrir par *LDS*. I pe akiz bann manm Komisyon pou siport *LDS* - enkli Mrs McIntyre, Mr Speaker ki pa ni sorti Sesel. I pe kestyonn zot kredibilite. I pe dir ki *LDS* in ekrir sa rapor.

Me selman dan en lot mo Mr Speaker, li menm in dir ki nou pe pran zis sa ki dan nou faver dan sa rapor. Be si nou ki'n ekrir sa rapor Mr Speaker, nou ti ava ekrir tou keksoz dan

sa rapor dan nou faver. Mr Speaker, tousala i pa fer en sou sans.

Mr Speaker, si i annan en parti ki'n demontre linite nasyonal dan sa pei, se pa lot ki Parti *LDS*. Annou get dan 7enm Lasanble e dan Legzekitiv ozordi.

Dan Lasanble lo kote *LDS*, nou annan nou bann Manm ki'n sorti dan plizyer parti politik ki form par nou lekip. Dan *Cabinet* nou annan nou bann Minis ki'n sorti dan plizyer parti politik. Lo nou kote latab, nou annan nou bann Manm ki'n sorti dan *SNP*.

La dan Seselwa, ki enkli Onorab Adelaide, mon menm, Onorab Mondon, Onorab Andre. Sa de dernyen ti osi bann Manm *SPPF* dan leparse. Onorab Larue ki sorti dan *SPSD*. E pli resaman, Onorab Zialor ki ti *Chairman* Brans *US*, Grand Anse, Mahe - in zwenn nou apre dernyen eleksyon.

Me pli notaman Mr Speaker, se pa lot ki Onorab Waven William ki ti en Manm *SPUP/SPPF* dan *People's Assembly* anba 2enm Repiblik. E pli tar, en Manm *SPPF/US* apre retour miltiparti.

Ozordi nou pe viv linite nasyonal antre nou. Dan *Cabinet* ozordi nou annan Vis-Prezidan Mr Afif - ti kandida

Vis-Prezidansyel pour Lalyans Seselwa an 2015.

Nou Minis pour Zafer Entern ti kandida Vis-Prezidansyel pour *SPSD* an 2015. Dan *Cabinet* e dan Lasanble - menm avek tou nou bann afilyasyon politik dan lefase, nou'n vin ansanm e nou pe travay pour Sesel.

(APPLAUSE)

HON WAVEL WOODCOCK

Nou'n montre tolerans pour kanmarad. *LDS* in anmenn Seselwa ansanm. E ozordi i annan 20 distrik ki *LDS* in ranport eleksyon, e *US* zis 5 distrik Mr Speaker.

Nou'n osi *extend* en lanmen avek *US* pou zwenn nou pou anmenn linite nasyonal. Me malerezman zot *boycott* tou keksoz.

Zot *boycott* Lafet Nasyonal, Lazournen Konstitisyonnèl. Menm refize pou partisip lo bann Komite Nasyonal pou anmenn nou bann pei pli devan – parey *Platinum Committee*.

Mr Speaker, yer ler mon ti pe ekout lentervansyon Onorab William, mon'n apresye son fransiz e kouraz pou admet ki mannyer keksoz ti deroule dan lefase.

E in menm demann en leskiz, ki'n ganny byen resevwar par piblik deor. Sa ki pli enportan, in eksplike ki

mannyer ek nou, pa ek nou ti marse dan lefase.

Kot ou lapartenans politik ki ti determinen si ou pou ganny lasistans, *loan*, *scholarship*, travay e promosyon – kot tou lord ek triyaz ti ganny fer kot *Maison Du Peuple*.

E pou tir ek nou pa ek nou ek lapreferans - in ganny adrese anba rekomandasyon dan rapor *TRNUC*. Komisyon in rekomannde ki dan servis piblik, se sa ki merite, ki merit ganny travay. Pa aköz lapartenans politik endividi. Pa aköz faver ouswa *bribery*.

E deza nou Prezidan pe demontre sa atraver lapwentman dernyen group Anbasader – kot sa bann Anbasader ti admet ki zot ti sorti e menm *campaign* pour *US* dan lefase. I pa anpes nou Prezidan rekomann zot, e nou Lasanble mazorite *LDS* pou apwent zot.

Bann Manm lo lot kote latab pe dir ki travayer dan Gouvernman pe ganny *warning* aköz zot pe al *rally* *US*. Kan nou'n vwar dan portre – dan zot *rally*, kot enn de zofisye Gouvernman – enkli *DA* Mr Speaker, menm *DA* dan zot lenz *US* dan *rally*.

Lontan Mr Speaker, dir en *DA* desann dan *rally* Lopozisyon. Landmen i ti pou'n ganny gro pouse!

(APPLAUSE)

HON WAVEL WOODCOCK

Zot manz zot bannann apre zot sey anvoy zot lapo lo nou, parey zot labitid. Onorab Wilbert Herminie, dan son lentervansyon yer in dir ki; si Onorab William in ganny viktimize, ki mannyer in vin Anbasader ek *MNA*?

Mr Speaker, nou tou nou konnen ki mannyer keksoz ti marse dan lepase. Si ou siport zot, ou en *yes-man*. Ou pa kritik zot, ou pa koz kont zot – ou *ok*. Ou pou progrese anba sa sistenm.

Me le moman ki ou konmans dir zot kot zot mal, ou kestyonn zot – zot pa pou tarde pou fer ou pas par lafnet. Sa i en prensip *SPUP/SPPF/Parti Lepep/US*.

E zot in fer sa a plizyer repriz. Legzanp tipik se ler Lalyans Seselwa ti formen. Akoz plizyer bann *Leaders, ex Minis ek ex MNAs* ti sorti dan Parti Lepep pou *former* Seselwa.

Deswit Gouvernman ti fer kennsel pansyon bann Minis ek *MNA* ki pa ti ankor ganny 60an - zis pou pini zot Mr Speaker.

E parmi sa bann *ex Minis* ki ti ganny pini, sete pa lot ki Ton Yanm – papa Onorab Wilbert Herminie. I annan plis ki zot in fer ankor. Enkli solda dan *mask* Mr Speaker, antre

dan lakaz Onorab Mondon pou fer li per.

I annan ki ti perdi *license* tou Mr Speaker. Mon konnen Onorab Herminie i okouran.

Mr Speaker, laverite i enportan. Laverite i lakle. Se laverite ki pou liber nou. E ozordi atraver *TRNUC*, Seselwa in konn laverite. San laverite, napa rekonsilyasyon nasyonal. Sa ki ti dan fernwar in vin dan lalimyer.

Me Mr Speaker, pa tou dimoun ki kontan lalimyer. Zis parey ler ou met *on* lalimyer dan lakaz, tou lezar mangouya i taye i al kasyet!

(laughter)

HON WAVEL WOODCOCK

Ozordi, *United Seychelles* pe kasyet laverite. Zot pe reziste laverite. I annan Manm ki'n menm dir ki sa bann ka ki'n vin devan *TRNUC* i *hearsay* - i pa laverite!

Eski Brian Victor ti pe koz mansonz ler i ti pe rakonte dan *TRNUC*, ki mannyer li ek son de zanmi – Michael Hoffman e Sonny Elizabeth, ti ganny bate, torture, tenny sigaret lo zot - e ganny zete dan en ranpar. Zis Brian Victor ki ti sirviv Mr Speaker, avek bokou sikatris.

Eski Mr Walter Constance ti pe koz manti ler i ti vin devan *TRNCU*, pou koz lo son kouzen Claude Monnaie,

ki zot ti brile dan son *pickup* – ki dayer bann *perpetrators* in admet devan *TRNUC*? Sa lensidan ti ariv apre 1993.

E en Manm lo lot kote latab – Onorab Herminie ankor, Mr Speaker, ti annan lodas demann Komisyoner *TRNUC*; akoz ki zot in *investigate* bann ka apre 1993? Kan i konn tre byen ki apre 1993 en kantite atosite in ganny fer, e en kantite dimoun in ganny viktimize.

En rekomandasyon enportan ki *TRNUC* in fer, se ki lenvestigasyon i ganny fer par *ACCS* ouswa Oditer Zeneral, dan bann koripsyon ki'n ganny anmennen devan Komisyon. Sirtou kot i konsern *SMB* e Lafors Defans. Mon siport sa rekomandasyon, Mr Speaker.

Deza ka \$50milyon, ki dapre Mr Faure ti ganny transfer dan kont *SMB* devan Lakour. Kargezon zarm e aminisyon in ganny sezi kot lakour bann gran siporter *US* – ki osi devan Lakour.

Mr Speaker, mon pa konnen si zot ti pe *plan* en lot koudeta, me granmersi zot in ganny arete.

Lenvestigasyon lo plizyer ka pe ganny fer par *ACCS* – ki osi enkli bann ka later ki enplik *United Seychelles* e en ansyen Minis *SPPF/PL*, ki ganny osi mansyonnen dan

rapor *TRNUC* anba *final determination*.

Mr Speaker, Onorab Aglae in dir ki nou ti servi *TRNUC* konman nou seval batay pou ranport Eleksyon 2020. Mr Speaker, nou pa ti bezwen *TRNUC* pou ranport Eleksyon Lasanble Nasyonal an 2016. *TRNUC* pa ti egziste!

Nou pa ti bezwen *TRNUC* pou ranport Eleksyon Lasanble Nasyonal e Prezidansyel an 2020. Akoz *FPAC* anba direksyon Prezidan Ramkalawan, e travay ki *LDS* dan 6enm Lasanble ti fer - pou ekspoz koripsyon, gaspiyaz larzan e labi dan kont piblik – ti ase pou konvenk Seselwa pou tir sa ansyen sistenm o pouvwar!

Mr Speaker, i kler ki *United Seychelles* pa'n lir sa rapor. Dan sa plis ki 500 ka anba *final determination*, tou bann *perpetrators* i ganny mansyonnen. Si ou anvi konnen lekel bann *perpetrators*, alor lir sa rapor.

Mon bezwen koriz Onorab Herminie e fer li konnen ki *ex* Minis Dolor Ernesta i enkli dan sa rapor, akoz mon'n lir sa bann ka Mr Speaker.

(APPLAUSE)

HON WAVEL WOODCOCK

Mon konnen i difisil pou bann Manm *US* lir sa rapor, akoz zot

pa le krwar dan laverite. Laverite i ofans son met!

En lot rekomandasyon ki'n ganny fer par sa Komisyon, se ki in ganny fer resorti dan sa rapor - sa ki'n arive dan nou listwar i ganny entrodwi dan *curriculum* lekol, dan en versyon pli *child-friendly*.

Pour zenerasyon e fitir konn listwar Sesel e sa *legacy* bann vyolasyon drwa imen, pour ki i pa repet ankor dan nou pei.

Onorab *Leader of Government Business* - Onorab Georges in met bokou lanfaz lo en *memorial* pour bann ki'n perdi zot lavi, ouswa ganny viktimize anba ansyen sistenm.

Mwan mon sizere ki en plak avek tou non nou bann frer ek ser ki'n ganny touye e viktimize anba ansyen rezim, i ganny mete dan *Peace Park* pou *remind* nou sa ki'n pase, pou ki i pa zanmen repet ankor dan nou pei.

TRNUC in propoze ki en fon i ganny kree pou *raise fund* pour bann viktim. Mon siport kreasyon sa fon Mr Speaker. Me parey Manm in dir - plizyer Manm in dir; loter tou sa bann atosite ki'n arive dan nou pei, se pa lot ki Parti *SPUP/SPPF/Parti Lepep/US* ki'n fer.

Se zot ki'n viktimiz Seselwa. Sezi zot later. Bat zot.

Pous zot dan travay. Vyol nou bann zenn fiy. Fors nou bann frer ek ser an egzil. E pli move Mr Speaker, pran zot lavi.

US ozordi pa le pran responsabilite pour sa ki zot parti in fer. Zot pe rod tou sort leskiz pou zistifye aksyon zot parti ek zot bann *Leaders*. Pou zot pran responsabilite aksyon zot parti, ki zot merit fer Mr Speaker - se zot merit met zot dan soulye sa bann viktim.

Nou annan bann *MNA* madanm dan Lasanble. Lot kote latab nou annan Onorab Lemiel, Onorab Audrey Vidot - ki a plizyer repriz dan Lasanble zot in koz lo drwa bann madanm, e proteksyon bann madanm kont okenn labi.

Mon pou fer en referans avek en ka dan rapor Mr Speaker - ki enportan ki bann madanm dan sa Lasanble e lezot madanm Sesel i met zot dan soulye sa madanm.

En zenn madanm, en manman, son lakaz ti pe koule, ti pe avarye, ti pe vreman bezwen *loan*. I ti met en apwentman pou vwar en serten *Leader* akoz i ti pe ganny serten difikilte.

Ler i ti ariv kot lofis sa *Leader*, sa *Leader* ti fer son sekirite antre. Pas enn de komanter lo sa madanm. Ler sekirite i sorti, sa *Leader* Mr Speaker, ti *rape* sa madanm lo son latab dan lofis.

Ler i ti'n fini vyol sa madanm, i ti tir en larzan e anvoy lo sa madanm - e *threaten* li si i koze, i pou ganny touye. Sete pa lot ki per fondater ki ti *rape* sa madanm Mr Speaker! Sa ero ki *United Seychelles* pe glorifye! I dan rapor Mr Speaker.

Mr Speaker, mon ti a voudre vwar Onorab Vidot defann e lager pour sa madanm, parey i ti lager pour manmzel Nassim.

E ozordi zot annan lodas glorifye zot Prezidan per fondater, ki'n fer martir plizyer nou bann frer ek ser. Ozordi *US* pe koz lo tolerans e pardon. Me fodre nou viv la tolerans ek pardon. Fodre donn legzanp.

Zanmen mon pou bliye apre *speech* Bidze Onorab Zialor, bann siporter *US* enkli ser *Leader* Lopozisyon, ti *threaten* pou tir son ledan avek son bekir.

E la ankor avantyer apre *speech* Onorab Zialor, zot in *threaten* li ankor, Mr Speaker. Zot in dir ki si zot ganny Eleksyon 2025, Onorab Zialor pou *end up* dan lakanbiz. Zot pou pini li. Napa kalite komanter zot pa'n fer lo son dezabilite ki pa gou repete Mr Speaker.

Komisyon i fer rekomandasyon ki lenvestigasyon i ganny fer dan bann *unlawful killings*, *torture* ek *enforced disappearance*. Me

fodre pa bliye, ki i annan osi *forced exiled* osi.

Lo Praslin i annan plizyer ki ti ganny forse al egzil, e zot propriyete ti ganny sezi. Zot ti pran stasyon Mr Desaubin, Baie Ste Anne. Mr Robert Andre ti ganny bate e forse ansanm avek son madanm lo avyon pou al Mahe. E ganny forse pou al egzil. Ti annan bokou temwen sa zour.

Mr Dan Payet ki en zonm ki'n fer bokou pour Praslin, osi ti bezwen sov Sesel. Akoz i ti anba *house arrest* e ti ganny sirveye zour e nwit par lapolis. San bliy Mr Antonio Morin ki ti ganny bate ziska ou pa ti rekonnet li. E fors li lo avyon pou li al an egzil.

Mon siport sa rekomandasyon pou *investigate* lanmor lo bann frer ek bann ki'n disparet. Ankor enn fwa, mon met mon dan soulye en frer ki ti disparet. E mon demann mon bann koleg - sirtou lot kote latap, pou fer parey. Sa ka, ankor, i dan rapor *TRNUC*.

Zis mazin, ou kit kot ou, ou pe al zwenn en zanmi. Petet ou pe al *Boardwalk*, ouswa Praslin - ou pe al *Breeze Garden*. Dan milye semen ou ganny bloke par de transpor. Fors dan en lot transpor. Ou ganny bate, trennen e anmenn dan en Kan Larme kot ou ganny bate, torture.

E ler ou refize koze, Prezidan i dir ou si ou pa koze zot pou tir ou zong. Ler ou refize koze, zot tir ou zong, apre zot kou, koup ou an pti morso – menm si ou ti ankor vivan. Met ou dan en sak goni, e al zet ou dan en milye kannal.

Ladan menm enn sa bann solda – i dan rapor Mr Speaker, ki'n donn lanmen tortir ou, i gard ou *sunglass* konman souvenir. Ou madanm, ou zanfan, ou paran pa konnen kot ou ete. E zot pa'n zanmen vwar ou ankor. E US i annan lodas zistifye sa.

Sa Mr Speaker, sete nou frer Hassan Ali ki ti pas ladan. E sa Prezidan ki ti donn lord sete ero larevolisyon, per fondater, Prezidan France-Albert Rene.

Malgre tousala, US i refize demann pardon pour sa bann atosite. Pou pran byen malaki, later, *building* i ok. Me pou demann pardon e pey konsekans – pou pey konpansasyon, pa ok. Lepep Seselwa pe note.

Mr Speaker, mon senserman krwar ki US i bezwen partisip dan reparasyon. Zot bezwen kontribye dan sa fon, atraver bann byen malaki ki zot in akimile.

Deza zot pe taye pou vann zot bann later – *asset* ki zot in gannyen pou naryen,

pangar sa bann later i ganny rebran avek zot. Sa ki zot in vann i merit ganny sezi e met dan sa fon pou al pour bann viktim.

Onorab Vidot ti dir ki sa ki travay ki ganny larises. Me en kantite nou bann frer ek ser in travay e zot larises ti ganny sezi e partaze parmi dalon. Wi, Mr Speaker, lanmen ki travay ki ganny larises. Me lanmen ki vole osi i ganny larises. Me byen malaki pa zanmen prospere.

Mr Speaker, ozordi nou pei i annan tolerans, laliberte lekspresyon. Personn pa pe disparet akoz zot pa siport en parti politik. Dimoun i lib pou afilye avek okenn parti politik.

Personn pa pe ganny kondannen san zize, parey Mr Robin ek Joachim Sullivan ki ti ganny met dan prizon pour 1an e 19 zour.

Personn pa pe ganny viktimize parey lafanmir Grandcourt ki zot later ti ganny pran pour R1 – apre pli tar ganny *lease* avek MNA US.

Annefe Mr Speaker, telman i annan laliberte ozordi, de nouvo parti bann ansyen siporter US fek formen. Parti Mr Marco Francis ek mouvman Mr Christopher Lespoir. Zot lib pou form zot parti. Kontrerman ki US pe dir ki LDS i le vin sel parti Sesel.

Me nou konn tre byen Mr Speaker, ki byento US pe al

diviz ankor en kou, e pou annan ankor en nouvo parti Sesel byento. Sanmenm ki *Leader Parti US* pe dir; ki zot pa kapab *afford* en lot divizyon.

Telman i pe ser lanmen Mr Dick Esparon dan *rally* Sanmdi pase, ou a krwar i per si i large i al net!

(laughter)

HON WAVEL WOODCOCK

En lot rekomandasyon enportan se kreasyon en *task force* pou ed bann dimoun ki'n disparet, pou konnen kot zot in ganny antere.

I malere ki ozordi nou annan en kantite nou bann frer ki'n disparet. Ki fanmir ek zanmi pe priye ki en zour zot ava konnen kote lekor zot pros in antere. Sa i enportan akoz i pou donn *closure*.

Mr Speaker, Onorab Lemiel in dir ki se bann solda ek bann *state agent* ki'n fer sa bann atosite, me pa li.

Me sa ki pa dir se ki sa bann solda – sa bann Tonton Makout, ti pe pran lord avek per fondater son parti, direk sorti *Maison Du Peuple*. *Maison Du Peuple* en byen malaki ki son parti in vole – en donasyon pep Algérie.

Sa bann solda – sirtou sa bann *state agent* ki ti mars dan loto 1122, in fer en pake krim lo non Parti *SPUP* - ozordi

US e anba lord Prezidan Sesel sa letan.

Onorab Vidot in koz lo met pwazon dan delo. Pa fodre i al lwen pou ganny sa lenformasyon. Zis demann son koleg pa lwen avek li, i ava donn li plis detay lo met pwazon dan delo *NYS*.

(laughter)

HON WAVEL WOODCOCK

Zis pou fer referans avek en ka – Ka 022, kot solda ti bat, tortir e koup lanmen e ledwa de zenn garson. Eksploz zot dan loto dan prezans en ansyen Prezidan. Apre fer krwar zot ti pe fer bonm.

Senm papye *MPR* otour loto pou donn lenpresyon ki zot ti pe al met bonm. Bann zofisye lapolis ki ti fer *investigation* sa letan - e baze lo bann levidans, i montre klerman ki sa ti zis en *setup* pou touy sa de zenn - Simon Desnousse ek Mike Asher.

Mr Speaker, bann Manm *US* in koze pou zistifye koudeta. Mon osi mon'n fer mon resers. Mon'n koz avek mon granpye. Bann dimoun ki bokou pli aze ki mon ek plizyer mon bann *mentors* ki par lao 70an - en keksoz i kler;

Kot i konsern devlopman Sesel - en pti pe avan 1977, Sesel ti deza pe devlope. Sesel ti pe al dan bon direksyon. *Airport* ti ganny fer an 1972 ki'n ede dan

devlopman nou pei, menm si sa letan Mr Rene pa ti an faver touris vin Sesel, akoz dapre li zot ti pou vin domin nou.

Bokou semen otour Mahe ti'n fini ganny fer. *Cargo* ti pe antre lo por. Nou ti annan plizyer *hotel resort* Sesel. Avan 1977, nou ti annan plizyer investiser ki ti anvi investi dan proze mazer dan nor, ki ti enkli en *multipurpose resort* avek *marina*, ek lezot fasilite ek servis.

Sa bann proze ti ganny bloke par Mr France-Albert Rene sa letan. Avan '77, plizyer later ti'n ganny idantifye pou konstri *social housing*. E travay ti'n deza konmanse Pointe Larue. Travay ti deza pe ganny fer pou donn ledikasyon pli avanse – menm aletranze.

Bann etidyan ki ti fer byen lekol ti ganny sans al kolez, irelevan ki fanmir zot sorti ladan - ouswa ki kouler zot lapo.

Ler *International School* ti ganny etabli, Prezidan Rene pa ti le Seselwa i al dan sa lekol, akoz i ti le ki tou zanfan i al *NYS* pou ganny andoktrinen. Nou ti annan dokter, avoka, ziz e lezot profesyonnel avan 1977.

Dan konstriksyon nou ti annan bann bon labourer ki'n fer bann travay ekselan. Selman ler zot, zot ti fer koudeta le 5 Zen, se Afriken ki

ti donn zot lanmen pou swadizan liber nou.

Mr Speaker, le 5 Zen ti annan en gran traizon Sesel, ki ti ganny fer par en Minis dan Gouvernman Sesel, kont son prop pei. E traizon i krim pli pir ki en endividi i kapab fer kont son pei.

Koudeta pa ti neseser Mr Speaker. Akoz koudeta, bokou nou bann frer ek ser ki ti kapab kontribye dan devlopman nou pei, ti bezwen sove e al an egzil. En bann, pardfors.

E sa se bann Seselwa ki sorti dan tou kours nou sosyete ki ti bezwen kit Sesel akoz rezim *SPUP/SPPF* - ozordi *US*.

Parti *US* i konnen ki mannyer zot in fer Seselwa soufer. Zot in dir ki zot Per Fondater i en ero. Me lekel sa ero ki ler i mor ou bezwen met li anba de *layer* beton, e met *camera* pou vey son latonm?

Telman ou pa fye Seselwa - pou anter en per fondater, ou bezwen pran travayer konstriksyon Endyen pou met beton, Mr Speaker!

Mr Speaker, i malere ki *United Seychelles* i en parti ki pa'n zanmen annan bon lentansyon. Nou kapab ziz sa atraver entervansyon Onorab Cosgrow, kot in dir ki – ou war i kler poudir zot lentansyon se pou dimoun mont lo semen.

Zot lentansyon se pa linite nasyonal. Me se zot laswaf pou retourn o pouwar pou reganny zot bann *perks*, zot bann byen, zot bann aki Mr Speaker.

(APPLAUSE)

HON WAVEL WOODCOCK

Sa ki zot anvi Mr Speaker. Pa linite nasyonal! Koudeta in arive, en cours nou popilasyon in soufer, e la nou bezwen rod *the way forward. The way forward* se pou nou – se pou nou tou aprann par nou bann fot lefase.

Vin ansanm e travay avek tou nou diferans lopinyon, lapartenans politik, pour byennet nou pei. Me premye pa se admet kot nou'n fer mal, demann en leskiz, e ede pou donn *closure* e reparasyon bann ki'n soufer.

Mr Speaker, anba Lalwa zeritye i pa erit zis byen, me osi, det ki son paran dan sa ka Per Fondater in kit deryer. Ou pa kapab aksepte tou byen, erit tou larzan, later e *asset* – me refize pey bann det. Ou pou an defo avek Lalwa.

Si France-Albert Rene i ou Per Fondater e ou, ou en zeritye, ki mannyer ou kapab refize, ki mannyer ou kapab ekspekte ki ou pa pou bezwen pey son det -pey det sa ki ou drwa tou son bann viktim?

Mon pe enplor nou bann frer lo lot kote latap, pou fer zot bout. Annan en pe konpasyon pour bann ki'n soufer! E ede dan sa demars pou *compensate* zot. I konmans avek zot. Zot in ase akimile dan lefase. Zot in vin milyonner lo lasyer Lepep Seselwa! Fodre ki zot osi zot fer en kontribisyon pou anmenn linite dan nou pei.

Mr Speaker, mon pou osi profit sa lokazyon – an konklizyon, pou senpatiz avek tou bann viktim, lafanmir bann ki'n perdi en pros anba ladministrasyon *SPUP/SPPF/Parti Lepep/US*. Avek sa de mo, mon dir ou mersi Mr Speaker.

(APPLAUSE)

MR SPEAKER

Mersi. Mon pou pran...

(Off-Mic)

MR SPEAKER

Mwan mon lopinyon se ki *point of order* pe ganny servi pou met retar Lasanble.

Mon respekte drwa tou Manm pou zot lev en *point of order*. Selman mon pa pou aksepte ki i ganny servi pou zis mannevre lo en fason ki pa an faver en bon travay dan Lasanble.

Mon pou ekout en *point of order*. Mon a donn Onorab Vidot en *point of order*.

HON AUDREY VIDOT

Mersi Mr Speaker. Mr Speaker parey ou'n war - letan Onorab Woodcock in fer son prezantasyon, mon pa'n enteronp li. Mon'n esper apre son diskour pou mon kapab demann ou laparol. Mon'n annan en *matter of privilege*.

MR SPEAKER

Wi?

HON AUDREY VIDOT

Onorab Woodcock dan son deliberasyon in *input improper motive* konmkwa ki mwan mon ti pe defann en Nassim Onezime.

Eski i kapab prouv ek Lasanble ki konmkwa poudir mwan mon'n fer en tel keksoz? Mon rapel mon ti anmenn en kestyon devan Lasanble pou rod lenformasyon lo lafason ki lafors in fer en prosedir.

So, si Onorab Woodcock i kapab *prove*. Si non, i bezwen *retract* akoz i pa akseptab!

(APPLAUSE)

MR SPEAKER

Mersi Onorab. Mon a regard *verbatim* pou mwan gete ki Onorab Woodcock in fer. Lasanble, nou a pran *break* la

e nou a rebran deba 2er. Mersi.

(BREAK)

MR SPEAKER

Bonn apre midi tou dimoun, Onorab, zofisy e piblik. Lo kote Lopozisyon mon krwar i reste zis Onorab Johan Loze pou pran laparol. Onorab, si ou'n pare?

HON SEBASTIEN PILLAY

(Off-Mic)

MR SPEAKER

Onorab Pillay, mon pa pou konmans avek en *point of order*. Mon pou donn laparol Onorab Loze?

HON JOHAN LOZE

Mersi Mr Speaker. Mersi pou donn mwan laparol. Mr Speaker, pou konmanse mon oule dir konmkwa ki i annan lespwar. Mwan mon konvenki ki i annan lespwar.

Sesel i en pei ki afilye fortman avek *La France*. E bokou Seselwa sak fwa i apel Lazournen *la Bastille* le 14 *juillet*, zot kontan ale partisipe avek nou bann koleg Franse e selebre lazournen zot revolisyon.

E pep Franse zot zwenn ansanm pou selebre sa zour. E napa personn *La France* ki evok sa ki i ganny *connu* konman *Règne de la Terreur* ki

ti anmennen par en de nonmen Maximilien de Robespierre.

Kot 300mil - sote 300mil Franse ki ti ganny arete lo *suspicion*. Ladan 10mil ti mor dan prizon san zize, san naryen, san konnen. 17mil ofisyelman egzekite. E i annan ankor lanmor ki'n arive otour sa size.

Si en pei parey *La France* ki'n pas atraver sitan kantite atosite - sitan kantite atosite otour son revolisyon - in nobou sirmont sa bann keksoz, mon konnen ki i annan lespwar pour nou Sesel koman en pei.

Evantelman zwenn ansanm inifye, koste koman en pep. Alors mon personnelman mon pa pou...ki manyer mon kapab dir sa? Mon pa pou tonm dan pyez sa bann marsan maler ki pe sey vann nou en lespri ki i annan divizyon, i annan mank linite. I annan isi, i annan laba. Wi, nou annan nou diferans.

Mr Speaker, mon lot pwen; Prezidan Larepublik i Sef Legzekitiv pei. Koman Sef Legzekitiv pei i son devwar konstitisyonnèl pou li egzekite.

Nou, isi dan Lasanble Nasyonal – pou servi parol Onorab de Letourdie, ki *connu* konman Manmi Jenny; nou bann parlamanter nou la pou parle - menm si i annan bann

letan pe parle zot plito bann manter ki parlamanter. Be selman, nou bann parlamanter. Nou la pou parle. Nou en *talk shop*, nou zis koze.

Me Prezidan li par kont i annan tou pouvwar Legzekitiv pou li egzekite. E kwa ki i kapab egzekite la? I kapab egzekit lo sa rapor. I kapab egzekit lo bann rekomandasyon. I kapab *move forward* e soulaz sore bann viktim.

Tou sa pouvwar i dan lanmen Prezidan. I pa nesese fer sa *song and dance* ki nou pe fer ozordi. Prezidan i kapab egzekit tou rekomandasyon sa rapor. Prezidan, annou get en lot bout. Lalwa *TRNUC* pa *provide for a successor body*.

Pa'n zanmen annan lentansyon en *successor body*. Sa i en lenvansyon bann Komisyoner zot menm. E mon prezimen i ansanm avek politisyen ki al dinen, fete ansanm avek Komisyoner, Quincy. Ki al dinen fete ansanm ek Komisyoner dan Zarden Lerwa.

So, mon pe dir alors, i politisyen avek Komisyoner ki'n *come up* ek *successor body*. Mwan personnelman mon napa problem ek *successor body*. Selman sa ki mon pe dir, i pa dan lalwa *TRNUC*. I en nouvo lenvansyon.

Be, si nou *cut out* sa *successor body*, ki i arive? Ki vedir ki bann rekomandasyon egzistan i bezwen ganny imedyatman aplike. E lekel ki pou aplik li? Prezidan - Sef Legzekitiv. So, *we go back to him* ankor la, en?

Sa zonn ki'n ganny elekte par en mazorite *vote*, pou pran son responsabilite e egzekut lo nou *behalf* la nasyon Seselwa. Zot vwar manner i zoli la?

So, konmsi ennler ou zis *wish* ki i ti annan sa kouraz. I ti kapab fer sa ki sa nasyon in met li la pou fer, dan plas vin kasyet deryer nou ledo isi anba. Akoz sa i apel kasyet deryer nou ledo sa, nou bann kanmarad Onorab. Zot vwar manner keksoz i deroule. Bon mon a kontinyen eksplik zot.

Mr Speaker, en lot bout dan sa keksoz la ki nou bezwen vwar. Se ki manda Komisyon - ki dan Lalwa en, nou koz Lalwa la.

Manda Komisyon ki dan Lalwa i 1977 a 1993. Komisyon i asiz la anndan i dir nou poudir zot ti *extend* zot manda, akoz Komisyon ti santi, *hmm* - Komisyon ti santi ki sa menm Gouvernman ti la.

Now, eski santiman Komisyon i legal? Eski santiman Komisyon i annan *un appui légal* par deryer ouswa non? Eski Komisyon ti *derive* son pouvwar *from* son

Lalwa, ouswa *from* son santiman? Be ler Komisyoner ek politisyen pe dinen laba Quincy, zot pa diskite tousala?

Komisyon ti'n kapab santi e donn nesans son santiman atraver Lezislasyon, par amann Lalwa *TRNUC* e donn son lekor en pouvwar lezitim pou kouver 1977 ziske 2020 - parey zot dir ler *LDS* in antre o pouvwar. Zot ti'n kapab fer sa.

Zot pa'n fer li. Ler zot pa'n fer li, ki zot in fer la? Zot in kit en sityasyon vag pour tou sa bann dimoun ki'n al devan Komisyon avek *genuine, legitimate concerns*, par lao '93. Zot in ale zot. Zot in prezant zot *case* zot. Be demen si sa i al devan Lakour? Mon pe koz ou Lakour la, en. Mon pa pe koz ou okenn...Si i al devan Lakour.

E si i annan kontansyon. E si okenn dimoun ki lev kontansyon i lev sa senp zafer ki mon pe dir la, Ki pouvwar legal ki Komisyon ti annan? Ki Komisyon pou dir? Komisyon ti santi ki...

Zot pou al dir sa devan Lakour? Zot in fer dimoun vini asiz devan zot, eksprim son santiman pli profon, met son douler deor baze lo - Komisyon ti santi ki? Zot pa santi ki i annan en keksoz mal ki'n pase la?

Be *monsieur le politicien*, ler ou ti pe dinen avek

monsieur le Komisyoner Quincy, zot pa ti diskite pou amann Lalwa? Ou konnen, mon pa en malen boug mwan, be bann malen boug...Ou konpran, zot ti'n devret fer sa pti bout.

Akoz la, la nou koz bokou lo traizon. La in vin en traizon. Tou sa bann dimoun ki'n aparet devan Komisyon, ki'n al prezant zot *sore*, zot *case* – '93 an montan. *Immediate betrayal!* Akoz tou sa ki zot in fer devan Komisyon la, zot in fer baze lo; "Komisyon ti santi." Pa lo legal.

Bon, nou ava kontinyen Mr Speaker. Mon krwar nou'n byen komanse. Nou lo en bon direksyon. Bann dimoun ki ti ekrir sa Lalwa, bann dimoun ki ti lo sa Komite Lasanble ki ti diskite sa Lalwa, ozordi zot anmenn sa Mosyon. Mon prezimen se bann dimoun ki'n ekrir lanmwatye sa Lalwa.

Now, boner mon tande mwan;

"Nou pa pou pey dan larzan Leta. "

"Nou pa pou pey dan *taxpayers money!*"

"Nou pa pou pey dan larzan Seselwa, aköz sa pou fer pansyon mont pli o! "

"*Perpetrators* ki pou peye!"

Be, Lalwa ti ekrir an 2018. Konm dir sanson; in tar la. Ler zot ti ekrir Lalwa, aköz zot pa ti met dan Lalwa? Akoz

zot pa ti met dan Lalwa? Zot malen zot. Zot pli malen ki mwan. Zot konnen, zot pli konnen ki mwan!

Be mwan avek tou mon bet ki mon bet, sa msye ki'n anmenn sa Mosyon li menm li ki ti ekrir sa Lalwa. 2018 ler ou ti ekrir Lalwa msye, aköz ou pa ti met dan ou Lalwa ki *perpetrators* ki pou peye? Akoz ou pa ti met dan ou Lalwa ki pa pou sorti dan *taxpayers money?*

Nou pa pou fer monte laz pansyon. Tou sa bann lemosyon ki zot in asize pandan 3 zour, aköz zot pa ti mete? Akoz zot pa ti met en *successor body* - me zot ti *design* sa Lalwa en fason ki i vini pour 3an, i fer son travay, i fini.

E i donn satisfaksyon tou sa dimoun ki'n vin devan. I donn zot en satisfaksyon. I donn zot en *closure*. In donn zot en finisyon.

Akoz la apre zot pe met pon, zot pe fer zafer pli long? Akoz zot pe fer pli long la, zot met *successor body*, zot vin rod tou sort kalite lipou? Akoz zot, zot pa respe sa ki zot, zot ti fer? Akoz zot pa respe lentansyon zot Lalwa ki zot, zot in ekrir?

Ou'n ekrir Lalwa, prezan ozordi ou anmenn en Mosyon ki ou rod en lipou, ki pa dan Lalwa – ki ou menm ou ou'n ekrir. Be ou pe sey abiz

konsyans lekel la? Sertennman pa mwan! Mon ou kapab asiz la en zournen antye, maltret mwan si ou anvi. Loze mazanbik epe li.

Be sa viktim? *Is it fair or is it* traizon? Ou pa fer sa ek dimoun. Ou pa fer sa ek dimoun. Sa move dimoun sa ki fer sa ek son prosen. Ou pa fer en keksoz koumsa!

Mr Speaker, be ki manyer zot in ekrir Lalwa? Zot in ekrir Lalwa avek en lentansyon restorativ, mon krwar. Ou pa ti kapab oule anmenn linite avek pinisyon.

Mon krwar zot ti le anmenn linite atraver restorasyon. I pa ti pou pini en tel bann konversasyon ki mon'n tande ozordi. Akoz ozordi konversasyon sa dernyen 3 zour in vin pinitiv.

So, lentansyon zot, ler zot ti ekrir Lalwa, i ti restorativ. So, zot in ekrir Lalwa avek en lentansyon restorativ ki ti pou anmenn avek li restorasyon, konpasyon, pardon.

Sanmenm sa ki anba Seksyon 12 (6) *in provide* pou en *perpetrator*, i vin devan e i kapab demann *amnesty*. I kapab resevwar pardon.

Be ler en *perpetrator* i vin devan, i demann *amnesty*, i resevwar pardon – sa i fer en keksoz enteresan sa. I donn li iminite kont prosekisyon, *both civil and criminal*.

Be, sa msye ki'n ekrir sa Lalwa li, i annan en rezon in met *civil and criminal*. Akoz mon krwar sa msye i konnen se ki i rod domaz, i konsern *civil prosecution*.

In met en fason sa Lalwa, ki sa dimoun ki vin devan i demann *amnesty*, i ganny pardon. I kapab ganny iminite kont prosekisyon *civil* ki son bann byen i ganny proteze - akoz li in demann en pardon.

E sa i fer ou kler poudir lentansyon sete restorasyon, non pa pinisyon. Bon. Be selman petet la nou zis repete poudir i *provide amnesty* kont prosekisyon, en?

Lalwa i osi *provide* – si mon pa tronpe, anba son Seksyon 7; *that you are entitled to reparations*. Be vi ki TRNUC li i pa ti en Lakour, i pa kapab fer en lord pou pey reparasyon.

I pa kapab fer en lord pou sezi byen. I pa kapab fer en lord. Sa ki i fer i donn en *finding* konmkwa ki sa viktim i *entitled* pour konpansasyon.

Be in osi *go further*. TRNUC in dir se Leta ki pou peye. Sa i kler sa. TRNUC in dir; Leta i a peye. Bon.

Prezan i anmenn mwan pou poz en kestyon mon bann koleg. E pou poz en kestyon sirtou, sa msye ki'n anmenn sa Mosyon. Eski zot krwar dan la demokrasi? Eski zot krwar dan *due process*? Ouswa zot

en bann dimoun ki krwar dan fer zafer, deryer zafer.

Akoz ki mon pe trouve ozordi? *TRNUC* ki *operate* anba en Lalwa, in vini, i annan en misyon. In fer son misyon pandan 3an, in fini. In fini.

Ler son misyon i fini, zot tou zot vini zot dir ek nou; demann pardon, ouswa ou byen pou ganny sezi. Ouswa ou propriyete pou ganny sezi - pou met *injunction* pou anpes ou *trade*, pou anpes ou isi, pou anpes ou laba.

Fer mon poz en kestyon – bet ki mon bet mon Loze. Be, pandan 3an sa *process* in *go on*. Ozordi zot tou zot pe dir; *Leader United Seychelles* bezwen demann pardon. Par deryer *process* sa en. Ler *process* in fini, laport in fermen.

But during the process, i pa'n ti'n kapab ganny kriye? *United Seychelles* pa ti'n kapab ganny somon parey tou lezot - par *TRNUC* e dir; nou pe al fer en determinasyon kont ou. Ou vini ou asiz devan nou, ou koze, ou eksplik ou lekor - nou, nou kestyonn ou.

Due process - part of the process. Eski *United Seychelles* in ganny apele? Eski *United Seychelles* in ganny apele *as part of the process* pou fer en determinasyon parey tou lezot? Ouswa i pe prezan

ganny apele en *perpetrator* deryer laport?

Paske la, nou tonm lo size reprezantasyon egal devan Lalwa la. Serten *perpetrators* in ganny apele. En determinasyon in ganny fer kont zot. Sa kestyon in ganny diskite. E ou konnen ki zot in gannyen zot? Zot in ganny loportinite pou zot *seek amnesty*. E ki *amnesty* in fer?

In donn zot proteksyon kont proseksyon *civil* e kriminel. So i annan en bann ki zot, zot in ganny *due process*. E *due process* in donn zot proteksyon legal.

Prezan i annan en lot li. Parti *United Seychelles*. *Monsieur le malin* ki'n ekrir Lalwa, ki'n al dinen, manze, bwar avek *Commissioner*. Ni li, ni *Commissioner* pa'n mazine pou apel Parti *United Seychelles* – enkli li dan *process*.

Non. Nou les *process* fini terminen. Prezan nou tou nou deside - ou koupab, ou en *perpetrator*. Demann pardon, *or else!* Be lekel ki dir ou si ou ti'n enkli li dan *process*, pardon pa ti an ganny demande – ti an fini?

La, pa pardon ki zot pe demande la. Zot pe rod *self-incrimination* la. Zot pe demann Dirizan *United Seychelles* pou vin donn levidans kont son lekor ek son parti.

Akoz la, *it's no longer part of the process* la. La zot pe sers *self-incrimination*. Be non, be bon dimoun pa fer sa. Ou konpran? Bon dimoun pa fer sa. Be ou pa en bon dimoun ler ou fer sa. Sa dimoun visye ki fer! Dimoun visye ki fer en keksoz koumsa.

Prezan zot krwar ki nou, nou sitan bet ki nou pa trouve ki zot pe rode. Zot krwar nou, nou pa trouve ki *perpetrators* ki'n komet lakt - letan in pas atraver prosesis etabli, i ganny proteksyon legal.

United Seychelles ki li i pa'n komet lakt - be i pe ganny akize atraver lasosyasyon, atraver isi, atraver laba, li i vini i donn levidans kont son lekor *after the fact* - *incriminate* son lekor. Be zot malen zot, en. Zot malen, nou, nou bet.

Selman Lalwa zot ki'n ekrir. Zot ekrir Lalwa ki pa ti zanmen annan okenn lentansyon pour *perpetrators* pey ka akseswar. Apre zot anmenn Mosyon zot dir *perpetrators* peye.

And *on the top of your heads*, zot deklar *United Seychelles* en *perpetrator*. En, Mr Speaker? Ou - ki'n prezid lo sa *travesty*. Ou - ki'n prezid lo sa *travesty*. So, malen boug. An 2018...

MR SPEAKER

Onorab, ou pe akiz mwan kwa la? Mon'n prezid lo sa *travesty*? Sa i enplik *improper motives*.

(Interruption)

MR SPEAKER

Silvouple, gard ou *speech* annord e evite akiz mwan.

HON JOHAN LOZE

Mersi Mr Speaker. Mon ava zis met lo rikord ki pa ou ki ti pe prezid lo zour ki Onorab Georges ti prezant sa Mosyon, avek tou sa bann zimnastik ki in vin fer, ki pa ti dan sa Lalwa ki li menm li in ekrir.

Pa ou ki ti prezide sa zour Mr Speaker. Pa ou ki'n les li fer sa. Ou pa ti la dan Lasanble. Ou pa ti la. Mon konpran i fermal pou ou Onorab Georges. Ou bezwen koze. Ou vin rouz pov pti bet. Mr Speaker...

(Interruption)

HON JOHAN LOZE

Zot *ok*? Zot *ok*? Mon kapab kontinyen?

MR SPEAKER

Ou kapab kontinyen wi, me selman gard ou *speech* annord silvouple.

HON JOHAN LOZE

Be mon *speech* in annord *throughout*.

MR SPEAKER

Non.

HON JOHAN LOZE

Mr Speaker, ou pe zis rod en rezon pou koup mwan.

MR SPEAKER

Mon pe dir ou...Onorab! Onorab. Mon pe envit ou fer ou *speech* annord, e mon pa a bezwen aret...Ni pez bouton pou soz. Ni fer okenn lot keksoz pou aret ou. Mersi.

HON JOHAN LOZE

Alright. Mon *carry on* la? Bon. Dan lespri gard *speech* annord – an lannen 2018 Mr Speaker, sa Komite Lasanble ki ti travay lo Lalwa, zot ti fer en prezantasyon zot kot ICCS. Nou pou eskiz Onorab Georges akoz i pa ti la sa zour. I pa ti dan pei mon krwar.

Be enteresan Onorab Basil Hoareau sa zour ti dir ki pou napa okenn *perpetrators* ki pou pey ka akseswar. E son largiman ki li i ti avanse sa zour.

I ti dir; akoz ou kapab annan ou en sityasyon kot en dimoun li in ganny aflize par en *perpetrator* ki annan larzan, e li i a benefisyè. Be en lot li son *perpetrator* napa larzan. I pa pou ganny naryen.

Lentansyon – lentansyon depi *back then* ler zot ti ekrir

sa Lalwa sete ki; pa *perpetrators* ki ti pou peye.

Ou war. Mon pa konnen ki bor ki zot pe koz lalang – si ozordi, si an 2018, mwan? Me selman lentansyon an 2018 sete ki *perpetrators* pa pou peye. Sete Leta ki ti pou peye.

Mr Speaker, nou'n arive ozordi, kot zot in fer tou sa teat. Zot in re ouver boubou, e re bles leker bann viktim. Zot pe set kondisyon pou fer sa prosesis al endefiniman. Nou pa konnen kan pou fini la.

Ti en prosesis ki ti pou al 3an – fini. Zot pe set kondisyon pour sa pei annan ankor divizyon e plis divizyon. E mon pa konnen lekel ki'n prezid lo la mwan? Mon pa kapab dir lekel ki'n prezid lo la. I en misterye lekel ki'n prezid lo sa travesti. Be nou *carry on* dan lape e linite.

Lot keksoz ki mon war zot in fer se; sa prose in ganny servi pou zis batonn defen France Albert Rene. In mor li. I pa kapab defann son lekor.

I pa kapab vin reponn naryen ki ganny dir. Ki swa in ganny dir par viktim, ouswa ki pe ganny servi par politisyen pou avans zot azanda ver vol Eleksyon 2025. I pa la li. Zot pe akiz en zonm mor, tou kalite keksoz.

En lot keksoz ki mon'n vwar deroule se ki; bann ki'n byen pase, in byen aranz zot, in byen gonfle anba sa sistenm

– ozordi zot dir tou kalite keksoz Mr Speaker.

Mr Speaker, mon a met en keksoz devan ou; si mwan mon apwent ou dan en pozisyon, mmm - prezan ler ou dan pozisyon, ni en let ou pa kapab ekrir. Mr Speaker, eski sa i apel viktimizasyon?

Be si prezan *further*, ou pa kapab ekrir en let, mon bezwen apwent en sekreter pou ekrir let pour ou. I apel viktimizasyon sa Mr Speaker? Ouswa i apel soutire?

Be si mon anvoy ou Anbasader, ni en let ou pa kapab ekrir. Mon bezwen anvoy pov sa pti fiy ekrir let pour ou, i apel...?

MR SPEAKER

Arete! Ou pe akiz Onorab William.

HON JOHAN LOZE

Mwan?

MR SPEAKER

Wi!

HON JOHAN LOZE

Mwan?

MR SPEAKER

Wi. Ou pe akiz Onorab William. Sa i kler. Arete silvouple! Onorab Vidot...

HON JOHAN LOZE

Mon kontan mon bezwen arete, parske mon ti krwar nou'n fer 3 zour...

MR SPEAKER

Espere. Onorab Vidot, ou'n enteronp mwan 3 fwa la, e fer li dernyen fwa. Onorab Loze, silvouple...

HON JOHAN LOZE

Mr Speaker, mon demann ou leskiz.

MR SPEAKER

Ou lentansyon i kler. I lentansyon i kler. Alor ou bezwen evite akiz Manm.

HON JOHAN LOZE

Mr Speaker, mon demann ou leskiz akoz mon ti krwar sezon lakizasyon in refleri. Akoz 3 zour mon non in ganny nonmen, ou vwar! Mr Speaker, be prezan mon a met en lot zafer devan ou, en. Ou dir mwan si mon byen, si mon mal.

Dizon 2 zonm pe lager en pti madanm, *hmm?* En? Dizon. Zot pe lager galan zot. Eski sa en parti politik ki pou ganny blanmen?

Konmsi si enn ti pou fer ou sot lafnet galan, mwan koman en Manm *United Seychelles*, mon bezwen responsab ou lager galan avek en lot Dirizan *United Seychelles*, ki ti asiz lo cc

ansanm ek ou sa letan? Mwan mon pa ti ladan mwan.

Ki manner nou, sa 10 nou isi nou responsab zot lager galan zot de? Sak sesyon Lasanble nou, nou bezwen ganny blanmen, sot lafnet. Ti pou fer kanmarad sot lafnet galan!

Les mon arete, mon pa pou al pli lwen, en, akoz sansan pa pou gou la anndan. So, mon krwar ti'n kapab aranze avek en pti pe disiplin personnel ek kontrol lo nou pantalon – ki ozordi Parti *United Seychelles* pa ti pou ganny blanmen pou lager galan ant de zom, Mr Speaker.

Be selman mon pe dir ou, sa bann dimoun zot in byen gro, zot in byen gra, zot in byen gonfle dan *United Seychelles* avan zot in ale zot. Ziske sa ki drwa larzan vye tantin ki zot in vole, pou rann. Selman, sa i bann lot keksoz.

Be Mr Speaker, petet en keksoz ki a pli enteres ou, ou. Larzan le 3 Oktob, 2006 - lekel ki ti peye, *perpetrators*? Lekel sa *perpetrators* ki ti pey zot domaz?

Zot ti sitan ganny byen peye, ti'n byen bennyen, ti'n byen pize, ti'n byen prop. Ni en pis lo domaz ti napa pou tire - ki pov Mr Jean Mellie pa ti ganny en sou, akoz zot ti dir li in bliye met son non. Zot prop aktivis, zot viktimiz li.

Selman lezot zot ti gannyen zot. Larzan peye par ladministrasyon Prezidan James Michel – zot in touse zot domaz zot. Pa'n ale kot *perpetrators*. Ou vwar?

Ler Ferrari, Ramkalawan, lot - i ganny afekte, zot ganny domaz ek Gouvernman zot. Bann lezot dimoun pa pou touse domaz ek Gouvernman.

Bann lezot dimoun zot pou al anpay dan bann prose devan Lakour ki pa pou fini zanmen. E mon garanti zot sa, en. Pa krwar nou, nou pe vin dormi pou zot mars lo nou, en! Pa pe al arive sa!

Sa ki pou arive se ki zot pou vin avek zot Lalwa, i pou al ganny konteste! Tou zot bann desizyon fou ki zot pe al fer, pou al ganny konteste. Nou pou viv la lot kote semen. Zot anv dormi devan Lakour, zot pou dormi devan Lakour!

Be ou konnen ki rezilta sa pou arive? Zot pe set kondisyon pou prolonz soufrans bann viktim. Akoz sa prose ler ti konmanse, ti napa okenn sa bann lanpayaz ladan.

E sa msye ki'n anmenn sa bann lanpayaz la sa semenn, i konn tre byen. Li ki ti ekrir Lalwa, pa mwan. Li zot de Onorab Hoareau ki ti ekrir, pa mwan. Be akoz zot pa ti met sa bann kondisyon ladan?

Mr Speaker, be isi anndan pa ou tann en kantite keksoz ou? Mr Speaker, ou konnen ki mon'n tande sa semenn? Later Mr Michael Green ti ganny sezi. Mr Speaker, be later Mr Michael Green, Ferrari ki ti sezi. Maxime – Minis.

Be, ki mannyer ozordi nou isi lo sa kote nou responsab lasezi later Mr Michael Green, kan Maxime Ferrari ki ti sezi? Be pa antre zot sa? Rezourd zot bann keksoz laba antre zot. Rezourd zot bann problem. Tou zot defo, zot pese, zot pran zot balans lo nou!

Vole eleksyon menm tousala, akoz zot annan bon lentansyon. Mr Speaker, ou konnen ki mon'n tande ankor ozordi? Mon tann Nassim. Nassim osi zot balans lo nou.

MR SPEAKER

30minit Onorab. 30 minit.

HON JOHAN LOZE

Mon'n tann la sa. Yes, Mr Speaker, mon tann nonm Nassim. Mon ti konmans 4. Mon tann nonm Nassim. Be mwan, mon pa ti pou nonm Nassim si mon ti ou mon.

Ale al dir ou dirizan poudir *text* son garson i ankor lo telefonn Nassim. Dir li Loze ki'n dir. *Text* son garson byenneme i lo telefonn Nassim.

MR SPEAKER

Onorab! Onorab, ou pe fer akizasyon. Ou pe fer akizasyon ki napa okenn zistifikasyon. Onorab, mon pe dir ou mon pe aret ou ladres. Terminen.

HON JOHAN LOZE

Ou'n ganny en lakizasyon ...

MR SPEAKER

Ou'n ganny 30minit! Ou'n ganny 30 minit!

(Interruption)

MR SPEAKER

Onorab Loze, mon pou demann ou sorti dan lasal!

(APPLAUSE)

MR SPEAKER

Laparol i pour Onorab Norbert Loizeau.

HON NORBERT LOIZEAU

Mersi Mr Speaker. Bonzour tou dimoun.

(Interruption)

HON NORBERT LOIZEAU

Bonzour tou dimoun. Bonzour tou dimoun a lekout.

(Interruption)

(APPLAUSE)

(US members walked out)

MR SPEAKER

Onorab Norbert Loizeau, ou kapab kontinyen.

HON NORBERT LOIZEAU

Mersi. Ankor enn fwa Mr Speaker. Bonzour tou Manm. Bonzour tou bann Manm ki pe kit lasal Mr Speaker, apre ki mwan mon'n fini ekout zot lentervansyon. Bonzour tou dimoun a lekout.

Mr Speaker, mon ti anvi fer en komanter lo en size ki Onorab Cosgrow in koz lo la pli boner. Vi ki i konsern en lekol dan distrik Bel Air, lekol Bel Eau - kot *Headteacher* lekol in kominik ek mwan, e in dir mwan ki sa ki Onorab Cosgrow in koze pli boner, i pa fonde. Napa okenn laverite ladan.

E li konman *Headteacher* Lekol Bel Eau, i napa okenn lo son rikord, okenn let ki'n vin kot li *regarding* sa size ki Onorab Cosgrow in koz lo la.

E menm napa okenn *teachers*, ni paran, ni zanfan ki'n adres sa size avek li. I pa konnen kot Onorab Cosgrow in ganny sa lenformasyon. Mr Speaker, sa se *Headteacher* Lekol Bel Eau, Mis Jane Laurette ki dir mwan pas sa mesaz dan Lasanble, pou *clear* son lekol ki Onorab Cosgrow in koz lo la.

Mr Speaker, aprezan mon ava konmans mon lentervansyon. Mr Speaker, vre listwar Sesel - sirtou listwar Dezyenm Repiblik, ti ganny kasyet e menm pa ganny ansennyen dan bann lekol Leta pandan plizyer lannen, pour en sel rezon.

Enn akoz, i ti en vilen zistwar. E dezyenmman, pou ki sa zenn zenerasyon Seselwa, ozordi i pa ava konnen ki'n arive dan Sesel pandan sa bann lannen apre lendepandans, ziska ozordi.

Menm avek larive miltiparti Mr Speaker, sa pa'n zanmen ganny arive. Me parey nou konnen, laverite nou pa pou kapab kasyet.

An 2016, apre ki *LDS* ti ranport en mazorite 15 lo 10 dan Lasanble, tou keksoz ti vir anba lao. Sa ki anler ti desann anba. E sa ki anba ti monte. Lopoziyon Mr Speaker, sa letan ti ganny son vre plas dan Sesel – dan nou pei.

Kot parey nou pe war, Mr Speaker. Kot *Leader* Lopoziyon ozordi i kapab koze. I annan sa laliberte pou li koze san ganny mayose, ouswa ganny met en fizi deryer son latet. Ozordi zot lib.

Zot bann santer i kapab sante, maltret tou dimoun, dir nenport kwa ki zot anvi dir lo la, san gard desann anvil, aras zot, zot *CD* e pran zete. Mr

Speaker, Sesel ti reganny son laliberte.

Nou'n fer Mr Speaker, ki vremen Seselwa in reganny son laliberte ek son dinyite, ki pandan bokou letan nou ti'n perdi. Mr Seaker, avek larive 15 lo 10 - avek nou konman en mazorite dan Lasanble, nou'n sanz bokou bann Lalwa ki ti pe anmar nou konman en Lopozisyon ki serye.

Nou'n sanz bann Lalwa, Mr Speaker, enn; parey Lalwa POA Mr Speaker. Sa letan Mr Speaker, nou pa ti fer li, parey toultan mon dir, zis akoz nou ti anvi fer li. Nou pa ti fer li, parey mon kontan dir, ki nou ti fer li akoz zis pou nou benefisyé lo la - akoz nou annan 15 lo 10 e en mazorite dan Lopozisyon.

Mr nou ti fer li Mr Speaker - mon pou repet ankor; pou ed zot parti minoriter ozordi, ler zot vin dan Lopozisyon parey zot ete ozordi.

E la Mr Speaker, ler mon pe koz lo la, i fer mon mazin en parol dan en diskour dan *rally US* Dimans pase, kot kandida ki pe reve pou vin *MNA* pour Bel Air ti dir; kot zot in arive, Parti *US*, personn pa pou tir zot la, e zot pou kontinyen reste la. Mr Speaker, sa garson pa ti pe koz manti, akoz *US* pou toultan reste dan Lopozisyon. E se la ki zot sipoze ete.

An 2016 Mr Speaker, *Leader* Lopozisyon, ki ozordi i Prezidan Larepublik Sesel - Mr Wavel John Charles Ramkalawan - malgre ki ler sa non, nou nonm sa non, zot ganny en gou eg dan zot labous, Mr Speaker - i *ok*, pa fer naryen.

Ti propoze ki en Komite pour Laverite i ganny met an plas, pou ki sa ki'n arive dan lepase i ganny met o kler. E sa ki bezwen demann pardon, a demann pardon. Viktim a konnen lekel zot *perpetrator*. Kot tou sa ganny met o kler.

Kot tou a ganny met o kler e nou a *move forward* konman en nasyon. E la, *TRNUC* ti ganny formen, aksepte par tou lede kote latab. Akoz pandan sa letan, nou ti ganny dir ki nou dan koabitasyon.

Aprezan Mr Speaker, permet mwan koz en pe lo le 5 Zen, vi ki rapor ki devan nou in koz bokou lo sa dat. Le 5 Zen, 1977 en gro nyaz nwar ti kouver nou pei Sesel.

Sa ti arive akoz en group dimoun egois ki pa ti krwar dan la demokrasi e ki pa ti pare pou esper zot tour atraver en eleksyon lib - ti deside fer en koudeta, e ranvers en Gouvernman ki ti ganny elekte demokratikman.

Mr Speaker, parey Onorab Bistoquet ti fer resorti yer; i ti en *bloody coup*, kot

serten ti perdi zot lavi inosaman. Sa ki pa ti kontan ti ganny dir kite, ale. Sa ki ti ganny sans pou kite ale, zot ti al egzile dan diferan pei partou dan lemonn.

E Mr Speaker sa ki enteresan, menm si zot ti kite e zot ti ale, sa rezim diktatir ti vin rod zot kot zot ti ete. Ti annan bann arzan ki ti ganny anvoye pou reste laba dan sa bann pei pou *spy* lo sa bann dimoun. Vey tou zot bann zaksyon e raport avek Mr Rene isi.

E apre nou konnen ki ti arive. Si zot sa bann dimoun zot menm pa ti ganny fer en keksoz avek zot, me zot fanmir ki ti Sesel ti pey pour le konsekans.

La Mr Speaker, i fer mwan mazin Mr Gérard Hoareau, akoz i ti persiste. Akoz i ti krwar dan laliberte en pep. I ti krwar dan en pei lib. E akoz ki i ti krwar dan en pei demokratik, i ti ganny fizi a mor devan son laport.

Sa ti ganny arive Mr Speaker, akoz sa bann letan okenn dimoun...okenn dimoun ki ti rebel kont sa sistenm diktatir – marksis totaliter, parey mon frer Colin Dyer i kontan dir – ti ganny gete konman lennmi la revolisyon.

Bann ki ti reste Sesel pa ti ganny drwa koze. Parey zot ti fer avek enn mon zanmi, frer

Sonny Elizabeth - kot zot ti mars deryer li, fer li per e menm i ti bezwen kit pei al reste *Canada*. Apre pli tar *move Italy*. E sak fwa i ti desann pou vin konze, son lavi ti malere.

Travay ou pa ti gannyen si ou ti form parti okenn dimoun. Parey son ser, Mr Speaker, Anne-Marie Elizabeth ki ti *boycott NYS* ki i pa ti ale. Zanmen in kapab ganny en travay dan Sesel, sirtou dan Gouvernman – dan sekter piblik.

Sa se bann keksoz Mr Speaker, ki ti annan serten dimoun ki ti pe ganny servi dan distrik pou fer sa ban kalite travay. Pou vey lekel sa bann dimoun. Ki fanmir ou sorti. Ki parti politik ou sorti.

E sa se bann *DA* Mr Speaker. E ozordi Mr Speaker, dan Lasanble lo kote *US* nou annan 3 dimoun ki ti *DA*. Eski zot pa le demann en leskiz sa pep?

Me dan sa ka la Mr Speaker, eski zanmen in ariv en moman ki zot ti *DA* - ki zot pa'n ganny demande pou pez en dimoun, pou tenir son *file*, pou ser li e anpes li bouz devan?

Mr Speaker, sa en kestyon ki mon pe demande, akoz zot ki'n *DA*, mon krwar zot merit annan en larepons. Mr Speaker, laliberte lekspresyon ti ganny retire

avek Lepep Seselwa. Laliberte pou rasanble. Ou pa ti ganny drwa.

Lontan si ou ti pe asize apre sorti fer nou levennman *sport*. Ou asi ou pe bwar en pti limonnad, pe fer en konversasyon avek nou bann zanmi – Gard Bate ti monte, ti fer nou taye. Sa bann letan Mr Speaker, zot ti dir ki ou a pe fer konplo.

Curfew Mr Speaker, ti ganny mete. Ennler 6er, ennler 7er. Dernyen-r-er ti ariv 11. Kot nou'n war ki tou bann *clubs* partou dan Sesel, Mr Speaker, ti bezwen fermen. E aswar Sesel ti vreman fernwar, Mr Speaker, akoz ou pa ti war personn lo semen. Ou ti war zis solda pe patrole partou.

Mr Speaker, sa letan Sesel - Seselwa ti pler zot *sore* an silans. Serten zabitan Bel Air in pas dan bokou soufrans anba sa sistenm - apre 1977, apre koudeta. E mwan mon ti ankor en zenn garson sa letan - 8an. Mon'n vwar tou sa bann keksoz.

Sa i fer mwan mazin Mr Joseph Elizabeth, Mr Sove – nou dir li Mr Sove. Mrs Marie Elizabeth ek tou son bann zanfan; Anne-Marie, Christine, Dan - Gilly ek William.

Mr Speaker, zot in pler an silans pandan plis ki 30, apre lanmor son garson, zot frer - Sonny Elizabeth, ki ti

perdi son lavi dan leo Sans Souci ansanm avek Mr Hoffman. San konnen Mr Speaker, ki rezon ki sa in arive ek zot.

Me erezman Mr Speaker, en lot mon zanmi, Brian Victor, li i ti ganny sans sove. E pandan letan ki i ti lopital, en Minis ki ti dan Gouvernman sa letan, ti en dokter Mr Speaker - ti pase ti war son manman pe plere.

Son lekor ti'n – i ti'n ganny blese partou. Son lekor zot ti'n bare avek rido dan lopital. E sa dokter ti demann li; madanm, ki ou pe plere? Sa madanm ti dir li; larme in bat mon piti. I annan ankor de dan lakaz mor, zot, zot in fini mor.

E deswit Mr Speaker, sa dokter ti desann kot lakaz mor pou li vwar pou li menm. E mannyer i ti akont mwan sa kalite krijote ki ti'n arive - i ti menm telefonn Mr Rene, e demann li; “Albert, ki pe arive ki nou bann zenn pe ganny bate e pe ganny torture?”

I dir mwan Mr Rene ti dir li en parol. Permet mwan servi sa mo Mr Speaker. Mon a servi li zis enn fwa. I ti dir; “sa bann marmay in rod kouyon avek bann marmay larme. Bann marmay larme in bez zot.”

Mr Speaker, mon pa pou repet sa parol ankor akoz mon konnen i pa parlanter. Me

selman i enportan ki mon dir li parey in ganny rakonte.

Mr Speaker, sa bann letan konman en zenn *homme* ki pe grandi, distrik Bel Air ti parey en *battlefield*. Toulezour ti annan larme partou. Pe rode kot Brian i ete. Brian ti sanz kaz an kaz pou li kapab sov son lavi, ziska dernyen- r-er i ti reisi sove e al *somewhere* dan en pei Arab. E pli tar *move* Lanmerik.

Mr Speaker, sa bann letan lavi pa ti fasil dan Bel Air. Sirtou pour bann zenn ki ti pe grandi, kot parfwa nou ti bezwen aprann tou son – tou son bann *jeep* larme ki monte ler nou pe asiz o bor semen pou nou maske nou, akoz nou ti per.

E rigol. Tou sa rigol Bel Air Mr Speaker, mon'n dormi ladan mon. Akoz ler nou pe monte, menm si larme pa pe vin fer nou naryen, nou ti per. Nou ti plann dan rigol e nou ti kasyet.

Mr Speaker, sa bann letan ti annan bann lot serten dimoun ki ti ganny targete en pe partou dan bann distrik. Apre ki bann vol ti ganny arive – parfwa sa bann vol ti ganny arive parmi bann gran personnel dan larme. Apre ki zot ti dir? Bann *rasta* in fim zot drog, in al vole. Mr Speaker, kan sa bann dimoun pa ti pe vol naryen.

E la mon annan en frer rasta i dir mwan - i dir mwan; eski – demann zot; eski bann ki ti vol R50milyon, eski zot ti fim drog? Eski zot ti annan en *natty dread* lo zot latet? I dir mwan osi dir tou bann ki'n fer koripsyon, ki'n vole – tou sa bann keksoz zot in gannyen, eski zot ti fim drog, ouswa zot it en *rasta*?

Mr Speaker, sa group dimoun ti ganny terrorize, koup seve. Lapo latet parfwa ti mont avek sa *dreadlocks* ansanm. Ozordi Mr Speaker, mon fyer ki ozordi dan nou pei, tou dimoun i kapab debout ek en *natty dread*. Ozordi i annan *CEO* ki pe *stand* avek en *dread*. Eski zot fim drog? E zot pe fer en travay ekselan Mr Speaker.

E ozordi Mr Speaker, i annan dimoun ki pe siport Parti *US*, ki pe sante pour *US* gras a sa travay dir atraver nou bann frer ki ti pe ganny oprese sa letan.

Me selman Mr Speaker, pour Brian lavi ti malere, menm si i ti Lanmerik. Mr Speaker, nou rapel nou de Onorab Monthy, Brian ti vin war nou. Mr Speaker, sa gro zonm i tonm dan nou lebra i plere.

I plere akoz ziske ozordi i ankor pe ganny sa bann douler dan son latet. O kontrer i dir mwan dir Prezidan Ramkalawan, mersi pour sa

larzan ki ti anvoy pou li pou li kapab fer en loperasyon pou retir en pe sa bann douler. Me *still* i annan bokou pou li fer.

Tou son lavi, Mr Speaker, Brian i dir nou in pler an silans. Nou'n war dan *Truth* Mr Speaker, ler i ti pe fer son temwannayaz – lafason ki i ti akonte, ti ras ker.

I ti menm dormi ater pou montre mannyer son *perpetrator* ti pez son latet avek en bogi. Mannyer i ti ensilte li, Mr Speaker. I ti repet sa ek nou dan mon biro – nou de Onorab Monthy. Onorab Monthy i a konfirm sa.

Mr Speaker – E Brian i osi dir mwan, Mr Speaker, ki in ganny promet avek Parti US. Sirtou Prezidan Larepublik – Prezidan ki ti o pouwar sa letan – Mr Danny Faure, konmkwa zot pou rekonpans li avek en lakaz. Vi ki i annan en later *Sweet Escott*. Ziska aprezan Mr Speaker, naryen pa ankor arive. Zis zot in bat latet sa msye pou fer li krwar.

Sa i enn de ka.

Me i annan bokou ankor Mr Speaker. Me parey serten Manm in dir lo lot kote latab, mwan osi Mr Speaker, mon anvi war *closure* dan sa travay ki Komisyon in fer.

Mon anvi war en nouvo Sesel, konman en papa ki annan zanfan - kot tou Seselwa i viv byen ansanm. Kot tou lopinyon politik i

ganny respekte. Kot personn ankor pa pou ganny disparet, touye, ganny egzile. E menm ganny viktimize dan nenport ki fason.

E la mon kontan, Mr Speaker, pou war ki dan bann rekomandasyon, i osi annan en mansyon lo lasante mantal. Nou annan sa bezwen dan nou pei ozordi.

Parey Onorab Arissol e Onorab Kelly Samynadin in koz lo la yer. I enportan ki nou annan sa Mr Speaker, kot bann viktim ki'n ganny afekte fizikman, moralman, a ganny en swen – a ganny sa swen pou zot kapab kontiny zot lavi.

E osi Mr Speaker, i ava dan benefis bann *perpetrators* Mr Speaker, pour zot kapab kontiny zot lavi.

Mr Speaker, i annan plizyer bann bon rekomandasyon la dan sa rapor. Me mwan mon pa pou al lo tou akoz bokou parmi sa bann rekomandasyon, nou bann Manm – bokou Manm in koz lo la.

Enn parmi sa bann rekomandasyon Mr Speaker, ki tou dimoun pe koz lo la ozordi, se konpansasyon pour bann viktim. Menm si dan rapor, Mr Speaker, i mansyonnen ki Leta i bezwen zwe en rol ladan.

Mwan Mr Speaker, serten zabitan mon distrik in dir mwan, e zot ankor pe dir

mwan...Ozordi mon sorti kot en lekor, kot en dimoun ki'n ekspoze. Enn mon vye zabitan. Kontrer mon pas mon kondoleans avek la fanmir sa de fanmir ki ti pe ekspoze kot lekor.

Dimoun pe zwenn mwan, zot ankor pe dir mwan; Onorab, zot pa'n partisip dan sa bann zafer. Pa nou larzan ki pou pran pou fer sa bann keksoz avek. E zot in menm dir mwan Mr Speaker; fer sa parti ki ti o pouvwar sa letan, peye. Vi ki zot pa le demann pardon, e zot ankor pe glorifye zot per fondater ki loter tou sa bann soufrans.

Mr Speaker, sa en parol ki en dimoun ki reste Bel Eau – en madanm in anvoy mwan, in dir mwan dir. Konman en parti ki serye Mr Speaker. Ki responsab – parey zot dir. Pou tou sa ki'n arive dan nou pei Mr Speaker, eski i mal pou demande – pou demann zot pou fer en kontribisyon?

Mr Speaker, nou bezwen konmans en landrwa. Zot merit fer li an premye. Akoz se zot ki responsab pour sa bann aksyon ki'n arive, menm si zot dir zot pa ti la.

E la Mr Speaker, mon anvil ki *SBC* ozordi *or* demen, desann anvil. Ler reportaz pou zot fer, al demann bann dimoun; eski zot devret peye pou sa bann keksoz ki'n arive,

ouswa se Parti *US* ki merit peye?

Byenveni Onorab Gill. Mr Speaker, Onorab Gill i antre. I pa'n *walk out* li.

(laughter)

HON NORBERT LOIZEAU

Byenveni. Anr, in vin pran son *file*. *Ok*.

(laughter)

HON NORBERT LOIZEAU

Mr Speaker, se sa ki dimoun pe demande. Ale fer reportaz, dimoun a gete, a donn zot lopinyon. A dir kwa ki zot anvil. Akoz deplis Mr Speaker, se larzan Lepep Seselwa ki nou pe *deal* avek.

E deplis ankor, i annan dimoun ki pe dir mwan; si i annakor avek Lalwa, fer en *referendum*, kot dimoun a desann. Sa 35mil dimoun ki *US* i annan ozordi – ki dan zot rev, Mr Speaker, a desann. A vin vot non.

Sa i bann propozisyon ki dimoun laba deor pe demande. Pandan sa bann letan ki zot in o pouvwar Mr Speaker, en keksoz ki'n napa; bon gouvernans, latransparans e rann kont. Sa 3 keksoz pa ti egziste ditou.

E sa ti fer ki koripsyon – koripsyon ti partou. Menm si, Mr Speaker, zot ti dir ki i en persepsyon kot zot in anrisi

zot parti, Par vol byen Leta. Bann later Mr Speaker. E pa bliye, larzan ki'n perdi. En ta larzan Mr Speaker.

Mon pa pou koz lo la. Souvandfwa mon'n koz lo la, mon pa pou repete. Onorab Henrie in koz lo sa bann larzan. Tousala zot in fer.

Mr Speaker, be pa in ler pou rann Leta sa ki a parti pour Leta? Kot nou a kapab servi pou ed sa bann viktim. Pou nou ed sa bann viktim avek zot konpansasyon atraver sa bann demann. Lot zour Mr Speaker, bann Onorab lo lot kote latab in koz lo mersener.

Mr Speaker, be atraver mersener, be ti annan larzan ki mersener ti pey Leta. Milyon – milyon dolar Leta ti ganny peye. Lekel ki'n pran sa bann larzan? Be pa ti pour Leta Mr Speaker? La, la larzan ki Leta i bezwen pou nou pey sa bann viktim.

E en lot keksoz ankor Mr Speaker. Zot in koz lo sa zofisye militer ki ti perdi son lavi le 25 Novanm. Eski sa zofisye militer, son bann fanmir in gannyen en rekonpans atraver sa larzan ki mersener ti pey Leta sa letan?

Mr Speaker, sa bann kestyon nou bezwen demande. E mon pans pa si zot in gannyen. Pourtan larzan ti gannyen. Dan ki kont in ale?

In bezwen al dan kont en parti politik. Ouswa en dimoun ki ti pe ansarz sa parti politik.

Mr Speaker, i annan larzan ki ti antre dan kof Leta. Zarm *Malo* par egzanp. Zot ti vann avek en zeneral laba Rwanda - kot ti ganny perdi pandan pas sa peryod sa letan - kot ti annan bann zenosid, Mr Speaker.

Kot bann *Hutu* ek bann *Tutsi* ti touy kanmarad, Mr Speaker. Ti annan kriyote, Mr Speaker, atraver sa bann menm zarm ki Gouvernman ki ti o pouvwar sa letan - ki asosye avek Parti *US*, ti vann sa zeneral pou fer sa bann aksyon!

Mr Speaker, ou trouve – bann atosite pa'n ariv zis Sesel. Zot in enplike osi dan bann atosite parey mon pe nonmen. Be oli sa larzan *Malo* ki ti donn Leta, ki Leta Sesel ti vann sa Zeneral sa letan?

Se sa larzan ki Leta nou bezwen Mr Speaker, pou nou kapab servi, pou nou pey bann viktim.

MR SPEAKER

30 Minit Onorab.

HON NORBERT LOIZEAU

Wi, Mr Speaker. Vi ki zot pa la, i reste zis nou de Onorab Arissol.

(laughter)

HON NORBERT LOIZEAU

Permet mwan. Konmsi nou a servi sa pti letan, si ou konpran mwan. Mr Speaker, ozordi – selman mwan mon pou fer en pe vit pou nou fini.

Ozordi Mr Speaker, bann viktim i anvi en *apology* avek zot laba lot kote. Akoz zot pa le fer li? Lafanmir Elizabeth dan Bel Air, Victor. Lafanmir Dias ki zot ti met drog ek li. Tousala i sorti Bel Air Mr Speaker.

E i ti menm mor dan prizon dapre konpran. I ti menm mor pandan sa bann letan, akoz son lasante. E lezot fanmir ankor ti a kontan ganny en *apology* sorti kot zot. Akoz se zot ki pe reprezant sa parti ki pe responsab pour tou sa soufrans.

I vre zot pa ti la sa letan. Me aret glorifye Mr France Albert Rene. Onorab Cosgrow in dir ki nou'n pri dan lepase, Mr Speaker. Be ki mannyer nou kapab pri dan lepase? Be zot ki pri dan lepase, si ou ankor pe glorifye Mr France Albert Rene, savedir ou'n pri ek li, Mr Speaker!

E osi Mr Speaker, e se zot ki al fer vyolans. Ozordi Onorab Cosgrow in dir; pa rod zot. Kot si fodre desann, i a fer desann. Mr Speaker, mon anvi dir zot desann. Fer sa pli gro manman lamars, ki manman pli gro lamars parey zot ti fer

lot zour kot personn pa ti desann.

(laughter)

HON NORBERT LOIZEAU

Desann fer. E mon garanti zot Mr Speaker, napa okenn gard ni larme ki pou desann pou vin bat zot. Zot pou fer zot lamars. Zot pou mont kot zot, sen e sof!

Akoz sak fwa, Mr Speaker - zot merit konpran, ki akoz sak fwa zot nonm non Mr France Albert Rene Mr Speaker, zot tir en pti bout lakok lo sa boubou, Mr Speaker, ki bann viktim pe sey fer geri.

Mr Rene - Mr Speaker, in fer son prop *legacy*. Eski zot pou kontinyen anpandan avek son *legacy* zot? Kree zot prop *legacy* Onorab Pillay, anvi ki ou anvi vin Prezidan.

Akoz lot fwa ler ou ti pas Bel Air, ou'n dir ek dimoun konmkwa ki nou bann siporter pa tro, tro kontan Mr Herminie.

(laughter)

HON NORBERT LOIZEAU

Alors i krwar li i pou debout li menm. Be kree ou *legacy*. Aret anpandan ek Mr Rene, Mr Speaker! Mon pe al fini.

(laughter)

MR SPEAKER

Terminen silvouple.

HON NORBERT LOIZEAU

Pa zot in dir dan zot Kongre ki zot, Mr Speaker – zot ANUS. *A New United Seychelles*, Mr Speaker. Zot *new!* Zot *A New United Seychelles*. *Move on!* Kree zot prop zafer!

Montre ki zot vremen A New United Seychelles. Move away from Mr Rene. Mr Speaker, Renait de nouveau.

Mr Speaker, an terminan, mon anvi dir sa; mon ti anvi leve Mr Speaker ozordi, pou *extend* mon lanmen avek zot laba lot kote latab. Pou *extend* mon lanmen avek zot pou demann sa leskiz ansanm, Mr Speaker. Akoz mon osi mon annan fanmir ki ti dan *SPUP/SPPF...* (Pa get ler Mr Speaker, mon pe al fini)

Me zot sorti Mr Speaker, mon pa pou kapab fer sa. Me Mr Speaker, en keksoz ki mon anvi dir an terminan; rekonsilyasyon nasyonal i pa en keksoz ki fasil pou annan.

Mr Nelson Mandela ti dir, mon *quote* – lot zour mon ti dir sa an Angle. I ti dir - la mon pou dir li an Kreol; “a lafen, rekonsilyasyon i en proses spirityel ki bezwen plis ki en kad legal. I bezwen ariv dan leker e lespri sa pep”. Fen kotasyon.

Mr Speaker, se sa ki nou merit fer. Nou tou nou bezwen ini ansanm. Annou fer li pour Sesel. Annou fer li pou ki demen mon zanfan, zot zanfan i a kapab zwe ansanm, mars ansanm, etidye ansanm e ganny menm sans ansanm.

Annou fer li pour Sesel Mr Speaker, ki enn fwa pour tou, sa larm ki pe koule dan lizye sa pei ki apel Sesel, i a ganny eswiye enn fwa pour tou.

Mr Speaker, mon a remersi ou pou donn mwan sa sans.

MR SPEAKER

Mersi.

HON NORBERT LOIZEAU

Mon ti ankor annan detrwa pti paz.

(laughter)

HON NORBERT LOIZEAU

Me selman, mon ava fer sir mon ava anmas li pou en lot moman apropiye pou mwan fer li. Mersi Mr Speaker.

(APPLAUSE)

MR SPEAKER

Mersi. Mersi Onorab. Mon a donn laparol Onorab Sandy Arissol.

HON SANDY ARISSOL

Mersi Mr Speaker. Bonn apre midi tou dimoun ki a lekout.

Bonn apre midi spesyalman bann dimoun Bel Ombre.

Mr Speaker letan mon pe konmanse, mon ti a kontan prezant mon kondoleans avek lafanmir Tirant, lafanmir Hoareau Bel Ombre.

E osi lafanmir Bijoux ek lafanmir Amelie ki zot pe fer servis lanterman pour zot byenneme. Be ki nou, nou pa'n kapab avek zot dan sa moman tris.

Dezyenmman mon ti a kontan felisit osi en group zenn, ki an se moman zot an Sid Kore pe partisip dan *Jamboree Scout Enternasyonal*, Mondyal ki pe fer. Nou swet zot de bon.

E nou felisit osi... I annan 9 zenn Seselwa avek zot ankadrer Ms. Marie-Hélène Adrienne e tou bann manman, bann papa sa bann zanfan, nou swet zot *bon séjour* laba Sid Kore e bon retour dan nou pei.

Mr Speaker, le 5 Zen 1977, en group bandi – bann move dimoun, ti deside apre ki zot ti'n konplote, pran nou pei atraver en koudeta. Kisisa koudeta? En lese ilegal par en group bandi, avek bi pou vin en Gouvernman legal – dapre zot, san pas atraver prosesis legal ki apel eleksyon.

En d'autres mots, i en *act* kapon, zis parey nou'n vwar Parti US in fer apre midi. Si ti napa koudeta, ti pou napa sa

deba la apre midi. Zot ti pe anmas zis defet dan eleksyon avek Mr Mancham, mon aprann. Alors sel rekour, zot ti bezwen vol pei! Parey zot pou ganny defet an 2025 ankor.

Apre deklar Mr Rene koman Prezidan, li Mr Rene i ti zwe inosan. Angiz i pa ti konn naryen sa ki ti pe arive. Zis i ti ganny demande pou li vin Prezidan pei. La ozordi bann Manm ki'n koze, zot pe zwe viktim. Koz ti lavwa e montre zot inosan.

Akoz nou lo sa size koudeta Mr Speaker? Rapor i fer referans avek koudeta. Alor nou bezwen koz lo koudeta. Akoz nou pe fer referans avek Mr Rene. Rapor i fer referans ek Mr Rene, nou pa kapab koz Lepap John Paul II. Me apre nou ava al lo rekomandasyon ki sa menm rapor i fer referans avek.

Lavi sa letan, enkli Sesel apre '77, ti boulderse pour plizyer fanmir. Personn pa ti kapab bar zot sa bann bandi. Personn pa ti kapab dir zot naryen. Si ou pa kontan - bato i pase, avyon i pase. Tou bann *Yankee* ti ganny demande pou al se zot. Sa lafason ki zot ti ganny dir.

Lanbasad ti ganny fermen e en diktatir enkrwayab ti gouvern nou pti pei. E pou zot sa ti apel laliberte. Sezi tou later ek

swadizan gran blan, pou partaz avek bann ki ti napa.

Me letan i pran 10 later avek swadizan gran blan, i pran 4 pour li, i partaz antre zot fanmir, zot galan, zot zanmi. E i vann 6 sa morso 10 ki'n pran. E i apel li 10 menm. E pou zot sa ti apel" Egalite."

Pous tou bann ki ti annan ledikasyon e anpoy tou bann naryen fer - e pour zot sa ti apel "Fraternite." *Security clearance* ti anpes plizyer fanmir e zanfan manze.

Ozordi sa menm parti ganny lodas e toupe vin larger goute dan nou Lasanble Nasyonal, kan se *security clearance* ki'n anpes plizyer fanmir ganny en goute. En papa ganny en saler, e en manman sonny son fanmir.

Pour zot sa ti "*All the people, by the people*", e "*for the people*." Zot in sey re ekrir listwar. Fors sa dan nou latet atraver leson politik, pou fer nou krwar ki Mr Rene premye Prezidan Sesel.

Granmersi mon defen granmanman, Helena Uzice, byen konnen koman Manmzel Anne, en gran siporter *DP* - ki ti asir mwan ki sa i en fo lenformasyon.

Tou bann bandi sa letan ti deklar zot lekor Mazor, Kaptenn e Kolonel. Kouronn zot zepol sa letan. Ti napa problenm Mr Speaker. Al *shoot* lapen lo zil e zot ti ganny

grade. Sa ti loportinite ki Onorab Herminie in koz lo la dan sa menm Lasanble Nasyonal.

Ozordi akoz napa lapen, Anille Bristol en zenn Seselwa kalifye ki'n pas tou son tes, i bezwen ganny imilye dan nou Lasanble Nasyonal pou satisfere zot groker konman en parti.

Tou zanfan ganny forse pou al *NYS*. Zwenn *Youth League*. Ganny forse pou al dan Milisya pour naryen. E si ou sanse, ou ganny en tyak Minis dan Gouvernman.

Dormi dan lafrese. *Shoot* tron koko angiz soumaren. Bann madanm ek zenn fiy ganny vyole gran lizour, sorti ek larm dan zot lizye, lerim dan nennen. Si ou pa dakor ou pa kontan, savedir ou en lennmi larevolisyon!

Letan *US* i vini e dir ki *LDS* i anvii ferm Parti *US*, la zot konnen kwa vreman ki zot pe *deal* avek dan *LDS*. Mr Speaker zot bliy vitman. Letan *SPPF* dan son gran mazorite ti anvii ferm *SNP* sa letan, sa ti *ok*? Anmenn tou kalite *case* Ankour kont Mr Ramkalawan ek Onorab Georges koman de *Leaders* sa letan. E menm ou Speaker Lasanble ou'n ganny arete, ganny sarze pour plizyer fwa, san sarze. Me zot lentansyon sete kwa, pou ferm sa parti?

Koudeta li menm ler zot ti fer, eski ti napa lezot parti politik ki ti an egzistans? Zot bi sa letan zot ti pou fer kwa? Ferm tou larestan parti politik?

Letan ti anmenn "Regar" Ankour e ganny demann gro, gro sonm, zot bi sete kwa Mr Speaker? Letan zot ti kree en *fake* Lopozisyon ki ti propoz son lekor, segonn son lekor e *vote* pour son lekor dan sa menm Lasanble Nasyonal – zot bi sete kwa Parti US?

Parey zot ti pey Kaen pou lev son lanmen pou dizourd Lasanble Nasyonal, zis pou nou pa pas lo Lalwa Eleksyon, Mr Speaker. Zot bi sete kwa – sa letan Parti US?

Letan Mr Ramkalawan avek Minis Ferrari – ozordi, ti ganny kas latet kot *precinct* Lasanble Nasyonal, kot *National Library* sa letan, dan zot gran mazorite, zot bi sete kwa?

La ozordi Mr Speaker, zot soufer konman en parti minoriter. Zot napa privez. Zot pa kapab fer ankor sa ki zot anvi. Menm *summon* zot siporter pou ranpli laplenn zot nepli kapab. Zot blanm nou e dir ki nou pe fer zot siporter per. Be kan? Siporter in kit zot.

Seselwa sa letan ti divize, konfize. Vin lennmi e travay pou touy kanmarad. Tou sa ti ganny ordonnen par en parti

ki apel *SPUP/SPPF* ki'n ganny nonmen konman en *perpetrator* dan rapor. Lepep. E ozordi zot in reenkarnen, apel zot lekor US. E zot in donn zot non en zoli non Laten - *ANUS*.

Se la kot nou'n arive ozordi, pe fer sa diskisyon lo sa rapor. Mr Speaker, mon bezwen felisit e dir mersi nou Prezidan Mr Ramkalawan, akoz li ki ti inisyen en Mosyon pou ki sa letap laverite e rekonsilyasyon nasyonal.

Ozordi Sesel in sanze anba en *motto*. 'Sesel pour tou son zanfàn'. Akoz i krwar ladan e i viv e krwar dan linite nasyonal. Se pour sa rezon nou Lasanble Nasyonal ozordi i konpri Manm ki sorti dan diferan parti politik.

Personn pan aste nou, fors nou, oubyen trangle nou pou vin en Manm Parlman *LDS*. Ti nou swa personnel. Bann ki ti anvi en lot swa, zot in fer libreman. E pou sa nou fyer sa ki nou ete.

E mon ti a kontan felisit tou mon Manm lo sa kote labat e demann zot pou aplodi zot lekor pour travay ki zot pe fer.

(APPLAUSE)

HON SANDY ARISSOL

Mon ti a voudre profite pou felisit osi Mr Faure. Omwen li i ti ganny kouraz sa letan pou li demann pardon konman en

Leader, lo lapar son Gouvernman. Sa i en siny rekonsilyasyon e linite nasyonal.

Nou bezwen osi rekonnet ki plizyer Seselwa, Mr Seselwa – Mr Speaker, mon repete - nou osi bezwen rekonnet ki plizyer Seselwa ki'n ganny nonmen konman *perpetrator*, in demann pardon.

Ti annan en lanmes spesyal kot zot in ale. Zot in montre sipor e asiste. Sa osi i en siny linite e rekonsilyasyon, anvi ki zot ti ganny lord sa letan pour tou sa ki zot in fer. Me letan US i dir; pous zot, parey rekomandasyon i fer resorti. Me nou LDS, atraver Onorab Georges – nou'n dir konsidere.

Parey letan mon get *Case* 141 Mr Speaker, ki koz lo Romano Songor.

Case 242 ki koz lo Christian Lionnet.

Letan *Case* 147 ki koz lo Mr Mousbe.

Case 10 ki koz lo Mr Ernesta ki ankor dan Gouvernman. Eski sa ki Onorab Lemiel ek Onorab Pillay ti pe dir nou?

Pous sa bann dimoun dan travay, dapre sa ki zot in dir? E apre sa menm group dimoun, zot pou anmenn *PNQ* pou rode konbyen dimoun in ganny pouse dan travay. Zot pou bezwen pran zot en desizyon. Konnen kot zot

stand atraver travayer e nou bann frer ek ser Seselwa.

Eski – wi nou pa pou kapab sanz rekomandasyon, Mr Speaker. Me nou kapab koze, fer propozisyon. Sa i nou rol. Pa sit verse Labib parey Onorab Aglae in fer – ki koz lo pardon. Me selman li menm li sa Onorab i refize pou li demann pardon!

Me bann Manm lasanble US ki asosye avek bann lorganizasyon enternasyonal; *SADC, COMESA, IPU, PAP* e lezot organizasyon ki denons bann tel aksyon barbar. Me isi, sa bann menm Manm zot dir zot pa pou demann pardon. Kestyon ki ou demande; eski zot serye alor?

Ozordi Mr Speaker, nou bezwen dir pou dir Sesel i lib. Tou Seselwa i lib. Zot kapab eksprim zot lekor libreman, san personn met en *bin liner* lo zot latet. San personn koup parti prive zot lekor e zet zot dan diranto.

Personn pa pou anmas ou, anmenn ou dan Kan Larme e deplis ou lipye avek rakor politin – parey rapor i fer resorti. Personn pa pou pran ou later avek lafors e apel li son later, e met tonnel sousout lo la.

E la ziska ozordi nou annan Seselwa ki annan morso later, parey nou'n ganny dir dan letan Mr Rene. Nou annan Seselwa ozordi ki

annan plizyer kare later, parey nou'n ganny dir ti arive anba '77.

Me zot ti napa kouraz pou pran sa bann menm morso later avek sa bann dimoun ki annan pli pti bout – 40 pti bout. Menm kare ki menm groser avek en laplenn foutbol. Zot pa'n ganny kouraz pou pran, zis parey zot ti fer an '77.

Napa en Manm LDS ki pou donn lord pou met drog. Pou drog sorti Mahe e mont Praslin, swa La Digue – e met dan ou loto, swa dan ou lakaz. Pou ou ganny kondannen, san zize. E deklar ou koupab.

Mon fyer mon LDS Mr Speaker. Mon fyer mon'n reste sa zenn Seselwa ki'n ede, vizite, koze, asiste sa letan avek SNP. Letan Seselwa ti per, ti napa kouraz, e zot ti fristre.

Mon'n en zenn ki ti napa *Masters*, ni degre, ni *PhD*. Me mon'n sa zenn ki'n vin devan, defann e reprezant plizyer bann ki ti annan zot *Masters*, zot degre e zot *PhD*. Me ki ti napa kouraz pou debout kont sa sistenm ki ti met zot otaz.

Pour sa, mon fyer Mr Speaker. E ozordi mon fyer mon form parti Manm Lasanble LDS. Gouvernman LDS dirize par nou Prezidan, Wavel John Charles Ramkalawan, ek tou bann Minis. Mon fyer e mon pou

kontinyen debout e lager pou nou kontinyen reste ini konman en sel Sesel dan lape, rekonsilyasyon e laverite.

Mon profite pou felisit Onorab Georges letan in zwenn bann ansyen Komisyoner dan zot kapasite konman bann sitwayen prive, apre ki rapor ti'n fini ganny soumet.

Zis parey i kontinyen zwenn nenport ki Seselwa, swa etranze, ki demande pou zwenn li dan lentere pei. Si Onorab in zwenn ek bann ansyen Komisyoner, US osi zot ti kapab demann en *meeting* si zot ti vreman anvi.

Me non Mr Speaker, zot refize, fer keksoz deryer rido. Zot ti rapel nou dan sa menm Lasanble Nasyonal. Me zot mefyan tou dimoun, parey Onorab Uranie in rapel nou.

Me zot profite dan Lasanble pou fer krwar ki; zot wi, zot ti anvi. Non zot pa ti anvi. Parey zot labitid, zot pa krwar dan rekonsilyasyon ek linite, E zot pa pou demann pardon personn Mr Speaker.

Linite i konmans dan lakour. Me par kont, nou'n tann lezot endividi ki anvi aspire pou vin Prezidan - sa i Patrick Herminie, ki sa i reste dan son rev parey nou tou nou konnen. Dir i pa pe demann pardon lo lapar personn. Eski sa i en siny linite, rekonsilyasyon nasyonal?

E par kont i tris e malere, letan Sesel pe rod sa linite, li menm li Patrick Herminie i vire e i dir san okenn ezitasyon ki; okenn dimoun ki sey bar zot, pou ganny vwar dan en rigol anba en pon. Eski i pe mazin revanz si i retourn o pouvwar? Eski sa i en siny rekonsilyasyon oubyen lape, linite – ki pei pe rode ozordi?

US in sorti *Gordon Square*. Zot in al *Regina Mundi*. Al *United Square*. E la zot in fini lo *Mini Stadium* Mr Speaker. Pa nou ki pou ferm sa parti, me Seselwa dan son gran mazorite ki pou met zot dan bin listwar an 2025.

En lot i monte e i tret tou dimoun dragon. Sa se Onorab Loze. En Manm Lasanble Nasyonal. I tret tou lezot Manm konman dragon. I tret tou son frer ek ser konman bann lezar mangouya.

E bann lezot *Leader* zot riye, e zot aplodi. La dan Sanmdi zot pou ganny kouraz pou rantre dan bann distrik e vizit bann fanmir bann dragon, e bann fanmir lezar mangouya. Sa pour zot i apel linite, rekonsilyasyon ki swadizan zot pe rode.

Letan Lopoziyon i refize partisip dan bann desizyon nasyonal pou ed pei bouz devan, eski i en siny linite Mr Speaker? Larepons i non.

Konpare ek sa Lopoziyon dirize par Wavel

Ramkalawan, kot i ti propoze, diskite e siport pei lo bann desizyon konkret. Sa linite, sa rekonsilyasyon? Malerezman i non, Mr Speaker pour US.

Divizyon, divizyon e ankor divizyon. Eski sa ki Sesel i bezwen ozordi? Parey *motto zot rally*; Soufrans En Pep Mr Speaker – zot *rally* se “Soufrans En Pep.” Sa rapor i vre soufrans en pep Seselwa.

Mon ti ava profite lo non zabitan distrik Bel Ombre, pou kondann bann aksyon barbar ki'n arive dan nou pei. E reasir nou zabitan ki sa bann labi pa pou ariv ankor dan nou pei, Mr Speaker.

Zis parey rekomandasyon i stipile dan rapor. Nou mazin tou fanmir bann viktim. Bann ki'n viv isi, swa aletranze. Nou osi mazin fanmir Mr Antat ki'n ganny mansyonnen dan deba ki ti'n ganny touye atraver latak mersener.

Nou mazin sa fanmir dan sa letan difisil. Zis parey nou mazin nou bann frer ek ser ki'n perdi zot lavi, touye par zot prop frer Seselwa - ordonnen par en lot Seselwa ki reste Sesel parey li.

Mr Speaker, frer ek ser Seselwa, spesyalman fanmir, zanmi bann viktim ki pe ekout Lasanble ozordi, i en moman tris dan nou listwar kot nou Lasanble i bezwen asize pou diskite en rapor ki koz lo bann

atrosite ki'n pase dan nou pti pei.

Mr Speaker, i enportan pou mon fer mansyonnen poudir pa *LDS* ki'n deside pou nou koz lo sa rapor. Sete tou lede parti atraver *ABC*, Komite ki get size Lasanble Nasyonal, ki nou'n ariv lo sa size ozordi.

Letan nou ti pe get zenosid Rwanda. Nou ti pe get rezim *Apartheid*, Sidafrik. *Zarm Malo* ki ti ganny vann pou asasin bann zanfan ek bann madanm inosan. Tousala lapar Parti *SPPF*, ki en *perpetrator* dan rapor.

Pour nou ti anba nou nennen. E nou ti pe inyore, Nou ti pe zwe sourd ouswa pa koz lo la, akoz Seselwa ti per – akoz konsekans.

Letan en parti politik i servi son pouvwar pou elimin son sitwayen; pou entimid. Fer disparet. Koupe. Tortire. Pik li ek en koute. Koup son parti son lekor, zet li dan diranto e fer soufer son fanmir. Eski koudeta ti en zistwar envante?

Tou sa Seselwa ki'n vin devan, zot zistwar pa korek? Eski bann Komisyoner ki'n met parol dan labous sa bann dimoun, parey bann *US* in sey fer nou krwar? Eski rapor nou dan kote *LDS* ki'n ekrire, ki nou pe diskite ozordi?

Letan zot ofanse, nou koz lo Mr Rene. Rapor i fer referans ek Mr Rene, ek lord ki i ti donner. Eski bann ki pa ti

vin devan, zot ti ganny dir pa vin devan? Oubyen i ti zot swa pou reste dan lakour e swiv deba parey larestan dimoun?

Lekel ki'n o pouvwar tou sa letan? Dan Lasanble, ki parti ki dan Lopoziyon? Lekel ki zot ti konsider konman zot per fondater sa letan? E son non in ganny mansyonnen plizyer fwa?

Akoz sa bann sanson ankor pe zwe dan zot *rally*. Sa bann menm group dimoun ki pe dir zot pa responsab, napa naryen pou fer avek sa bann atosite?

Mon demann Lepep Seselwa en kestyon; Eski i sanmenm sa parti politik ki mon bann fanmir ankor pe siporte? Sanmenm sa parti politik ki mon vwazen, mon zanmi i ankor pe siporte?

Eski sa sete zot manifesto sa letan, e lobzektif sa parti ki apel *SPUP/SPPF/Parti Lepep*. E ozordi in ganny en non Laten pou elimin tou sa ki pa siport li – parey rapor i dir nou. Sa i sa bef ek sa gran korn, ki Onorab Vidot ne Sanders ti pe koz lo la.

Sa menm parti politik ki anvi retourn o pouvwar. Sa menm parti politik ki ankor bann menm dimoun ki ti donn sa bann menm lord. E sa bann menm parti politik ki ankor pe glorifye sa bann menm dimoun ki ti donn lord pou

touy zot frer, nou ser e fer li disparet. Fouy son prop trou, epi *shoot* li.

Sa menm parti politik ti anmas dimoun aswar, anmenn laboratwar e elimin zot. Sa menm parti politik ki Seselwa pou met o pouvwar 2025, Mr Speaker?

Mon redemann ankor Lepep Seselwa ki pe swiv nou, eski sa parti politik ki nou anvi remet o pouvwar 2025? Eski sa parti politik pa devret ganny *ban* pou partisip dan eleksyon ankor Sesel, apre tou sa rezolisyon?

Mon redemann ankor sa kestyon Mr Speaker. Eski sa parti pa devret ganny *ban* pou partisip dan prosen eleksyon, okenn eleksyon dan nou pti pei Sesel?

(APPLAUSE)

HON SANDY ARISSOL

Me bann lezot parti politik ki'n anrezistre e ki kredib ava kapab fer en travay politik serye, vre e responsab konman bann Lopozisyon ki zot lanmen i prop.

Me en size enteresan se konpansasyon. Likel ki pou peye? Likel ki responsab? *LDS* in zwenn konpansasyon *Zimbabwe*. Nou'n zwenn konpansasyon *fungus*. Nou'n zwenn konpansasyon larzan La Misère. Larzan Stasyon *PUC*, Baie Ste Anne.

Mon aprann bann fanmir Fanchette, Monnaie pe rod zot later lo La Digue e pe rod serten konpansasyon. I annan en fanmir pe rod zot later Cap Ternay – pe rod en konpansasyon. Lafanmir Barra pe rod zot later – pe rod en konpansasyon.

Zot in kit pei, sa menm parti, avek tou sa det. Selman sa menm parti ki vini e ki dir nou; donn Seselwa *welfare*. Donn Seselwa *welfare* nou dir zot! Met larzan, plis larzan dan pos Seselwa.

Sel politik sal ki zot kapab fer apre ki zot in kit nou avek sa det. Mon mansyonn sa bann size aköz i konsern larzan Mr Speaker. E ler pou peye, tou dimoun i tourn ver Gouvernman ki zot demande pou peye. Likel Gouvernman? Gouvernman i nou tou. Mwan avek ou.

Ki mannyer nou pou ganny tou sa milyon pou pey tou sa konpansasyon? 50milyon. 25milyon. 10milyon. Sakenn pe demande. Eski Gouvernman in dir i pa pou peye? Non Gouvernman pa'n dir i pa pou peye, Mr Speaker. Eski nou'n vwar delwil? Non nou pa ankor dekouver delwil. E nou pa ankor dekouver dyanman.

Eski nou pou bezwen enpoz plis *tax* lo zabitan Bel Ombre avek bann zenn ki pa ti'n ne '77, pou nou kapab pey

tou sa atosite ki en sel parti politik in fer?

Sa i bann refleksyon ki mon met la ater, pou nou bann frer ek ser Seselwa ki pe ekoute, analize. Zot pe donn lenpresyon Seselwa ki i annan en Mosyon dan Lasanble ki pe demann siporter *US* pou vann tou zot propriyete, pou nou ganny larzan.

Mr Speaker, sa i en fo lenformasyon. Sa se propagann ki zot pe fannen. Sel deba ki i annan dan Lasanble, se Parti *US* li menm ki devret pey bann viktim - pa non zot bann aktivis. Zot aktivis i inosan. Me *US* ki devret peye.

Akoz lazenes Seselwa ki pa ti ankor ne sa letan, li ki pou bezwen *bear* sa *burden US* ki'n la. E i annan plizyer zot ankor pe rezouir bann byen malaki anba sa menm parti, Mr Speaker?

Me, i bezwen konmans en landrwa sa konpansasyon. Ki sa parti ki'n responsab i ankor aktiv, ki i ankor pe ganny larzan ek *taxpayers* atraver Bidze – bezwen arete. E sa larzan ganny mete dan en fon konman en konmansman Mr Speaker.

Dezyenmman, rebran tou sa bann kare later ki *US* i annan. 40 morso. I enportan pou Lepep konnen. 40 morso. E vann sa later, sa larzan i ava

al dan sa fon. Deza zot in konman vann en pe partou.

Zot pe arpant La Rivière Anglaise. Zot pe arpant Mont Fleuri. Zot pe arpant Beau Vallon. St Louis in konmans pe penn. La Digue. E la mon aprann poudir later kot Flanbwayan pe ganny ofer pour 100milyon. Apre zot dir *US* napa larzan?

Nou bezwen al get dan sa kont Mr Speaker. E sa bann larzan i a vin dan sa kont ki rapor pe demande pou nou konmans en landrwa, pou ganny larzan pou nou pey bann viktim laba deor.

(APPLAUSE)

HON SANDY ARISSOL

Tou bann byen malaki bezwen ganny vann pou nou ganny sa larzan, pou nou met dan sa fon – pou ki tou bann dimoun ki'n ganny afekte i a ganny zot larzan. Zot in soz zot soz. E zot ava soz zot soz zot menm. Pran zot responsabilite e demann pardon.

Trwazyenmman; mon dir vann Zonm Lib avek en biznes ki aste *scrap metal*, nou ava ganny sa larzan pou met dan en fon pou ed bann dimoun ki'n ganny afekte Mr Speaker.

(APPLAUSE)

HON SANDY ARISSOL

Sa bout *Maison Du Peuple* ki *US* i *mange* pou lwe, e ganny larzan i devret ganny pran. E sa larzan ki ganny zenere atraver *rent*, larzan ava al dan sa fon. Me fodre note ki *Maison Du Peuple* i bezwen ganny pran e rann a Lepep Seselwa, parey nou ti ganny kado lo non Lepep Seselwa!

(APPLAUSE)

HON SANDY ARISSOL

Tou bann *asset* ek biznes ki zot annan, i devret ganny sezi konman en parti e i ava deza en konmansman pou asiste bann viktim. Sa ki Mosyon pe rekomande. Sa ki nou dan *LDS* nou pe dir.

I bezwen konmans en landrwa. Pa zis met sa fardo lo Lepep Seselwa. Epi Gouvernman i ava fer son bout. Mon'n al koumsa aköz mon pa krwar i annan okenn Seselwa - menm bann Manm Parti *US* dan Lasanble, zot in avoue ki pa zot ki responsab.

Menm zot siporter parti. Si zot ki pa pou avoue, zot pa responsab konman bann *Leaders*, eski zot siporter i devret responsab? Non, Mr Speaker. Nou pa anvi menm siporter Parti *US* ki pou anvi vann son byen, swa son larzan, swa pey *tax* an plis – pou ganny larzan pou pey konpansasyon bann viktim.

Pa sa ki nou, nou anvi Mr Speaker.

Mon dakor ek zot, aköz zot pa ti konnen ki zot pe siporte. Me si ou kontinyen siporte, savedir ou dakor ki'n arive, e ou dakor pou ede pey sa konpansasyon. In ler pou nou bann frer ek ser ki siport *US*, ouver zot lizye e swiv sa ki pe pase dan zot pei. Zis vorasite en group dimoun, Mr Speaker.

Mon siport bann rekomandasyon pour en *successor body be appointed to complete the work, including compensation*, Mr Speaker.

Pou fini, mon anvi dir ek bann *US*; sote, pile – zot responsab pour sa ki'n arive. Zot ti devret zis vin *humble*. *Humble!* E demann pardon sa pep ki'n met konfyans dan zot pour plizyer lannen, san konnen ki zot ti pe siporte - e ki ti pe arive dan zot prop pei.

Lo nou kote Mr Speaker, nou krwar dan laverite. Nou krwar dan linite nasyonal ek rekonsilyasyon. E pare pou anmenn nou pei ek tou Seselwa, ver en nouvo Sesel kot sa bann atosite krim, vyolans pa pou egziste.

Sel opsyon pour lepe Seselwa pour en meyer Sesel, se pa lot ki avek *LDS* anba direksyon e gidans nou Prezidan, Wavel John Charles Ramkalawan.

Avek sa, mon ti a kontan remersye ou Mr Speaker, e felisit tou mon Manm lo kote latab ki'n fer zot entervansyon. Mersi bokou.

(APPLAUSE)

MR SPEAKER

Mersi Onorab. Mersi tou Manm pour zot partisipasyon. Nou a termin la avek sa deba. I pa'n en moman fasil, me selman mon krwar poudir Lasanble ti bezwen pronons li lo sa rapor e son bann rekomandasyon.

Mersi sirtou bann ki'n met lanfaz lo propozisyon pour rekomandasyon e ki mannyer nou war pei pou avanse avek sa. Nou ava *adjourn* e Lasanble a rebran Mardi 9er. *Adjourn.*

(ADJOURNMENT)